

恭審某官榮拜宸恩肅將使指涓日之剛肇開臺府伏  
惟歡慶某以官歲有守阻趨崇仰輒藉毫楮以伸祇賀  
之誠伏惟台慈曲垂矜亮

某官負間世之才茂經邦之畧飛聲騰實久結主知暫  
屈外臺祥刑之寄登攬方初峻褒崇秩眷倚有加茲可  
驟卜區區閩陬詎能淹一歲九遷此其首途也誦詠之  
深實非私德

庸繆竊色伏承詔車按臨迎謁道左恐悚芒負道德寬  
洪海涵淵蓄非惟曠收之責根辱少道從容延接非所  
宜蒙感悚之私交積方寸俯伏陳露莫究款言

某疎遠下吏瞻望台躔有雲霄之邈黃緣竊粟叨屬部  
封玉卽禹耒幸侍熒煌之座違去戀慕神爽飛越所賴  
託庇二天之下尸官鹿鹿必蒙終始貸宥某雖天資不  
穎亦當庸加磨勵祈効補報萬一皎皎此誠仰冀台察  
某不避冒瀆之罪僭申台閣德聚安問伏惟履茲庚戌  
尊幼駢介龐鴻之祉屬色豈無可以驅策事件拱聽要



束某頌禱

上憲使劄子

伏以秋用仲瑄共惟某官繡斧光華臺綱靖謚神聿贊相  
台候動止萬福某承乏下邑仰承蔭馭未由詹侍謹  
具劄目塵溷記史伏乞台察

偵候威嚴具如右劄未審比辰台候復寔似仰惟玉節  
所臨吏民畏戴神之聽之未介繁祉更乞上體眷隆妙  
毓神觀晉膺柄用慰天下朝夕之望

某官踐履醇粹度越當今學問洪深追配前古坐于廟  
朝致君澤民益將不勳聲色外臺祥刑之寄雖日全閔  
涵泳仁惠恐重一方而遺天下簡注已久佇聆環召禹  
來入拜剖麻垂副公論疏遠無似拜遊台光薦更晦朔  
日竊洪蔭叨守微職瞻望大府遊在雲漢自顧分守有  
等不敢頻貢柔函上浹威重惟依歸仰慕之心無日少  
替伏惟薰慈曲垂照卹

某屬邑下吏猥有驅策峻行約束貶損道德謙墜台翰



非所宜蒙拜賜之寵感作不容於心區區毫楮莫究謝  
臆

上太守劄子

某蹭蹬之跡竄伏田畝殆二十年而得竊食蓬山驅馳  
之官未及弛擔已被黜逐自是益知賦分蹇薄誓入深  
山與田夫野人雜處以待老死邇者又蒙諸公憐念俾  
承乏邊壘恩德甚大然某幽棲之志志已成伏臘之計已  
足諸公憐恤之恩反為山林曠寂之擾矣到官便丐祠

祿計不出初秋必遂解綬以去未即詹奉實勤向仰惟  
幾為時調節首鼎以保四海顯顯之望

仰惟台座從容禁近忠言嘉謨所以裨益宗社大計無  
愧前哲凡所論奏措紳傳誦某雖在山林頗聞一二竊  
為吾黨賀矣蜀西南奧壤人材生於其間彰：見于竹  
帛者世不乏人而台座仁義積蓄于中猷為著見于冰  
以是進退誠可以繼前人之雅踐為後學之賢規此某  
所以欣躍而贊誦者也伏承涓言褻帷已詣開府伏審



即日為况無不佳勝台座以降重之望侍從之責俯臨鄉郡想見一笑一頓無非豈弟之澤未召還間或上章丐閑優游林野以須旌車之召以全出處之節在台座可謂綽綽有餘地矣某豈勝歎慕之情

某往者備員萬州南浦縣令台座還自東南天與厚幸邂逅獲識英表自此夤緣雅辱眷照殆三十年矣社門窮居人事廢絕所以聲聞姓名不至記史已深愧負至于台座入踐華貴聲光輝赫某猶不敢以尺牘涸免者

竇以台座知識布滿海內蜀之朋從親舊比比皆是孰不仰下風而望餘澤者某一意田畝無所希求不敢復自贊其因窮與諸人雜陳于聽覽重為煩溷仰惟高明必能深賜體照

上王帥劄子

某竄伏草茅于台座初無一日之雅摠以虛疎過蒙知遇茲者千里趨瞻若無一言備芻蕘之詢殆非門下所以深知之意某竊見台座決遣兵民之務明敏如神初



不妨閒燕無廢嘯歌惟威德謙尊凡應接賓客待遇僚吏過為委曲優厚由是政事之際略無閒閣清暇之際夫用約則心靜心靜則神生然後慮遠而見微且全蜀大計甲兵財用雖非全寄于台座而保固根本彌縫間隙使主財用者有所賦取主甲兵者有所仰給如主餼容如母乳子則所係在台座者亦既甚重而其間事機有藏于冥冥非但耳目之所常接朝夕之所常行者便為保蜀之樞要也惟備常禮以隆安際使禮簡而情親

委細務以屬賓僚使體大而綱舉然後以靜制動而常靜以安圖危而常安易之繫辭有曰精義入神以致用古之聖賢立事建功悉本諸此伏惟少賜留神幸甚

上太師詩文劄子

某具中稟自恭想已徹鈞凡華年災厄瀕於死所遇病悼少定向能用意翰墨事與其藉予以見古人豈如獻之師席亦足以知名人雖發而學不敢廢庶幾無負平生教載獎與之恩有詩文各一通謹致帳下某干冒鈞



嚴無任震懼之至

上大觀詩文劄子

某先申稟目伏想已闕記室之下某病悖呻吟中獨未  
廢筆硯輒以詩文一通塵汙鈞几大政之暇一賜覽觀  
尚以為可教則某不但用以藉手見古人矣無任愧懼  
依歸之誠

畫一稟目

上都運咨目

劉夷叔

一秋氣澄清下審某官即日台候何似

一某仰惟恩府恭儉之資清和之氣神明所加為福星

照臨分野歌嘏之相不待禱祠而來矣

一某違去左右倏經九夏雖山河修阻而眷戀門牆之  
篤夢寐似之

一項者恩府初度之月某常申祝延之意發為歌頌馳  
介以贄恭惟謙抑過自貶損不見收納區區無能自通  
情之殫越無以為諭



一某羈窮流困之跡固嘗陳于執事者之聽不待申說而見近者劉掾之歸首言先生所以要慰調護之意甚悉先生于人舊而日深士是以附某嘗論之士大夫聞以聞為寬鄙敦薄端在于此今誠不敢私自為幸請為門下之士賀之

一僭易有說南平之次正有二年一日罷此如魚脫網是時必將赴訴門下仰于調護然而重見煩瀆又須少勞神觀誠蒙門下始終憂恤願令見安于此稍近闕赴

官之日其為恩紀當有可報廉損以之

一仰惟盛德方興閭閻長幼宜均備福

一區區敢乞驅策一一以見報効之意

一某未恭侍間仰乞為國為民善自保重以須大用



五百家播芳大全文粹卷六十二

國家圖書館 NATIONAL CENTRAL LIBRARY, TAIWAN, R.O.C.





五百家播芳大全文粹

宋魏齊賢等 全編

卷六十三

尺牘

郭祥正太傅回帖

王荆公

得與存問區區哀感所不可言示及詩篇壯麗後傳乃  
能至此良歎駭也輒留巾醜永以為玩山色少事不足  
以煩剝治相理暇日足以吟詠無緣一至左右惟自愛



重以副向往之私幸甚

罪逆餘生奄經時序咫尺無由自訴伏承存錄既以詩書不勝區區哀感詩已傳聞兩篇餘皆所未見豪邁精絕固出于天才此非力學者所能逮也雖在哀疚把翫不能自休謹輒藏之中匣永以為好也知道引事稍熟希為人慎疾自愛幸甚

承示新句但知嘆愧子固之言未知所謂豈以謂足下天才卓越更當約以古詩之法乎哀荒未能劇論當俟

異時耳聞有殤子之響想能以理自釋情累也其罪逆荼毒奄忽時序諸非面詠無盡近承屈顏殊不得從容奉顏色遽此為別豈勝區區愧恨乍遠千萬自愛承行李朝夕當復來此諸須面訴乃悉許詩不惜多以藁副見借為幸

比承手筆尤劇欣慰時序感心不能自釋咫尺無由奉見嚮往尤深蒙許寄詩幸甚尚此留連不惜數賜教也冬寒自愛舍弟近出歲盡乃歸承書所以不得報也



與錢舍人

比日前聞君倚有滁州之命某是時已入四章求自點  
若訟君倚以言獲罪不當如此之重乃是自為道地也  
以此不敢與君倚同謫而已至今尚未得請欲留則不  
得曉夕皇皇橫身無所仰視君倚如仙者輕舉計君倚  
亦不用此戚戚也以著令不得躬往致錢

與邱殿丞

孫元規

奉別逾紀疎于附問企渴何言人至承惠字及著文足

見智者用心之遠而思功及物也歎服才識故非一日  
矣某居憂三四年間病自今春方有生意朝廷不知累  
被恩命切切辭免未能決去自重任本差來江西湖南  
撫慰士民中途改往廣南衰病之軀加以奔馳祇增舊  
疾不能保天年何暇賊盜為已三次上章求免未蒙允  
許必須至勤切祈于得請矣觀足天下之文病者安敢  
承當他人事不免與余揚同其道矣少年時無病尚可  
驅策如今何為伏乞保愛草草上聞不宣



與張安道尚書

曾明仲

拜違風儀三換歲律而久不上記蓋無因而前惟乃心馳仰之勤耳中春氣和伏惟鎮撫多間尊候禔福數年均佚應道氣增茂上方注意以待康濟尤願為時自愛不宣

與張安道尚書

蔡君謨

違去門闌之日滋久近得還都以舊疾未平加之人事故踈馳問瞻跂風采不勝傾繫氣候寒凜伏惟鎮撫藩

園神體休泰某叨此計局通流之術本非所能超據要地第負兢悚日祈柄用以比未游區區下誠莫由敷叙不宣

與陶講書五帖

胡武平

自抵治下私門多故重迫曹事胷中無竒親友書音俱成緬默日者清馭臨既鄙州喜見時髦甚乏主禮睽遇之後聯獲二牘納之中匭猶諸隋和英文祭然難于裁答逋慢之罪實因于此仁者尚恕應不相索于竿牘之



間也早景已暄孝履何似惟願順納真粹慰其區區謹  
奉手啓述謝不宣

反臂相失歛然十旬既留家居密邇疆候相望文繹香  
不可得宗人節推至首訶宴且承襟味恬適得所賦  
手筆情辭周洽履尚謙挹奉戢來睠相期晏歲未諧清  
集勉旃居易不宣

不敏無似向者承人之乏假守湖上足下不屑僻陋翻  
然賜臨樂與諸生傳經駕說相從方社彌年于茲比奉

更書違去清集留戀時哲抵攪心曲

去雪之日特勞訪別忽爾相失愴然久之便道過家煩  
書移疾書牘並廢行李見過首蒙惠聲遠尋前好情義  
之厚奉戢敢忘會面未階求志無悶少需善價自愛良  
璞不缺中間公皂至特辱手筆郵問甚

厚感戢無量素性鄙朴缺

在煩寃益以逋慢

修答良晚寓慚靡所竊惟講習無廢納歲貢部之情朝  
夕當報言念明哲藏器已久策取高第先鳴諸子在此



興寢百順不勝慰刻兼承去冬服藥多日尋慶康裕少  
便有失上問甚以為愧氣候微煩更冀順時將重

與陳修撰六帖

蔡君謨

向觀除目承有江西之行適奉手牘暫還姑蘇水行數  
日無緣接盃酒通殷勤甚悵然也涉秋浮江景氣澄爽  
發人清思循行之外吟詠為適仕宦豈尋常之所汨隨  
寓自如乃是了達也南都食物可以奉親但胡公來緩  
當阻汲流暑毒甚道中多愛不宣

前日匆匆為別悵悵茲甚比聞汴流尚阻行舟高懷豈  
不少興滯流之嘆耶送行詩卷暫借一觀方敢抒思也  
日夕為文字繁冗未果再詣傾渴傾渴

蒙書知小疾未康更須攝護拙詩今附本通呈希賡屬  
為幸缺 法醞輒寄獻左右謾試看如何勝之但誇越

之閑靜非錢缺 若無病真蓬萊主人久雨稍霽清  
寒薄人願葆愛

蒙惠茶數品皆精奇適會君倚庶子泉來輒烹試之恨



不同啜也西湖寒食清明州人游從衆為盛集數日為之達暮或聞缺

俗亦如此然越中舟舫鮮明殊為

冠絕執事能為之出游否衰病作少年事亦難勝矣

違別未幾復見歲道每懷辨論馳情南國承書副以佳菓珍荷擲得雙井四兩其時人還未試叙謝不悉尋烹試之香色氣味皆極精好是為茗芽之冠非日鑄寶雲可比也雪寒省中頗增清興

端午氣候微熱想君執事安否殊慰傾素惠及卧龍珍

茗猶在日鑄之上頃年曾得日鑄其品甚高今之造茶者不及曩時卧龍前無此等非精意不能至此也春三月湖上閑游時有篇什今錄數首要知隆老尚管風物乎

與吳副樞

蔡君謨

違別台座今已累月瞻望之素不忘朝夕伏惟涉江以來起居萬福某留邸中僅兩月今方東邁益遠聲采惟冀視政之外順時自重行歸大用以慰瞻望下情無任



區區之至

謝張學士

王荆公

不肖學不得盡意于文章仕不得行其所學苟居竊食  
動輒愧心而世之同好惡者已云少矣過足下于此最  
為相盡義不得諱其不腆之文過蒙推褒非所望也朋  
友道喪為日久矣以某之不肖行于前而悔於後自己  
為多矣况足下之明耶每望教督而終未蒙惟足下不  
遺以朋友之義也見存不勝幸甚更數日遂東去千萬

自<sup>愛</sup>不勝思懷也



五百家播芳大全文粹卷六十三

國家圖書館, NATIONAL CENTRAL LIBRARY, TAIWAN, R.O.C.





五百家播芳大全文粹

宋魏齊賢等全編

卷六十四

尺牘

與益秘書三帖

到郡匆匆欲一詣邑得奉見尚未果伏惟動止萬福歲  
饑如此幸得賢令相與為治宜不至有失所者然聞富  
屋之藏尚有所潤而未發者竊以謂方今之急閣下宜



勉數日之勞躬往隱括而發之裁其價以予民損有餘以補不足天之道也悠悠之議恐不足恤在力行之而已不知鄙見果可行否希一報有以教幸甚幸甚自京師奉別於今已八九年事物之役無少休息時不得馳問但增勤企忽得書乃知尚滯下邑幸得會合歡慰亡量顧惟忝一日之雅而以公函見賜慙忤不知所謂也拜見在邇千萬自愛

幸以一日之雅而每辱以公禮見加非所望也蒙諭具曉盛意舉監若行辭不難也至於閣下治行自謂諸公所知不患無知己也惟以道自釋餘留面究也蠶麤之入今歲如何邑中幸得賢令仁政佐治之所及竊以為慰

辱手筆感慰跋涉溪山之遠亦老矣然足以慰嚴邑元元之望惟寬中自愛也人來還急修答不謹幸見亮有不逮見教

與錢待制十九帖

蘇東坡



兩日不奉接思仰不可言既無緣往見空致手啓以為  
無益而煩還答故不復講日間府中僚佐知小疾漸復  
常又得手教有作詩興甚慰喜也詩納去如蒙和何幸  
如之諸公詩無他本却乞封示旦夕朝會必遂款話不  
一  
朝會踈濶遂不獲際見企渴可量歲律就盡殊無以為  
樂甚惘惘也此日起居何如中前云今日當見過若果  
耳人回略諭當不出也或未暇亦不敢固屈匆匆不宣

兩日不果詣見傾仰不可言乍涼台候勝常承已拜命  
正得所欲相愜雅懷但朋友懷公之去不能無惘惘然  
似聞明主知照極深其他想不復計較也明日後日皆  
休務可以往謁而魏郎將出不可遠去過此雖此假日  
亦可以因訪僧郊外得邂逅也想公行李亦不即辦當  
少留耶冗中奉啟不一

會稽平日欲乞豈易得哉小生奉羨之意殆不可言然  
亦行當繼公也舍弟差闕下試官不及奉啟計其出公



未行也餘非面莫究

倩仲蒙仲昆仲不克一別意甚不足侍奉外千萬珍愛  
蒙仲更礪賦筆遂取魁甲至望旦夕入文字乞郡江湖  
之東行亦得之但恨會稽為君家所奪耳呵呵

令子至出答教感慰良極乍冷且喜台候康勝此行知  
適所願但有一事當在意者梅月宜頗居高燥郡中常  
所偃息處皆宜易新贊也餘具令子口白某意在公流  
揚楚不可得潭洪亦所樂也

川公服一段茶兩團酒二壺蜀紙三百幅聊將區區恕  
其浼瀆

子由試院來日出或能一見子容諸公欲二十日出餞  
公已出城莫須少留否

別後書問簡廢到官百冗未皇上狀先枉教墨得聞皆  
起居住勝感慰兼集聞坐嘯竟日益公綽豈可屈在滕  
薛而衰病坐苦煩劇當易地而後安又天官司徒皆闕  
人當令公厭事矣大熱不可出初到畧須鋤治紛紛湖



山咫尺尚未見也思企談笑起望西興藹藹若聞警聲  
刻尚冀珍衛少慰區區不宣

路中見三郎甚安渠道過瓜洲復來相見江口恨不款  
曲然亦被捉住寫數紙東來作絕不作詩公必富作何  
不寄示聞公今年造茶奇甚願分絕品少許子由遂作北  
扉甚不皇方詞免也兩小兒迨過在此邁此月當替非  
久亦此來承問及感感四郎及諸季各安未及書也  
久不春書忽辱教字并次公具道盛意并增感作比日

起居佳勝兩邦相望哀拙自知常有絕塵之嘆惟腰脚  
蹠跚畧不相讓可發一笑也近亦漸平復惟用溫補藥  
頗覺宜人聞公每用撲硝大黃晝夜洞下乃愈此豈衛  
生之計哉願於不發時常進一溫平藥令不發為佳然  
以發想亦非下不愈也無由面盡臨紙惘惘

惠人來辱書且審比日起居清勝知暫在吉想無苦恙  
聊欲閉閣宴坐耳求紫雪納雲五兩去尚有數兩不欲  
多馳去中年豈宜敷進此藥乎相望雖咫尺所欲言者



非筆舌可究時登中和東廡望西興屋瓦可數相思何窮子由本欲請外覲得公處今又北扉此論謬悠矣公簡上心豈能久外耶餘熱千萬為國自重不宣

日望來音此懷可知歲暮寒慘起居何似通簡既失必降劄子歲前可得迎見否未間伏惟為國自重冗中不

一

某在杭雖少勞而意思自得此來極安逸然多憂愧想識此心也只在興國浴室獨居大暑中殊清也蒙仲在

公翊所見之公翊今得符離不知當同往否承辟召小兒感戴不可言得否猶未可知也浙西水災殊甚已差岑楊二君朝論甚留意救卹也知之邊上秋熟可慶可慶

數日不接奉渴仰之至苦寒起居住勝欲見近歲天下戶口數口為錄示早得為佳不知幾日與頴叔仲至見臨匆匆不宣

久別傾企辱書乃知舟御在此起居住勝甚欲少留以



須一見而舟人以潮平風正當速過遂且渡承諭當復來會豈當重煩從者匆匆不宣

尊文台候計安聞甚樂會稽不知有書見賜否某又上缺  
輕大江重相別誰如君者此意豈可忘耶然迫夜涉險悔不堅留君一宿也二軸漫寫數字付來乍遠千萬保愛不一

前日作米元章山研銘此研甚奇得之於湖口石鍾山之側有盜不禦探竒發瑰攘於彭蠡斷鍾取追有米楚狂即盜之隱因山作研其理如雲過揚且申意元章求此研一觀也

與文王十二帖

蘇東坡

榜下一別遂至今矣辱書感歎且喜尊體佳勝到岸即上謁可如數卒否餘當面既不宣

昨辱教不即荅悚息悚息經宿尊體佳勝見召敢不如命然瘡癩大作殆難久坐告作一肉飯竟且移舟池口矣山婦更煩致名刺感戴不可言謹奉啓布謝不宣



久留治下以道舊為樂而煩亂為愧數日尊體如何漕  
車即至不少勞乎永日如年念公盛德不去心所要作  
字為瘡腫大作坐卧楚痛容前路續寄也不罪鄭令清  
苦無援非公誰復成就之某造次瘡病無聊不盡意惟  
萬萬以時自重  
昨辱惠書伏承別後起居住勝某到金陵瘡毒不解今  
日服下痢藥羸乏殊甚又不敢以留來人極愧草畧餘  
熱萬萬為時自重

書已領跋尾剪去極不妨然何足取也愧愧通判大夫  
甚欲寫一書乏力不果乞道區區

去歲入還奉狀必達爾後行役無定遂闕馳問比日不  
審起處何如某忝命過優非許予之素何以及此無緣  
面謝重增反側酷暑更祈順時為國自重謹奉手啓不  
宣

寓白沙須接人而行會合未可期臨書惘惘見張公翊  
出清溪圖甚佳謝生殊可賞想亦由公指示也曾與公



王荅家報書大全文粹  
胡作清溪詞熱甚文多未暇錄去後信寄呈也睿達化  
去極可哀雖末路蹭蹬使人耿耿然永此才韻豈易得  
哉雲巢遂成茂草言之辛酸後事想公必一一照管也  
匆匆揮汗不復盡意耳

冗迫久不上問辱教承起居住勝感慰兼集違去忽兩  
歲思仰不忘每惟高才令望尚滯江湖豈勝悵惘不肖  
忝冒過分重承成教禮當占詞布謝數日以病在告使  
者告回甚速故未暇也不罪不罪酷暑方熾千萬為時

自愛

伏蒙賜教恩勤曲折有骨肉之愛蒙世不比數何以奉  
承此歡懷藏感愧大不可言累日眊眊溷煩仰荷眷與  
不見瑕疵又飲食之及其可餉酒分醢蒙被無已之惠  
益多愧耳謹奉狀稱謝春寒伏冀調護眠食以須寵光  
道出貴郡迺獲淹觀風度實慰從來伏蒙大雅開接甚  
厚小人何以得此薄晚奉被賜教存問幸甚拙於謀生  
至煩地主餉米感愧匆匆稱謝不宣



經宿伏惟尊候萬福此欲奉承勤款教諭屬以風靜江  
平伯氏堅約來日解舟不審能曲聽否得指揮今日得  
券給米來旦得護兵聽行以慰伯氏之意何幸如之謹  
咨稟左右皇恐皇恐

昨晚風靜遂解舟泊清溪口道遠不能入城觀隨車歌  
舞之盛徒對月飲酒想見風度耳經宿不審尊候何如  
伏惟萬福未申間泊銅官古縣蕭索尤思仰緒論謹奉  
狀承動靜率易皇恐

與馮叅政四帖

歐陽永叔

自成書請外所陳哀切冀以危誠有以感動而二三公  
過為顧慮曲以見留在意實厚於計則非便也奈何奈  
何本欲為郡下客少溷主人復未可得然使少遷延終  
當必償夙志也濟叔窮居得當世在鎮必以慰意不久  
當應稍起此訟議久所蔚蔚也前承惠碑多佳者甚濟  
編錄感幸感幸聞金陵人數廳梁陳碑及蔣山題名甚  
多幸為境內所有博採以為惠實寡陋之益也病暑草



率

區區久闕致問中間辱書為感何已冬寒伏惟台候萬福某以衰病思得一小郡養拙三二年間謀一歸老之地此願未獲遽被責以吏事精力耗竭何止勉強不出歲末春初到江西之行矣薛親幹敏河東風土民間事緒可以詢問得候幕府甚幸甚幸某以目疾為梗臨紙草率惟冀鎮撫外以時為國自重

承惠寄碑刻既博而精多所未見寡陋蒙益而私藏頓富矣中年早衰世好漸薄獨於茲物厥嗜尤篤而俗尚乖殊每患不獲同好凡知所惠僅得二三固已為難而驟如是之多宜其如何為幸也濟叔公議猶屈乃吾徒之責未嘗少忘於懷而造物者第與衆人同為嗟嘆之而已豈賢人君子亨否有命殆非人力能致耶雖然敢不竭力辱諭感愧承專遣人至數召問其還期每云有故未歸遂且於郵中附此候渠行別當奉狀也

昨自罷煩劇卜居城西少獲休息然有此盤植未遂大



去正以唐史將遂終篇然亦不過秩末時事耳廬去京師不遠計可備聞難於紙筆且道也當時據名藩優游文史自足為樂其餘一付公議但朝多賢士而獨在外與相知之私立欲公來歸之速耳某衰病俱攻去心甚速諸公察其實然而未肯決然放去奈何奈何原父雖歸子華作憲朋從益蕭索當世尚壯及時讀書行樂此外稍隙時當得數奉問大熟更冀自重

與李龍圖

文潞公

某啟孫女子奉事高明舉家慶幸然以幼稚未閑禮則冀垂慈比李郎以去試有期欲且留京宅隸習兼聞已得訓旨許之幸甚餘必李郎書中具道茲不云云

與錢穆父待制七帖

蘇東坡

遠接人未到闕書吏止用手狀達誠而已亦幸仁明不深責也久留吳越謠頌藹然想不日召還密近幸益為民自愛迫行冗甚不盡區區到官別上問也親情柳子立秀才寓居屬部或去相見畧望與進幸甚



辱簡承起居佳勝示諭容面白正苦暑不能坐近夜稍涼訪及為幸不一

奉書不數然日聞動止以慰饑渴比來台候勝常秋高諸况必佳大閑逸否某五鼓輒起平明亦無事粗得永日嘯詠之樂今日重九一樽遠相屬而已新詩必多幸寄示乍冷千萬為國自重不宣

兩日不接奉思仰不可言雨冷起居佳安昨日小詩與通叔為戲重須屬和感服可量來日無會可以何處相

聚退之所謂此日足可惜願未遽相別也不一

漕任雖非衆望然有一事有望於公浙西流殍之憂來年秋熟乃免日月尚遠恐來年春夏間可憂賑之則無還貸之則難索皆官力所不逮惟多擘畫使數郡糶場不絕則公私皆蒙利事甚易知但才不迨且無是心敢以累公况扮榆所在當留念也

今日早不免謁告今已頗安來晨幸同穎至二公臨訪早屈為佳不能遍致簡恐煩回答只告穆父轉呈也



經宿台候萬福十日之約却為昨晚奉教旬休致齋翌日定先此事須至退日慙悚不已一會何微末而艱故如此乃知永叔鼎羹之句真非虛語公轉呈穎至二公此簡芭蕉之謂不能逃也呵呵

與張安道二帖

蘇東坡

雪後苦寒遠想燕居恬適台候勝常某以獨員冗迫久缺上問計蒙矜恕歲律行盡展奉何時尚冀順時保頤益永眉壽下情禱頌之至不宣

某以不善俯仰屢致紛紛想已聞其詳近者凡四請郡杜門待命幾二十日文母英聖深照情偽德音琅然中外聳服幾至有所行遣而諸公變和之數日有旨某與言者數君皆促就職明日皆當見蓋不敢堅卧嫌若有辨曲直者然哀病旅拙度不能久此恐不遠當復申前懇耳蒙知眷之深不敢不盡幸為密之禱急多忤有愧教誨

與王副樞

文潞公



遠承惠書深諒勤厚感刻感刻履道園宅春物甚盛東  
牀居之頗遂安逸光化想已赴官披見末期切希以時  
自厚

與尹師魯

歐陽永叔

兩路地壤相接幸時文字往還然缺附狀蓋書生責以  
錢穀強其所不能自然公私不濟况其素懶於作書也  
然時聞師魯動止蘇子美事深欲論叙但尚猶豫聞有  
極言乃知自信為是甚善甚善子美雖未極履有如排

沮郡議其益不少晉路師魯少所樂遊其况如何春寒  
千萬保重

與劉厚之大夫二帖

蘇子由

北歸至許已半年餘但未嘗作部下相知書故音問缺  
然想不評也近承惠教具審起居如宜奉別之久企仰  
何勝千萬順時自重區區不宣

先公深有謙德不欲請謚自是高節朝廷不忘舊德舉  
行典禮亦是美事君臣各伸其意兩不相妨至於厚之



內承先訓不敢陳乞因有君命不敢隱藏行狀進退合  
禮更無可疑若考功再有命即錄與也况太常博士宋  
景年考功高士英皆佳士銳意譔述幸勿疑耳宋高二  
君皆當執筆者恐息

與秦祕校二帖

蘇子由

昨日辱迂步迫晚不果從容良以愧感新詩益清麗可  
愛不肖者何足以當之欽佩欽佩天寒欲雪為况佳否  
前日不果從容承誨示重感怍也新詩飄然益見高興

但不肖者頗愧虛辱耳何時能再枉教庶更卜清論也  
頌企頌企

與孫學士

韓持國

昔日大帥過都某以典護藩客不獲畧奉言論逮至已  
事之日又值風駕首途欣慕之誠莫伸萬一悵悵懷戀  
豈勝鄙懷敢意下車之初先蒙暇教為現在謙德雖至  
而使罪戾益深愧懼叢併未易殫叙新秋餘暑伏冀為  
國自重少慰翹祝之想



與李舍人

韓持國

老拙多病人事都廢乃蒙不遺猥枉書誨佩服故人厚  
意何可勝言伏惟即日動履清安修謝後時諒蒙恕察  
春暮雨寒尤希慎疾愛重

與范堯夫舍人

韓持國

久別未嘗不思仰忽承有宮臺之請冀望車騎得還里  
中日夕相見遂之西洛不獲悵然春氣暴暄尊候何如  
堯天高才達識賢士士大夫望君進在朝廷以申遠業

而又屈閑官徒增歎息耳末由欵接千萬自愛  
前問已悉堯夫高遠已有所見失子之悲無可奈何當  
勿久留於胷中人生如幻自是吾身朝暮不測餘曷足  
道耶入洛見諸公當可開釋方事閑適惟保護為善

與邱道源寺丞二帖

祖擇之

去冬暫到闕下雖畧獲展晤然以人事紛紛不果面別  
可量悵悒耳近承有黥歛之役事出意外令人驚嘆不  
已忽辱手教乃知舟馭取塗敝邑蒙犯隆暑衝涉良苦



即遂占對實慰牢悃兄迫中 缺

過當

非敢望於故人也 不敢眠此以為報

祥除伏惟尚有餘慕知有所諭者恨未見之雖賴 缺

疾憊弃日茫然未獲奉并惟冀愛重

承誨示勤勤豈勝感愧聞有太原新除不知果成行否  
想遂治裝而西也示及法界觀文字輒留玩讀研究義  
味也觀身與世如泡夢幻若不以此洗心而沉於諸妄  
不亦悲乎相見無期惟割磨世習共進此道則雖隔濶

常若交臂雖衰疲惜耗敢不免此猶冀未死問或得晤  
語以究所懷未耳良食自愛令弟想各安裕必同西上  
也惠及海物愧荷不忘村落無物可以將意粟二菴馳  
獻某今年雖無病年彌高矣衰亦滋極稍自勞動便不  
支持向著字說今已成就幸未得致左右觀古人多寓  
妙道於此所惜許慎所傳止此又有偽謬故於思索難  
盡耳

與呂吉甫參政二帖

沈文通



金山得所寄詩不及答但有愧服閣中愛子並想全安望亭之行在早晚耶因風寄聲為慰幸甚幸甚糜角某在抗越三年海上遍訪不能得乃知南中山澗淺偏不容此大物聞荆湖最多已作書澧州求矣到當奉寄京師有所要一一示及無外無外

示及新篇君詩固佳矣然此篇又超逾前後乃用意之至者也欽歎無量本欲作一篇看此次第更如何下手也忽忽猶可恨者書未佳耳呵呵示歌圖領之至樂而

寂室二詩賦成即往但未讀者必先二記則詩其可復取耶

與范文正公

曾公亮

拜遠風儀三換歲律而久不上記蓋無因而前惟乃心馳仰之勤耳中春氣和伏惟鎮撫多間尊候禔福數年均佚應道氣增茂上方注意以待康濟尤願為時自愛不宣

與韓公八帖

文潞公



違丰儀日深翹想才薄仕重解暇寄誠向審被命中宸  
剖符缺

視時屢欲修慶幅以伸區區

之意因循多故乃草率勒此伸謝諸留面究

繼日猥冗未繇上謁累辱簡誨荷德良厚秋氣頓爽起  
居住裕江朝之會傾俟臨况幸無見拒謹具手啟以代  
面叩

累日人事紛紛無少暇遂疎問起居其瞻嚮之心旦夕  
以之也介至得手教承履尚清勝慰怍良深所須舟如

嚴旨遣去睦婺書亦聞命矣京醞一壺納上希檢到勿  
訝輕浼匆匆奉啟不謹昨日辱手筆未皇裁謝人來又  
沐教况無任感愧之至經宿伏喜起居住裕來晨欲奉  
邀車騎就祥符寺早膳傾佇屈顧也寵惠聶先生傳不  
勝感著

信宿伏想起居均適陸欵書三通謹令納上介亭之會  
卜日咨聞次傾渴傾渴

近日繼有使客雲集良苦於將迎也職此久不果往見



長者瞻企之素可勝道哉兩寒起居佳否適有客見遺  
糟蟹輒敢分獻以佐紫杯望賜檢納旦夕稍暇即躬造  
門宇次早來改朔不果候謁人至特沐手誨竊喜起居  
清勝卑體瘡瘍所苦如昨曲煩憂恤至感至感所惠藥  
不住服食次忙冗草草上日以賤事無緣一往少奉長  
者餘論可量邑邑耳兩寒伏喜起居佳裕稍暇當卜候  
謁人次臨紙不盡所懷明哲亮之而已

連日冗迫遂疎上謁前辱簡誨不獲裁謝當蒙情恕之

也兩寒體中佳否收得貂鼠褥一領輒敢馳獻以將下  
誠望賜檢納容易

早來辱示手教伏承齋舸出次外聞乍遠風度豈勝依  
依屬以賤事所嬰不獲躬詣江涘叙別可量情邑耳春  
寒途中千萬珍重

兩日前湖上幸獲款奉自爾以冗迫更疎占對豈勝瞻  
嚮之素伏承教况仍示佳什感仰不已已也如聞玉體  
小有違豫應諧樂喜矣未皇再造舟次姑勒此少布謝



萬一秋暑惟冀寬中自愛

與王定國十九帖

蘇東坡

自到黃州即屬岸人日伺舟寓消耗忽領手教頓解憂  
懸仍審即日體氣清強且能自適至慰知未決東西路  
計其迂直嶮易想去必不甚懸絕而得一見乃是不肖  
大幸不識果安從某寓一僧舍隨僧蔬食甚自幸也感  
思念咎之外灰心杜口不曾看謁人所之出入蓋時在  
村寺沐浴及尋溪傍谷釣魚採藥聊以自娛耳

罪大責輕得此亦甚幸未嘗戚戚但知識數十人緣我  
得罪而定國為軾所累尤深流落荒服親愛隔濶每念  
至此覺心肺便有湯火芒刺今得奉教既不見棄絕而  
能以道自遣無絲髮芥蒂然後知定國為可人而不肖  
他日猶得以衰頽白髮刷賓客之末也甚幸甚幸恐從  
者不由此過故專遣人致區區惟願定國深自愛重乃  
以戒我者自戒而已臨書悒悒不知此人到江猶及見  
仙舟否匆匆不宣



揚州侍其太保者官於瘴地十餘年北歸面色紅潤無一點瘴氣只是用措脚心法耳此法定國自己行之矣請加工不廢每日飲少酒調節飲食常令胃氣壯健安道軟朱砂某在湖州服數兩甚覺有益到彼可久服子由昨來陳相別面色殊清潤目光炯然夜中行氣臍腹間隆隆如雷聲其所行持亦吾輩所常論者但此君有志節能力行耳粉白黛綠者但是火宅中狐狸射干之流願深以道眼看破此外又有一事須少儉嗇勿輕用

錢物一是遠地恐萬一闕乏不繼二是災難中節用省貶亦消厄長福之一端所懷千萬不盡一二也

今適中領手教知到官無恙自處泰然頓解憂懸又知

攝二千石風采震於殊俗一段奇事也某羈寓粗遣但八月中喪一老乳母子由到筠亦拋却一女子年十三矣悼然未衰復聞堂兄中舍卒於成都異鄉罹此觸目淒感奈何近頗知養生亦自覺薄有所得見者皆言道貌與往日殊別更相關數年索我閩風之上矣兼畫得



寒林墨竹已入神品行草尤工只是詩筆少退也不知何故張公比得書無恙但以厚之婦家事無人頗牢落子由在筠甚苦局事煩碎深羨老兄之安逸非久冬至已借得天慶道堂三間燕坐其中謝客四十九日雖不能如張公之不能語亦常闔戶反視想當有深益處也定國所寄臨江軍書久已收得二書反復議論所處憂患者甚詳既已自解又以洗我昏蒙所得不少也然所謂非苟知之亦允蹈之者願公常誦此語也杜子美窮

困之中一飲一食未嘗忘君詩人以來一人而已今見定國每有書皆有感思念答之語甚得詩人之本意僕雖不肖亦嘗庶幾彷彿於此也文字與詩皆不復作近為喪老乳母作一誌公又求某書輒書此奉去今日馬鋪李孝基送君謨石刻一卷其末後有定國題其字又動我相思之懷作惡久之數日前發勾涇達過此亦云與定國熟船中會語半夜強半是說定國近有人惠大丹砂少許光彩甚奇固不敢服然其人教以養火觀其



三才圖會卷之六十五  
變化聊以聒神遣日賓州去桂不甚遠朱砂若易致或  
為致數兩因寄示稍難即罷非急用也窮荒之中恐有  
竒士當以冷眼陰求之大抵道士非金丹不能解化而  
丹材多出南荒故葛稚川乞岫嶠令竟化於廣州不可  
不留意也陳璞一月前直往筠州看子由亦粗傳要妙  
云非久當來此人不惟有道術其與人有情義久要不  
忘如此自亦可重道術多方難得其要然以某觀之惟  
以心閉目以漸習之但閉得百十息為益甚大尋常

靜夜以脉候二三十息爾數為之似覺有功幸信此語  
使真氣運行體中瘴冷安能近人也知彼有殺賣鵝鴨  
甚便此間無有但買斫鱖魚及猪羊麋雁亦足矣廩人  
雖不繼痛自節儉每日限用百五十自月朔取錢四千  
五百足繫作三十塊子掛屋梁上平明以蓋杖子挑取  
一塊即藏去杖子又以大竹筒別貯用不盡者可謂至  
儉然猶每日一肉蓋此間物賤故也囊中所有可支一  
歲以上至時相度目下未須慮也兒子正如所料不肯



出官尋以公言諭之亦肯去來春令赴銓斲黃間一官  
非復小補也信筆亂書無復倫次不覺累幅書至此恰  
二鼓書室之前霜月滿空想識我此懷也言不可忽惟  
萬萬保齎而已挂砂如不難得致十餘兩尤佳如費力  
一兩不須致也如聞晉卿已召還都月給百千其女泣  
訴聖主為惻然也恐要知來詩愈深欲和又不欲頻頻  
破戒自到此惟以書史為樂比從仕廢學時少免荒唐  
也近於左側得荒地數十畝買牛一具躬耕其中今歲

早米貴甚近日方得雨日夜墾闢欲種麥雖勞苦却亦  
有味鄰人相逢欣欣欲自號麀糟陂裏陶靖節如何君  
數書筆法漸逼晉人吾筆法亦少進耶畫不能皆好醉  
後畫得一二十紙中時有一紙可觀然多為人持去於  
君豈復有愛但卒急畫不成也今後當有醉筆嘉者聚  
之以須的信即寄去也耕田詩中有云家童燒枯草走  
報門井出一飽未敢期歌飲已可必又有云刮毛蟲背  
上何日得成蠶此句可以發萬里之笑也故以此填空



紙

今日景繁到泗州轉示十月二十三日所惠書并新詩  
六首妙曲一首大慰所懷河凍膠舟咫尺千里意思牢  
落可知得此佳作終日喜快懣懣冰解幸甚幸甚某在  
揚州入一文字乞常州住得耗奏邸拘微文又不肯投  
進已別作一狀遣人入京投下近在常州買得一莊子  
歲可得百餘石似可足食非不知揚州之美窮猿投林  
不暇擇木也

久不奉狀辱書感謝之至此日起居何如謗熖已息端  
居委命甚喜甚喜然云百念灰滅萬事懶作則亦過矣  
丈夫功名在晚節者甚多定國愧古人哉某未嘗求事  
但事入手郎不以小大為之在所施亦何足但無所愧  
而已蒙示諭慙汗若使定國居此所為便當驚人亦豈  
特止此而已本州職官董華密人也能具道公政事歎  
服不已但公命未通耳但靜以待之勿令中途齟齬事  
自然獲濟如國手不須大段用意落局便須贏也未由



會面千萬保重不宣

領書所以教諭之者備矣佩感之意非書可盡謹當遵用然所云先發謝章不待到任私意不欲爾也謝章有過無功而禮不可闕到任一章足矣空言不足止報萬一徒為紛紛耳諸公啟事自到後一發亦備數而已謫居六年無一日不樂令復促令作郡坐生百憂正如農夫小人日措百畝負擔百斤初無難色一日坐之堂上與相賓饗便是一厄公之意可復勸令周旋委曲以求

售乎子由赴闕之命亦是虛傳耳

別來紛紛未即奉狀兩辱手教感愧深矣且審比來起居往勝為慰公失郡去國士友所歎然自是計少安矣其他無足言者某自得潁州極慰所欲但不副張公之意蓋旬日前得子開書極來相禱方安於彼不欲移動故不敢乞也聞張公已安慶慰無量合會未可期唯千萬保重不宣

平生欲著一書少自表見來世因循未成兩兒子皆粗



有文章材性未暇督教之從來頗識長年養生妙理亦未下手三者皆大事今得汝陰陽無事或可法成定國必賀我也言此者亦欲公從事於此耳書至此心中欣躍如有所得平生相知不敢獨饗當領此意勿復念餘事也

辱書且審起居住勝誣罔已辨有識稍慰寵示詩讀之聳然醉翁有言窮者後工今公身將達而益工何也莫是作此數篇以餓窮鬼耶喜而不寐詩甚欲和又礙親

嫌皆大可笑也張公今見微衰然論古人益明不惟識慮過人定國亦可見笑人事紛紛書不盡言非面莫究別來三辱書勞問之厚復過疇昔矣衰謬日退而公相好日加所未喻也又中間一書引物連類如見當世大賢意謂是封題之誤必非見與者而其後姓字則我也尤所不喻然三復其文詞韻甚美正似蘇州何充畫真雖不似而筆工之精未可棄也謹當收藏以俟稱此者而說與之如何公行復有差遣亦必粗如意可喜可喜



但此去不知會合何日不能無耿耿也真贊輒作得數句如可用即令一善寫小字人代書紙上可也張公集引厚之字說皆未作別後紛紛可厭可厭神明膏方納上餘萬萬自愛不一

公向要作滕達道埋銘已諾之其家作行狀送至此矣又欲作孫公神道碑皆不可違只告密之勿令人知是某作仍勿令以潤筆見惠乃敢間命也來詩甚奇真得充替氣力也呵呵後詩未及和朝夕別遣人并致糟淮

白所欲宜與田某豈復有愛於此等然此田見為元主昏頹某見有文字在浙漕處理會未見了當亦當申都省也田在深山中去市七十里但便於親情蔣君勾當耳不知異時蔣君能復如此幹否更請籌之

先帝升遐天下所共哀慕而不肖與蒙恩尤深固宜作挽詞少陳萬一然有所不敢者耳必深悉此意無狀坐廢衆欲致之死而先帝獨憐之而今而後誰復出我於溝瀆者已矣歸耕沒齒而已矣凡百粗遣士風食物官



府事體遠不及南都西湖亦虛名亦不足道唯一味閑  
極可樂也公帑皆用過延客一飯而已歌者未嘗見亦  
不足見也呵呵會合未可期千萬以時自愛

辱書驚聞樂全先生薨皆悲慟不已元老凋喪舉世所  
痛豈獨門下義舊雖壽祿如此而吾儕不復見此師範  
奈何奈何方欲乞移南郡往見之今復何及尚賴定國  
在彼差慰其臨沒之意聞屬纊之際猶及某與舍弟痛  
哉仰惟寬懷且助厚之迷中幹後事也執筆惶塞不次

專人來辱書且審起居佳勝張公行狀讀之感慨內有  
數處須至商量蠶帖持去乞細與批鑿附來高文固佳  
妙無可指摘但其間不免有愚意未安者必是老謬不  
足曉煩公開諭仍不深訝蓋張公文志又不可不盡心  
同慮也惶悚惶悚仍雖索便下筆也末由瞻對千萬加  
愛不一

不見定國一年不與定國書半年每得來書輒愧滿面  
取紙欲答又懶而止每想君熟知我此態不復以為怪



也即日起居何如知受任安廟廟堂既未能置君於所  
宜獨無一稍佳處乎料亦都不計較許時見過之語似  
稍的今歲必不失望矣河水既不至此間諸事稍可樂  
幸早臨僕秋中當再乞南中一郡耳屢蒙寄詩老筆日  
可畏殆難陪奉字法亦然異日當記古人矣酷熱萬萬自  
重

有一事拜託杭人欲開葑田蓋五十六年矣但有志於  
民者無意經營亦有數公下手開鑿終於不成惟不肖

偶得其要開之月餘有必成之勢吏民歡快如目去醫  
近奏乞度牒五十道終成之一奏狀一申三省皆詳盡  
利害告公為一見莘老痛致此意

二狀一觀之近奏事多蒙開允想必莘老之力更乞應  
副此一事使西湖一旦盡復有唐之舊際山為界公他  
日出守此邦亦享安樂切望痛與留意近說子由令為  
老兄力言而此人懶慢謬悠恐不盡力故以託定國彼  
此非為身事力言何嫌也



某一味絕學無憂歸根守一乃至無一可守此外皆是  
幻此道勿謂渺漫信能如此。有所得更做沒用處亦其  
須作地行仙但屈滯從徇實中過耳勿說與人但欲老  
弟知其畧耳問所欲幹實無可上煩者必欲寄信只多  
寄好乾棗人參為望如無的便亦不須差人豈可以口  
腹萬里勞人哉所云作書自辨者亦未敢便致耳不怨  
天不尤人下學而上達知我者其天乎張十七絕不聞  
消耗進矣仍存性否懷仰樂全之舊德故其箴之否



五百家播芳大全文粹卷六十四

國家圖書館, NATIONAL CENTRAL LIBRARY, TAIWAN, R.O.C.



五百家播芳大全文粹

宋 魏齊賢等 全編

卷六十五

尺牘

與晁美叔二帖

蘇東坡

自別兩辱存問荷眷契之勤無以為諭日欲裁謝而拙  
鈍懶放因循至今計明哲雅量不深謹過而自訟亦久  
矣即日不審尊候何如某比無恙但奉行新政多不如



法勩劾相尋日俟汰遣耳若得放歸過淮必遂侯見未  
聞為國自重謹奉手啓起居不宣

向承出按淮甸不即具賀幅者以吾兄素性亮直而此  
職多有可愧者計非所樂耳然仁者於此時力行寬大  
之政少紓吏民于網羅中亦所益不小此中常賦之外  
徵斂雜出而鹽禁煩密急于兵火民既無告吏亦僅且  
免罪益苟聞矣向聞吾兄議論頗與時輩不合今茲躬  
履其事必有可觀者矣令兄佳士久淹諸君亦自知之

與康叔朝議

蘇東坡

近日隨班紛冗有疎上問不審起居何如兩日來武昌  
如聞公在告何也豈尊候小不佳乎無由躬謁左右但  
有馳繫冬深寒淺尤宜慎護謹奉啓不宣

再辱手教承起居清勝今日風大明日禁江皆當走見  
適會姪婿後日行來日已約數客酌餞咫尺不得一往  
愧負深矣所要重寫詩已一依來命別寫去不知中用  
否大字寫未及乞恕察



與呂龍圖三帖

蘇東坡

某西蜀之鄙人幼承家訓長知義方粗識名教遂堅晚節兩登士舉一中茂材科故當世名公巨卿亦嘗賜其提挈愛憐之意故歐公引之于始韓公篤之于其中今又閣下舉之于其後自惟末學辱大賢者之知出自天幸然君子之心以公而取士其小人之志終荷恩以歸心但空省循何由論報比者止以片言隻字謝德于門下而其誠之所加意有所不能盡意之所至言有所不

能宣至其見于筆若者止此而已惟高明有以容而亮之不宣

前以拙納上塵聽覽方懼獲罪于門下而無以容其誅不意門下言辭款密禮遇優隆而褒揚之句有加于前日此不肖所以且喜且懼而莫知所措也珍函已捧綬記謹藏之于家以為子孫之美觀蔀屋之漏復生光彩陳根之朽再出英華乃閣下煖然之春有所故以驅育成就之故也擇日齋沐再詣館下臨紙澁納情不能宣幸



惟恕其愚不宣

久以局事汨沒殊不獲覲止竊惟得踈絕之罪于左右不意寬仁含垢察其俗狀之常情恕其小過先降其書辭曲加勞問拜貺之際益增厚顏旦夕詣賓次盛暑伏惟為朝自愛上副注倚之心下慰輿人之望謹拜啟不宣

與韓昭文

違遠旌祭忽已數月改歲緬想台候勝常邊徼往還從者殊勞日望馬首但迂拙動成罪戾恐不能及見公之還而去耳餘寒伏冀為國自重因任秘校行謹奉啟叅候不宣

與毛澤民六帖

蘇東坡

公素人來得書累幅既聞起居之詳又獲詩一篇及公素寄示雙石記居夷久矣不意復聞韶濩之餘音喜慰之極無以為喻久廢筆硯不敢繼和必識此意會合無期臨書惘惘秋暑萬萬以時自厚不宣

明守一書託為致之育王大覺禪師仁廟所舊過嘗見



御書賜偈頌其畧云伏覩大覺禪師其敬之如此今聞其困於小人之言幾不安其居可歎太守聰明老成必能安全之願公因詰歎曲一言正使凡僧猶當以仁廟之故加禮而况其人道德文采推重一時乎此老今年八十二若不安全當使何往恐朝廷聞之亦未必喜也某方與撰宸奎閣記旦夕附去公若見此老且與致意千萬千萬

寓居粗遣本帶一幼子來今者長子又授韶州仁化令冬中當挈家致此某又以買得數畝地在白鶴峯上古白鶴觀地也已令庀木陶瓦作屋二十許間冬可成去七十無幾矧未必能至耶更欲何之以此神氣粗定他更無足為故人念者聖主方談設科求宏詞公儻有意乎某再拜

新居在大江上風雷百變足娛老人也有一書齋名思無邪齋閑知之

寄示竒茗極精而豐南來未始得也亦時復有山僧逸



民可與同賞此外但緘而藏之耳佩荷厚意永以為好  
秋興之作追配騷人矣不肖何足以窺其粗遇不遇故  
自有定數然非厄窮無聊何以發此竒思以自表于世  
耶敬佩來既傳之知音感愧之極數日適苦壅嗽殆不  
可量強作報滅裂死罪

與蜀帥李元純三帖

蘇東坡

邑子每來稔聞愷悌之政西蜀泰然不肖與受賜多矣  
小姪千之初官得在麾下想蒙教誨成就也曾拜聞眉

士程遵誨者文詞氣節皆有可取不知曾請見否冗中  
不盡區區

何朔爾後紛紛不獲繼問左右蜀本易治而或者擾之  
公既深識民情而民亦素服公政竊想下車以來談笑  
無事行春之樂無由託後乘陪賓客之末但深想望舍  
弟鎖宿殿廬未及奉狀

張房助教陵井人本治儒學已而為醫有過人者識病  
通變而性極厚恐欲知之某寵祿過分碌碌無補以為



愧近屢請郡未獲若獲掃墳墓遂得望見豈勝厚幸但恐政成促召在旦暮耳冗中不盡區區

與樞密侍郎

蘇東坡

違去門下已八年愚魯罷殆書疏缺然怠慢之罪宜在譴絕比承柄用又不以時隨衆修賀蓋疎懶愧縮日復一日不知復憐恕之否即日履茲寒凝台候萬福某去替止數月而貧困難以赴闕相次乞江浙一郡若幸得之拜見未可期惟冀為國自重謹因人便奉手狀起居

不宣

與滕達道三帖

蘇東坡

罪廢之餘杜門省愆人事殆廢久不修問亦非怠慢舍弟來具道動止甚詳如獲一見移守安陸日問首耗忽蒙惠書承已到郡具審起居康勝初不知軒旆過黃陂既是州界一走見亦不難此甚可惋歎也云旅寓凡百粗遣不煩憂念咫尺時得別書亦可喜也苦寒萬乞為時自重謹奉手啓上謝不宣



輒有少愆甚屬率易惟寬恕自得罪以來不敢作詩文字近有成都僧惟簡者本一族兄甚有道行堅來要作經藏碑却之不可遂與變格都作迦語責無可箋注今錄本拜呈欲求公真蹟作十大字以耀碑首况蜀中未有公筆蹟亦是一闕若幸賜許真是一段奇事可否埃命見有一蜀僧在此旦夕歸去若獲便可付也

闕人寫公狀乞矜恕示諭邸報下京東保明此初不見乞錄示可否所問未押字亦不得其詳但云為吳興典

田千餘緡田主欲賣不許為人所言耳亦不知的否契章亦自與之熟羅漢堂雄麗之極或與旁作四字記之亦無害但副團御位不稱其意如何如何此書到後乞遞中畧示數字貴知達耳

與監官二帖

蘇東坡

遠枉書教存問甚篤審比來起居住勝感愧兼集寄示石刻仰佩至意何時會合少發所懷臨書但有慨然秋冷更望以時自重



早歲荷先公深知至熙寧中相見都下得聞其約論所  
以上補君相者非一但人不知耳不然者某豈敢驟以  
一書深言哉近見朝廷推恩賜謚則先公忠誠已自表  
見于後世若此書不出可也然因此以知足下存心如  
此則先公為不亡矣覽之悲喜適會有少冗作書不能  
盡區區非久當別上問也

與鄭運使

葉道卿

睽索已來凝想何極郡務繁冗德履康靖自吳郡泊南

徐并維揚三曾寓簡必冀悉達淨几舟行今日抵泗濱  
皆平善勿憂軫也沿路州縣並借及兵士相送知幸知  
幸後月半間必至輦下司封雅候無恙應時常相見切  
宜勸勉寬中加愛是禱

與曹士衡殿丞二帖

河水相去朝夕可航末由瞻風日以懷吝數賜大牘頗  
越常儀裁答既愆震惶無已比奉來教託銘太夫人之  
窆夙眷有素義不敢辭草土之中別無稱目輒欲竊借



子文屯田名爵以先蕪累不勝大願書石未審屬之何人宜擇楷法善者隨石大小以紙先裁白本分布行道試寫一通平空之間疎密貴中文字或有未穩早希開諭書石或著長洲都官之銜甚雅不然陸太丞亦在此近者朝旌之來頻枉車馭有慰窮困不任銘戢旋阻風德忽逾弦肫相望數舍問信不數冬序增凜想惟神宇恬暢邑政修舉民譽播流稽之于前迨無其比甚善甚善想在暮月別奉陟恩歲陰天寒深願珍厚

與邱道源二帖

刁景純

昨日比期面奉承辭以少勞不敢固請辱誨知赴僧藍之期詰朝方得拜見矣示及體仁堂名熟思之其義色括盡矣但慮涉人君所行之事耳如無疑即與作一記可敷演其義有所勸矣至如乾明寺前小閣及池上水亭亦為留意冀得佳名以揭之也如有所得幸乞示下心經序納上樂道謝上表請一觀封示范氏祭儀寫訖納上



昨日承臨况小奉高論殊警憤聞幸甚幸甚看親之行  
且緩數日甚善何苦忙也當塗時容牽強也諭及仲求  
意近有一篇來已和訖方待寄去旦夕面奉以罄區區

與吳學士

蔡君謨

春候和燠不省德履佳否計庭日以繁冗沈迷故于書  
滕實為曠闕自初至省副使判官遷移不可悉數今特  
王公和舊人而已三期之內流轉如此來日畧知案分  
則又置之欲事日修舉難矣及夏便即解去劇任不可

以久處也末由展對但極瞻跂

與李觀察

昨日蒙手教見招乃素所願然前朝暴暖省中解衣晚  
為寒風所侵至今猶未甚解夜來併服餌明日料之出  
未得且那後時可否惜此春物已闌私心正殊不快也

與王學士

歐陽永叔

春暄伏惟尊候萬福某自去年閏月來東都錄養幸如  
所欲惟僻陋日益愚鄙耳在都下時承兄舟行不克攀



送其後送者還頗知留客甚歡而飲酒差多親族皆以  
素羸奉愛不知其後復飲否子野善能攝治猶能絕葷  
血甘淡薄况于酒耶一別頓爾南北闕于問候惟冀自  
重以慰區區

與蔡省副

公私忽忽久闕致誠辱教方承已登舟遂不復一得叙  
別可勝瞻戀短景日暮還家客已盈室寢食殆廢習以  
為常以此久不奉問慙罪慙罪汝陰君子久處疾少間

當來歸未見惟寬中自愛審用藥餌餘不盡區區

與大博

罪逆餘生遠屏郊外特承顧盼感咽何窮仍沐寵惠雄  
編俾遂榮覽雖在哀迷亦知聞警如嘉州清井之作有  
以見仁言之利溥而非文字之空言也欽熟才譽固已  
有日粗窺高蘊益用歎服以衣制不能謁謝

與吳諫院

思奉清談論不可得徒用企想夏熱承體氣佳裕某比者



忽有尹命殊出意外不惟才非所長加以他慮不淺昨  
已懇辭庶可得免如其不獲恐難堅避誌文鄙拙豈足  
當之第以欣慕忠義樂于紀次因得附名于石末遂不  
敢辭爾惶恐惶恐鄙懷區區不能具道

與陸祕書

人至辱示長書及古今雜文十軸其研窮六經之旨究  
切當世之務與其辨論文辭之際如決壅塞闢通渠以  
寫浩渺之無窮御馭駿而馳騁然則吾子之所能與其

所用心者不待相見而可知矣某衰病廢學多難於時  
常幸得空門之處苟樂於自棄而吾子獨不棄之惠然  
見及何以當之欣慕悚愧聊此為謝

與劉舍人

歐陽永叔

適歸自外捧惠佳篇豈勝欣感偶然之會雖草率而縛  
于文字傳為他時故事茲敢不勉也然西齋素患寂寞  
近方稍葺而原父去此稍遠此俗所謂事無恰好也承  
置得懷州牛膝更有盡乞之衰病者遂得取濟於茲物



深所望也漏舍冀得奉見以盡區區

與王學士

歐陽永叔

京師區區自朝及夕無益於公私而思接賢者之論亦不時得近兩辱見顧皆不獲迎候豈勝萬恨寒陰不審氣體何似旦夕當卜至門未間先此為謝冀有以亮之而已

與蔡公

辱惠櫻寧翁墨多荷多荷佳物誠難為得比也人尚少

其二幽齋隙靜時點弄筆硯殊賴于此雖多無厭也煩括計不為嫌矣諸留面叙

與李廬州

承誨示至於勤勤所寄浮槎水味尤佳然豈減惠山之品久居京師絕難得佳山水頓食此如飲甘醴所患遠難多致不得厭飲耳此山前世粗有名然皆因僧居以為勝今所記者特水少故不及其他也張又新水記與陸羽不同考於二家之書可見矣今更錄往時所作大



明井記奉呈庶可知其詳也因人入都小餅時為致一  
兩器千里致水恐涉好奇之弊然若不勞煩則亦無害  
更裁之

與李昭玘

蘇東坡

無便久不奉書王子中來且出所惠書益知動止之詳  
為慰無量比日尊體何如既拜賜雪堂新詩又獲觀負  
日軒諸詩文耳目眩駭不能測其深淺矣老病廢學已  
久而此心猶在觀足下新製及魯直無咎明略等諸人

唱和於拙者便可閣筆不復措詞近有李豸者陽翟人  
雖狂氣未除而筆墨瀾翻已有飄沙走日之勢嘗識之  
否子中殊長進皆左右之賜也何時一笑未間惟萬萬  
自重除人還匆匆奉啓不宣

與孫運勾

蘇東坡

脾能母養餘臟故養生家謂之黃婆司馬子微著天隱  
子獨教人存黃氣入泥丸能致長生太倉公言安穀過  
期不安穀不及期以此知脾胃完固百疾不生近見江



南老人年七十二狀貌氣力如四五十問其所得初無異術但云平生習不飲湯水耳常人日飲數升五日減一合今但沾唇而已脾胃惡濕飲少胃強氣盛液行自然不濕雖冒暑遠行亦不念水此可謂至言不繁聞曼叔比得種疾皆以利小藥去之中年以後一利一衰豈可數乎當及今無病時力養胃氣若土能制水病何由生向陳彥升云少時得此病服商陸防己之類皆不效服金液丹灸臍下乃愈此亦固胃助陽之意也但火力

外物不如江南老人之術耳薑桂辣藥例能張肺多為腫媒不可服有書以告之為佳也

與徐司門

蘇東坡

適辱車騎寵存感怍無窮晚來尊體佳勝某與陳君略出至安國遂覺風疾稍作欲告明少休後日共與盛集可否無狀慙負多矣謹奉啓布聞不宣

與米獻明

蘇東坡

累日欲上謁竟未果辱教承足疾未安不勝馳企此病



惟歲靈仙牛膝二味為末蜜丸空心服必效之藥也但  
歲靈仙難得真者俗醫所用多藁本之細耳其驗以味  
極苦而至紫黑折之內有微塵起如胡黃連狀且脆而  
不刃向明視之斷處有墨白暈俗謂之鴿眼此兩者  
備然後為真服之有奇驗腫痛拘攣皆可以有走馬之  
效二物當等分或視藏氣虛實加減牛膝酒及熟水皆  
可下獨忌茶耳犯者不復有效前常服此但每歲收槐  
皂莢牙之極嫩者如造茶法貯之以代茗飲此效屢嘗  
見不一

與蘇子容四帖

蘇東坡

久不奉狀疎慢之罪尚蒙寬恕否即日起居住勝承已  
拜新未即大用輿議尚鬱然沮勸有法足以賴汗姦諛  
鼓勇忠義不無小補也某蒙范如昨但久不聞談誨僻  
郡親友莫至日以弁鄙矣漸冷惟真為國自重不宣  
適見人言宗叔墜馬尋遣人候問門下又知其少損不



勝憂懸故不敢便上謁家傳接骨丹極有神驗若未欲  
奉食且用外帖立能止痛生肌正骨也匆匆奉啓不宣  
向來罪譴皆自取今此量移之命已出望外重承示喻  
感愧增劇以久困累重無由陸去見作舟行沂洛夏末  
可到也公所苦想亦不深但庸醫不識故用藥不應耳  
蘄水人龐安時者服藥皆精博學多識已試之驗不減  
古人度其勢未可邀致然詳錄得疾之因進退之候令  
見形狀使之評論處方亦十得五六可遣人與書庶幾

有益此人操行高雅不志于利某頗與之熟已與書令  
候公書至即為詳處也更乞裁之仍恕造次

穎師書數紙得之驚喜雖貌奮鬣已降老虎矣冗中未  
及作書勿訝勿訝

王幼安二帖

蘇東坡

索居八年未嘗一通問每以慙負屢得許下兒姪書云  
比來親族或斷往還唯幼安昆仲待遇加厚間之感激  
人來辱書累幅陳義慨然如接古人語信王謝風氣傳



之有自也老朽強答不復成語不罪不罪某初欲就食  
宜與今得子由書苦勸歸許昌已決意從之矣舟已至  
廬山下旦夕當獲過謁未聞乞若時保嗇不宣

蒙示喻過重雖愛予如此然憂患之餘未忘憂畏朋友  
當念有以保全之者過實之慰譽願為掩諱之也許暫  
假大第幸甚幸甚非所敢望也得託庇偏廡愛謹不敢  
薰污稍定當求數畝荒隙結茅而老焉若未即溝壑得  
及見昆仲幼成而歸為鄰翁防客伏臘相勞問何樂如

此餘非面莫究

與鄧承旨二帖

蘇東坡

別來思仰益深到郡即欲上問因循至今辱書教感怍  
無量適日履茲薄冷台候康勝瞻望咫尺莫由際集尚  
冀順時為人自重

衰病日加得此便郡蕭然乃無一事平生守官未有如  
今之適也舊過潁州亦樂土但恐民事不如潁之絕少  
爾嘯詠之樂誰陪公者計不負風月餘非面莫究匆匆



與陳君式大夫二帖

蘇東坡

蒙惠竹簟剪刀等仰服眷厚歐陽文忠公云涼竹簟之暑風遂得此味近日尤復省事希出去歲冬至齋居四十九日息念歸根似有所得旦夕復夏至當復閉關却掃古人云化國之日舒以長妄想既絕頽然如葛天氏之民道家所謂延年却老者殆謂此乎若終食汲汲隨物上下者雖饗耄期之壽忽然如白駒之過隙不敢獨饗此福輒用分獻想當領納也呵呵多日不獲請見伏

惟尊候康勝借示繡佛奇妙之極當由天工神授非獨尋常女工之精麗者也凡目瞻仰一洗塵障幸矣謹却馳納少暇詣謝不宣

秋暑尚耳不敢造門伏想起居住勝借示丞相手簡及所書彌勒佛偈筆勢峻秀實為奇觀手簡謹却馳納倡必有別本輒留箱篋之珍且欲誦味以洗從來罪垢業障幸甚旦夕當得造謝也

與王敏仲二帖



春候穆清竊惟撫馭多暇起居萬福甘雨應期遠邇滋  
合助喜慰也某凡百粗遣適遷新居已浹日小牕疎籬  
頗有幽趣賤累亦不久到矣末期瞻奉萬萬為國自重  
兩蒙賜教感慰深至曾因周循州行奉狀想已塵覽即  
日台候何如越人事嬉遊盛于春時高懷俯就想復與  
衆同之天色澄穆亦惟此時也莫緣陪後乘西望增慨  
尚冀保練慰此區區

與滕興公二帖

某久當廢逐今荷寬恩尚有民社又聞風土不甚惡遠  
近南北一無所較幸不深念示喻壇記新以文字獲罪  
未敢秉筆也忙中匆遽不盡區區

近晚訪聞一事請貸糧者幾滿城郭多請不得至有住  
數日所見多於所請者吾儕首慮此事非不約束而官  
吏惰忽如此蓋由於按劑之過也切請興公速為根究  
為邑官告諭期會不明耶為倉官不早入晚出支遣耶  
方所致耶切與根究取問施行病中間之甚愧某手啓



與費中行九帖

毛澤民

今日聞行李北歸通少事未及見車馬先枉手誨愧感之劇霜途千里想亦少勞來日當奉候次

晚來體中安適否鄙文輒自暴其醜者非求致浼于執事也譬之餓人操瓢以丐于門而公指其腹言蓋已屬瘡矣無乃甚不仁哉幸勿加塗抹便望斥還賤軀微不佳怨草率

奉告分以盧橘甚愧食珍晚來起居清安一兩日來病

軀良不佳阻見長者乃中焦渴

適幸枉車騎移刑候尋刻清安來早作一飯屈致從人想賜臨之

乍到官紛然吏役之迫諸况不聊以故因循未作書敬報諸公無乃得罪左右否某強顏此邦非所樂者林泉雞犬相聞日思引去耳數日苦寒疾尚在告奉狀殊少力以故草草

伏下風有年無從識面得官于此幸聲猷相咫尺然無



地得望顏色空懷仰有加耳

使介賜教甚厚下情感愧之劇積雨蕭冷不審訊後眠食佳否甚強顏少味無可言者阻遠未有晤語之幸切冀為久自厚前須體命不宣

前此送迎紛紛數月飯不時飽從人之留固久而乘電相揖耳今以甚恨而不忘奉告喜還治益佳適時澤佳士每聞談美實不絕口計詩酒相從無虛日郡中雖多賢者無與往還杜門忽忽真檻猿也

平生養學文孤陋每應可作俗下文字他日自取讀便漸欲走中行以文章自名不應輕許可若是也片言隻字多不收拾前此謾錄得數篇便時澤見過出之為一笑不謂持去遂汗齋閣中謬誤紛紛大須改正願且斥還臨行百兄作報減裂

與俞叔通教授

曾子固

辱文采甚盛所以應今之科選者宜無不合而乃爾滯淹此鄙鈍所未喻迫行不得迎接謹奉啓陳謝



謝張文潛

久別不勝思企公私紛然未暇奉書忽辱手教且審起居佳勝惠示文編三復感難甚矣君之文似子由也子由之文實勝侯而世俗不知乃以謂不如其為人深不願人知之其為文如其為人故汪洋淡薄有一唱三嘆之聲其秀傑之氣終不可沒其作黃樓之賦乃稍自振厲若欲以驚發憤憤者而或者便謂僕代作此尤可笑是殆見吾善者機文字之弊未有如今日者也其源皆

出于王氏王氏之文未必不善也其患好使人同已自孔子以來顏淵之仁子路之勇猶不能以相移而王氏乃欲以學問同天下地之美同所生而物不同于所生惟荒瘠斥鹵之地彌望皆黃茅白葦此則王氏之所同也近見章子厚言先帝晚年甚患文字之陋欲稍變取士法特未暇耳議者欲漸復詩賦立春秋學官其論甚美僕老矣彼後生猶得見士大夫之全者正賴黃魯直秦少游晁無咎黃傳道與君等數輩爾如聞君當作太學



博士願益勉之德輔如毛民鮮克舉之我儀圖之此外  
千萬保愛

五百家播芳大全文粹卷六十五



國家圖書館, NATIONAL CENTRAL LIBRARY, TAIWAN, R.O.C.



五百家播芳大全文粹

宋 魏齊賢等 全編

卷六十六

尺牘

與孫舍人

唐子方

昨離上黨因便使拜狀諒呈凡格介初三日到國門以  
淮南舟航未至汴流淺涸寄寓僧舍今得朝旨見須却  
暫般入城京師大暑久在河南地涼乍此奔走不勝其



勞矣恭惟日來臨撫之暇起居冲適未緣奉見更乞順  
時為國自重下情區區謹奉手啓

與吳殿院

楊侍郎

嚮以嫌避稍疎祇詣然傾慕之意則深矣懃川之行大  
鬱輿論臺閣風采自茲益新不審何日遂行初秋殘暑  
倍希遵繕而已

與李運使

王平甫

早辱寵臨區區荷不遺之高誼迫夜造門既而數客抵

暮方散腹虛不覺過飽難於乘馬又恐公凌旦啓行須  
早寢遂輟是行亦不敢奉啓恐煩占答乃蒙賜教知已  
為具良不自遑翊日府中陪坐以聽餘教實鄙拙之幸  
願也

與王學士

黃安中

疲病幾不生比乏力未敢動勞雖坐阻君子心旌懸馳  
不及奉啓以布區區特辱教甚慰甚慰某旬日可叅  
告迫逐長者矣午間還舍得來示即捧謁門下值車馬



出入不復待對但極悵望再被教約尤佩眷與之厚晚  
刻尊候安勝迫夜已放從卒休矣翼旦再到宇下使還  
草此布謝

伏辱教益不勝佩荷然某邇日所苦亦漸平親意終不  
願北去豈可再冒職事此心吾友必見亮矣前日已投  
狀乞郡合入官皆勉從親意者某不幸早竊祿位袞求  
袞至今曾不能少有所聞而志慮彫喪竟何得也近念  
及此中夜長難冀得如所請而筋力尚完庶幾尋舊學  
以從師顧兄素知我者故輒罄竭此深所望於左右幸  
無秘音問而已諸俟續上狀聊此布謝

與李判銓

黃安中

奉違已來困於行役以故不遑上狀及歸親側日有應  
答之勞疲怠殊甚想蒙於察某疾病少瘳親意不果北  
去欲令求便家一宴非久投狀不識可得否久承教約  
頓爾睽異臨書於邑何可勝道

與林秘書

黃安中



昨日入局甚久疲而寢晚歸上馬矣辱諭要相見謂今  
早必於檢院相值遂不復還局黎明乃知告假適在殿  
庭不果即致問不審所履無甚苦否欲詣謁恐未接客  
也

與孫校書二帖

黃安中

久欽高誼往來府下迫於從事未果就見乃者不圖躬  
損道義先辱臨貺既不獲見感儀而復失候問所舍無  
由走謝不敏之過將何以辭惟君子省察使得續謝於

他日何幸如之未耳聊此為先

某每入謁府常辱臨存欲修謁奉謝不識所舍無由一  
見比者到城下不少留亦辱留刺乃知君子真有意於  
不肖欲推而友之也然恨奔走行役竟未見顏色故雖  
已領厚意然未釋然無悵望也諸俟他日面謁告戒區  
區報謝豈足言哉謹勒忝問

與彭學士三帖

蔡元度

今早講罷即止直舍承驕衛已出晚尤毒熱伏惟尊候



動止萬福某久慕下風比得親侍殆將一月竊仰高明  
欽戴無已會北還俟邇失依賴下情瞻戀何可以言拘  
文非假不敢輒詣牆屏不宣

向者附啓以干記室竊揆已塵省覽吳中風物公所熟  
遊願神燕閑想有怡適瞻企旌旆幾日來歸庶幾區區  
獲望步武翹首屈指不勝馳情

久阻晤語不勝馳繫昨日奉使奔走還家以來疲滿屢  
病欲奏記左右尚未果也使至辱手筆切承暄和孝履

支福欣慰無已某得請宣城但須舟尚難得之得卽東  
矣未有展親之期切冀節哀順變以副區區

與虞祕書

蔡元度

不揖風度忽忽數月仰企之誠未嘗少置昨日得王令  
書聞公行李已還不識呈試何如相去密邇千萬畧扁  
舟一來清坐兩日詢知州中人事也病倦不及走見匆  
匆上狀

與梁學士



缺然承幸六年於茲因伏餘息遠斥窮海瞻望門牆邈在天外區區欲勤一日洒掃之役不可復得矣某鄙賤無取於世者希遇幸合既非所願為而於恩矜教誨之舊德竊亦自引於疎外而不敢為是數數私布悃欵其心非有他也以謂士窮在下方退聽寂寞謹分安命而事餘意外在所務畧不宜更攀緣在勢以召饑笑雖道義推重人人趨赴保無此疑矣而顧猶赧然誠以身世衰頹猶或勉強似非其稱是以一書之問久不徹於麾

席也仰惟高義表望末俗門下之列有能以是自信者得無舍其怠絕而憐其窮極耶伏幸念之幸甚不宣

與李嘉甫二帖

俞教授

身世紛擾日在馳走人事應答瀰者尚失則遠者可知矣故於公久別畧不能時為書問以自見其跂念之情為恨為愧良益悵悒復序已至伏惟莅官餘休奉親多裕某鄉居如故但以累日重哀廣憂深未易脫去耳追昔握手之歡豈可復得耶官况必佳更切練養以須顯



擢匆匆上狀

阻遠言緒日深思仰私事萬端久失馳問何勝愧及此  
辱教墨達紙存撫過厚尤為感戴且承視事已赫休譽  
慰怍良劇不審邇來氣體何如末由叅晤倍萬珍嗇行  
對寵除

謝惠詩

彭器資

瞻仰高義方切馳情辱教賜并示雄篇奇詞俊筆兼諸  
作者之體鄙人震耀恍然如迷誠何足以窺覘其涯緒

哉伏讀長詠但知欽歎而已雨涼即惟動止萬福不獲  
造門以拜感辱且請所未聞者區區祇益慚恨謹奉狀  
不宣

與陸侍郎

彭器資

雨後煩暑不審尊候何如伏惟萬福昨日拜駢出於稠  
疊祇益銜感鄙文謾繕寫呈左右久廢筆硯強此抽札  
浮詞云云似涉多冗惟公不外儻賜竄改幸甚專人謹  
俟指誨



與李通直

劉侍御

數日薄有春思不審所履何如上元計多出遊來日午  
間輒敢強在軒從見過不以率易賜辱則幸之大也雖  
然非所敢必也惶恐惶恐不宣

與周承議

劉侍御

軒車到洛謂即得趨奉多故未果私懷惋結驟此煩燠  
竊計寢味寧適洛城天下佳處而王公好合無倦况當  
花時宜多勝賞敢冀歡燕餘隙倍切調節不宣

與沈秘丞

張子厚

違去甚久雖起居之間不能以時修致而瞻慕感德蓋  
未始忘無狀幸忝里舊素多提誨之賜此極思膝下旦  
夕又成行計歲云暮矣馳驅道路良非得已也執事以  
長才遠業以淹外治休聲美譽播在衆口行聽褒擢以  
副人望區區欽頌之至不宣

與陳奉議

張子厚

鄙野之質事出濶疎獲從英遊特辱見厚方此相得遽



復乖隔情思迄今惘然盈懷前日遊西山登蘿月以望  
城中浮圖樓觀隱隱可望尤恨不得與公同之夜來抵  
慈溪忽得手教慰釋無量即今至香山朝夕遂西滋遠  
言笑倍希珍番臨紙悒悒

與楊承議二帖

錢祕書

一別又已改歲雖不能以時上問而瞻嚮風誼常若趨  
對即辰伏惟宰字有術神名陰相某遠借輝潤方此苟  
祿再會末涯萬億加愛區區不宣

昔同桑梓今也衰親多在治封遂得與田里老稚均被  
仁政誠為善幸然遠歧高步非百里所能展用即聽迅  
召入當要途

與陸承議

方奉議

頃同里閔出於天幸今得明公臨治間往來者稱道治  
譽之善萬民被澤以為平昔未之或遇獨以薄宦南北  
不獲相共士人以歌舞盛化可量延頸耶然瀕海餘俗  
豈能久屈當有異拜使天下均受大賜可副輿議也區



區之願實在乎此

與吳侍郎

范鎮

近至京都旅見儀表不遑歎對第深依悒特承手教彌切感懷比復忝姻末更增悚歎秋序向高伏惟台候康適某始至任所正遠門墻禱頌傾詹倍百常品惟冀上為宗社慎加寢興不宣

與李廷評

蘇東坡

經田特辱遠訪適以卧病數日及連日會集殊無少暇

治行匆遽不及詣謝明日解維遂爾違濶豈勝愧負謹奉手啓布謝伏惟恕察不宣

答李端叔

蘇東坡

聞足下名久矣又於相識處往往見公所作詩文雖不多亦足以髣髴其為人矣尋常不通書問怠慢之罪尤為濶畧舍弟子由至先蒙惠書又復懶不即答頑鈍廢禮一至於此而足下終不弃絕適中再辱手書待過之隆覽之不覺面熱汗下也足下才高議明不應輕許與



人得非用黃魯直秦少虛輩語真以為然也不肖之為人不能取媚於世而二子獨喜見譽如人嗜菖歎羊棗未易詰其所以然者以二子為妄則不可遂欲移之眾口是大不可也某少讀書作文專為應舉而已既及進士第貪得不已又舉制策其實何所有而其科號為直言極諫故每紛然誦說古今考論是非以應其名耳人苦不自知既以此得因以為實能之故說說至今譬之候蟲時鳥自鳴自己何足為損益某每怪時人待某過

重而足下又復稱說如此愈非其實居黃以來深自閑塞扁舟草屨放浪山水間與漁樵雜處自幸庶幾免矣足下又復創相推與甚非所望木有癭石有暈犀有通以取妍於人皆物之病也謫居無事默自觀省回視三十年以來所為多其病者足下所見皆故我非今我也無乃聞其聲不考其情取其華而遺其實乎抑將又有取於此也此非相見不能盡自得罪後不敢作文字此書雖非文然信筆書意不覺盈幅歲將盡寒苦萬萬強



食自愛

與章致平

蘇東坡

自儀真得暑毒困卧如昏醉中到京口自太守以下皆不能見茫然不知致平在此辱書乃漸醒悟伏讀來教感歎不已某與丞相訂交四十餘年雖中間出處稍異交情固無所增損也聞其高年寄跡海隅此懷可知但已往者更說何益惟論其未然者而已主上至仁至信草木豚魚所知建中靖國之意可時以安又海康風土

不甚惡寒熱皆適中舶到時四方物多有若昆仲先於閩客廣舟中準備家常要用藥百千去自治之餘亦可以及鄰里鄉黨也又丞相知養內丹久矣所以未成者正坐大用故也今茲開放正宜成自然只可自內養丹切不可服外物也某在海外作續養生論一首甚欲寫寄病困未能到毘陵定疊檢獲當錄呈也所云穆卜及復究繹必是誤聽紛紛見及已多矣得安此行為幸更徐聽其審某見今病狀死生未可必自半月來日食米



不半合見食即先飽今且速歸毘陵聊息居我里庶幾  
且少休不即死書至此困憊放筆太息而已

與道源秘校

蘇東坡

謫居窮巷首見故人釋然無復有流落之歎衰病奇拙  
所向累人自非卓然獨見不以進退為意者誰肯辱與  
往還每惟此意何時可忘別來又復初夏思企不可言  
遠想即日尊候佳勝兩辱手書懶不即答計已獲罪左  
右然惟故人能知其性氣蓋懶作書者有素矣中實無

他也更望寬之知到官又復對換想高懷處之無適而  
不可江令竟不肯少留健決非庸人所及也無由面言  
萬萬以時自重不宣

與吳秘丞

黃道夫

更夕冒涉外何如未惟安佳昨日得奉清賞何勝慰愜但  
以衰病中不飲酒不敢曲留而雨作復不果追送之良  
惘然耳新詩奉命上之未嘗垂見何也山居秋色亦可  
愛稍晴過天望矣攀仰攀仰



與運使國博

曹士衡

累日前頷走公皂恭致手狀計惟愚歎已塵清几伏審  
邇日體氣佳勝暑氣漸隆雅對伊邈惟冀公外精加保  
練以慰瞻企謹奉手啓道誠萬賜終覽不宣

與吳朝奉

李資深

比者朝蓋因抵敝邑雖不獲款奉教益然久別之心喜  
於瞻拜故頃刻燕語猶足以解勞結之情違間踰旬向  
往倍萬庚伏暑溽不審寓居端閑尊候動止萬福某洎  
汨於此過期不得北歸情悰無聊未易言道咫尺正阻  
瞻晤敢冀順時保育不宣

與王舍人

李尚書

伏蒙敕教情禮深厚非所敢當以大夫入銘文見屬愈  
增愧慄夫為人子者莫不欲褒顯其親以詔後世也惟  
有道君子為能言而又見信于人若某者文詞行義不  
為當世所取所謂有道君子者比肩闔下不即求焉而  
乃屬某蓋惟人心博愛欲顯其親而使不肖之名以托



於不腐耳敢以鄙陋固詞以負左右見愛之誠哉故聞命矣先此叙謝

與丘宮舍

李轉運

自違離年載之久區區宦徑奔走靡常思企高風愈愧塵迹昨以取途滁陽冀遂刺謁及門不見固增瞻嚮朱道士惠訪出吾兄書筆仍談忘榮樂道之趣養生保命之訣蕭然風韻自得真尚不勝欽仰某任宦之心亦衰落更聞孤節益為慙負手尺布誠裁照一二不宣

與林宰

數日得奉談笑殊自慰懷渴仰殊深伏惟動止萬福鵬已領得感怍當有元給之直幸示下不然則魯自是不贖人矣按田良苦惟寬中自愛

與孟秘書二帖

王荆公

辱書感慰非兄之厚愛何其能勤勤不忘如此也奔走南北而每多不能如意去就之際未知所擇安能無勞於心耶不知兄代果何時到乎春暄千萬自愛以慰鄙



吾家指卷六史料  
懷也時以書見及不勝幸願

辱書感慰相并按田勞苦希自愛惟下戶所得亦不多  
又誠可憫至於豪右雖在蠲至少未為損也仁明審處  
之而已實利甚輕但其亦自實却數十千恐不勉嫌謗  
也邑事但痛繩之豈有不從者乎按置一二人自然趨  
令矣日夕思一見無由常因檢覆至近郊能入城否或  
不欲入城憚請謁之煩耶至近郊示諭當走城外奉謁  
也

與劉秀才

王荊公

久不聞問忽得書承侍奉萬福良以為慰見問進退去  
就之意蓋道之所存者意有所不能致而意之所致言  
有所不能盡第深考微子一篇則古之聖人君子所以  
趨時合變蓋可觀矣阻濶愈遠惟自愛數以書見及

與丁元珍

歐陽永叔

向在府中困於煩冗久不奉狀徒用瞻思專人劇來特  
辱嘉問承涉夏以來體氣清福乃心欣慰元珍才行並



高而困蹇如此吾徒之責也某昨被煩使初不敢辭然  
兄按之才素非所長加以早衰多病筋力不支屢自陳  
乞蒙恩得解去實出天幸然請外之志尚未獲素心又  
以殘史終篇有期夏秋之交可決南去相見末涯千萬  
鄙懷臨紙不能悉布惟慎重自愛以順時報

元珍淹屈於外交游所宜出力既默無所為而至於書  
問亦不能時致其勤其為慙罪不待言矣元珍自蒙恩  
歸院雖稍清閑而忽忽度日公私無所益此處京師者

汨汨之常態也某非甚愚頗知脫此而遠去然事有不  
得遂去者古人所謂不如意者十常八九殆此類也今  
歲得人之盛中外共慶况在佳聲高與良增喜慰因胡  
推行謹奉狀相次陸君行當別布懇

與沈侍制

歐陽永叔

數日不奉問苦暑非常歲之比少壯者自不能當衰病  
之人煩鬱可知焉辱教承體氣清安甚慰俗以立秋日  
卜秋暑多少今炎暑之熱猶多更猖狂耳然世言春寒



秋熱老健謂此三者終是不恒之物也介甫詩甚佳和韻尤精看了却希示下

與劉舍人

歐陽永叔

數日不奉見餘暑頗甚伏惟起居佳勝某昨群牧會以熱中飲次過多偶為腹疾兼以少幹故逐日在告只三兩日當即出叅特煩問念感愧曷已乾燥非常何時可飲未嘗如此寥落也人還謹啓為時自愛

專介辱書承此嚴寒為政外尊體休裕實慰企想某以衰病當此煩冗已三請江西要在正初必可得艤舟亭次寓目平山奉賢主人清論豈不豁然哉新春為時自愛

與常先生

歐陽永叔

相別累年書問雖缺而思慕盛德未嘗一日忘於心不審即日體候何似某碌碌於此國恩未報而衰病日侵進無少補於時退不得幅巾閑卷以從有道之樂豈甚區區向蒙寵示盛文一編究味意趣殊發蒙陋珍翫秘



藏未曾暫釋續更有新作苟賜不鄙無外開示至幸至  
幸深冬為道自重

與蔡省副二帖

歐陽永叔

昨日無以為禮深用慙醜宿來動履想佳然中席遽起  
遂不可留變此新例他時東齋之會敢不遵用故事也  
適得冲卿簡言原父已送詩云云殊未有一句欲借一  
拭目以發衰鈍三日欲去出城送冲卿能往否此不敢  
強閑及之昨日知與冲卿賞月必有餘樂某亦邀同輩

二三人談坐不飲殊亦鮮歡但飲冷過多又病真不能  
追逐少年矣前時烏絲欄輒留欲書其後尚未有暇適  
因尋書別得少佳者且納上聊資揮洒耳望之長言試  
為一閱後日方得奉見謹此啓布

與權郡國博

丘殿丞

河南五澹謹致書於權郡國博名公凡下某當以孤直  
被時廢黜自滌移歛於是郡四海之廣既無所容遂  
僑居於城之缺 貴地編氓首尾五載請官莊一區



謂之紫岩僦耕牛雇夫缺

錐刀以贍老幼值比年

俱旱租米不可輸今載尤甚飛蝗遮天蓋地仍新法畚  
耨更易綱紀千變萬化使官私不得其安伏遇閣下當  
仁廟朝嗣賢相國之後目覩變理規範洎出鎮巨藩布  
政行令細細大大如日星燦爛在上皆可閱視加之負  
英特氣雄毅過古人誠信色當世民情吏事毫髮無隱  
此乃大君子求瘼濟時之切也某在閑寂中於溫飽外  
值凶荒際比屋之中有利有害深欲俾於聞見徐而思

之况忝以道垂知己之遇豈敢惜其所得以犯乎僭易  
之責也謹錄其條件於左幸公暇稍賜一覽足表衰老  
者有憂天下之志也不宣

與徐君會少卿

邱殿丞

某頓首致懇於知府少卿君會麾下某六月五日遇中  
蒙貺書誨發膝藤踦誦之至追念恩獎不覺淒阻然久睽  
風鑒易遷冀朔但仰至交以道敦守願養有素豈非積  
善慶於祖先締仙風於孝嗣在乎今日也某回秋浦近



兩月餘值梅溽連綿江垞卑濕雖敞廬高爽奈陰沴煎  
熬多稼來牟例皆蕩去遠村近郭罕有按堵揣念故鄉  
必不至此某尚賴修鍊所守坦夷是任覩茲物態孰不  
憫嗟但醉飽之餘枕簟可恣或修合妙藥或晒曝古書  
或栽植蔬畦或補綴名畫散誕而過憤鬱都忘竊聆北  
樓清虛名園開豁池蓮畫麗山月多輝琴薦碁箋詩評  
茗訣溪鱗供饌厨醞新荔在布政之餘當無事之際營  
愆悉捐浩然自得亦足以優遊於考績之外也某以里

人來唁既還託附諛誠并新著三篇呈納冀助討論之  
萬一也

與曹輔之著作四帖

公皂至承示諭知來敝政之後撥據不易况食其祿豈  
憚勞苦尚須勉旃別俟遷擢某雖寄輦下未有生計但  
聚族蠶食而已矣頃於十二月二十日得替必離滁上  
四月上旬方到待相見如缺不替共謀久住計即且  
盤桓三四年如其不然則且隨花水缺居於潤州也



却請得二十五个月折卹及三節支賜粗可缺  
及春初之費矣勞生如此反被養家兒男俱不得力但危  
坐默思而已如諸令嗣俱有成立大志左右又何愁欽  
羨欽羨且自寬中謹節調為妙不宣

某泗上送吏回曾附書必達几下某十九日至滁孤苦  
寂寞不可言狀左右必哀感之令嗣想上京否且望早  
督之行為家中絕無人管幹二子一病一懦須得之管  
勾早圖船下來脫湯火之厄也切祝周親以某衰老送

到滁馬子告代步一兩程他不敢造次干浼

某啓白直至承示喻且審起居萬福喜慰可知也某一  
家幸平泰只是此月十日聖旨到候病痊日須令歸歛  
某兼為武林物貴生涯難營不如歸去更敢煩朝廷也  
但以年老不如求一安樂去處兼為呂郎中是故人大  
段為營置第宅侍某居住仍一切親友一一望歸也彼  
中飲膳柴米頗賤易為過朝昏桑榆之影寧有幾時若  
滿一百只有四十年在况造化不可測耳且自寬心養



道近日愈清健祖龍圖甚相愛恤津置前去極備恐知之左右偶疾且宜將息攝節為妙若此病未愈將來或移入廣中彼恐難為將息不如求取一監當差遣於江浙為妙浮生區區何必奔忙於名宦也請細忖之  
兩次欽州牙校上京曾奉書與令嗣上訂尊候必已達視聽也夏熱亮視政外安裕否某還里中親友相待甚厚頗得優穩因禍致福自古有之今復加修諫之功筋骸清健萬倍於昔時兼亦一家和樂無滌上困窘之苦

愚男彥武於豐口開一酒邸營生周給不勞憂念他日移命當有二廣之行况娶女是舊遊之地必可經從一相見也近得令嗣書知忽違和已會勿藥之喜以寬思繫貴閭各如式或牙校回者各望音繹便慰懷抱也

與張秘校

蘇東坡

報恩院主才公近有書及茶來猶以記文為言僕為憂患所縈擾幾不能脫正坐作文字耳已燔筆硯不復作一字矣且為道缺石觀音記特煩寄示豈敢作也干



萬察之

與高夢得二帖

蘇東坡

近辱臨訪喜接笑語從者遽還不盡區區人來領手教  
開諭累幅足見相屬之厚然稱述過當皆非所敢當僕  
舉動踈謬齟齬於世既忝相知惟當教語其所不逮反  
更稱譽如此是重不肖之罪也悚息悚息新闕尤增咏  
歎然柏舟之諷何敢當此諸事但旦暮默於事既無補  
祇益增嫉耳如因入城幸畧見顧未間珍重不宣

某遊門下久矣然未嘗得如此行朝夕繼見聞所未聞  
慰幸之極已別悵仰不可言經宿伏惟台候康勝不敢  
重上謁伏冀順時為國自重不宣

與徐安中

蘇東坡

寵祿過分煩致人言求去甚力而聖主特發玉音以信  
孤忠故未敢遽去然亦豈敢復作久計也老兄淹留如  
此終不能少為發明愧負何已宛邱春物頗感牡丹不  
減洛陽時復一醉否辱書伏承起居佳勝知辭還少緩



思仰勞賢者當進而久留不肖當去而不可得兩失其  
安可勝歎耶人還匆冗不宣

謝唐林夫

數日不接思仰可量陰寒伏惟起居佳勝生日之禮豈  
左右所當屈致又辱高篇借寵衰病感悚并集旦夕走  
謝奉啓不宣

與曾子開

蘇東坡

經宿起居住勝來日欲同錢穆父畧到池上扈駕還便

往公能來否別無同行穆父甚喜公來可携帽子涼傘  
行也可否示諭不宣

與達道

杜甫詩云張公一生江海客身長九尺鬚眉蒼謂張鎬  
也蕭之云用之則為帝王師不用則家谷一叟耳







五百家播芳大全文粹

宋 魏齊賢等 全編

卷六十七

尺牘

與吳樞密

張太尉

比者叨奉制恩入陪機政兼拙無取非所宜稱遠辱台翰重增惶懼秋爽未由瞻奉伏惟保衛

與蔡學士二帖

王伯庸



累蒙軒蓋見過便合躬詣館舍實以愁牽不敢遠出未  
果謁謝伏深惶懼辱索亂道謹呈藁草一卷不及令人  
錄上或寫畢幸莫封還并有奉送拙詩聊以將意不避  
取噓謹奉手啓  
使軒過都不得款奉睽遠又更時序良為耿耿茲承視  
事方欲馳啟先枉教幅珍重愧感何以云喻府事叢劇  
正煩經制暑中更願加愛不宣

與劉判監

張即中

近兩辱賜教極于勤厚感戴風儀非一日可既伏審日  
奉諮詢榮問休暢慰并慰并某被<sub>被</sub>中旨召書石經以字  
體小成於義當往但愧無以孤奉粉飾之私耳即日沂  
淮即泗舍舟而徒上元之前期至闕下投謁非遠預增  
欣快未間伏望上為邦國書神自重

與虞秘校

楊公濟

比入城莫得與公為集然以大暑伏牽于人事竟不能  
從容以教益論良不足也還家日欲馳問病懶遂成因



循比辱貶教尤荷存記仍審即時所養自勝聞行李非  
久西上咫尺深欲一見數日疾氣如焚復乏人船不果  
如願乍遠希自愛

與于朝奉

王舍人

間闊之久所欲致于左右者蓋不待言也前此被教以  
乍有職事未及上啟方圖少間附問專使辱賜書存諭  
勤款其所以慰鄙懷區區向仰之萬一若得<sup>侍</sup>得<sup>侍</sup>聲咳之  
餘也且審比日動止萬福上下一均休某竊祿承之

于此兩月矣自惟孱陋無所補助惟慙慙耳正遠言色  
切冀以時自愛不宣

與陸剛叔

周開祖

欽仰德誼為日益久第以疎遠末由參謁之期每深引  
向又不敢率<sup>爾</sup>以上手狀方此瞻依遽貶教賜此非謙  
厚之德發于誠心未易及此欽服不已伏審即日起居  
萬福豈勝慰擇跂望門闌甚遠邈無緣一造也左右以  
丐教益臨風重為依邑更期向時厚養以迎休命



與范奉禮

一官海隅浸成俗狀久因縣道未能擺脫此任已過滿  
數月而代者稽留未至遂致濡滯末由解去然敝邑宰  
竊隣治境得託于仁芘之下所恨賤迹非久代去不得  
久依賢者以觀善政為拙者師慕之法此私心之所悵  
然也尚賴餘芘因風敢乞見教

與孫大博

周開祖

不肖之迹竊同里閑講聞風誼為日益久最爾晚生無

由進望聲采但積欽仰茲者補官下邑復適治封仰託  
餘芘莫免謹斥而善政流聞多所師法退惟平昔鄉往  
之誠慰幸何可言者區、未獲造請伏乞節宣自壽不  
宣

與黃戶曹三帖

毛澤民

頃移病在家從人過門而不以時告逮作簡求館舍少  
遂區區已是還車之後矣辱教承未此見絕感愧感愧  
大熱起居勝常未即占見竊冀自厚不宣



久不奉款思馳飢渴強顏于此形影蕭然為魚之心夢寐去江湖間也願如吾兄尚屈州縣復何言哉大熱非人所堪眠食之外百事舉廢間惟挾策就枕相見千載人物也金丹多謝如此豈實堪驅策以助餘勇耶一笑適與客飯來介迫書以故畧甚於此甚廢事朋游益落寔願見公不可致大熱非人所堪掾舍如一大甑耳柰何杜門閱書時有所作不識畧借以間發無鄙

與葛興祖祕校二帖

王、樂

病中數辱書相期甚遠深見君子厚意感悅感悅某請郡雖懇堅執不果得免勉又當扶力朝恭美官清任乃使不<sup>才</sup>方賤蹇之身區處自視豈得安哉諸公教授舉人甚多而諸公偶遺盛德何為而棄之遲之以俟彙征之吉餘莫多愛

近得書不及附答復蒙惠問感戰良深某在告月餘羸尚未能愈向苦孿痺今寢成緩弱遠行久立力皆不任近時發滿悶乃知決是脚氣方書此候為劇不無憂懼



特奄然之軀迂疎之才尸占近職欲何之乎故每疾作  
屢丐閑退豈可以知止養恬自美實以官祿過量欲粗  
緩人鬼誅譴之謀耳足下徒以一日之知不深索其真  
有實堪者漫加進勉期以遠大昔所謂責賢望人之大  
道豈施于我輩者愧畏愧畏行求外補深負良箴承行  
田良休暫乞縣邑惟強寬勉備災之說文上事覈益見  
為學之用欽善欽善不宣

與唐夢博秘校

黃戶曹

賤迹之到金華首聞君子之美相望百里常恐不遂願  
見之鄙昔乃邂逅出自黃緣披晤雅風重為欽仰自別  
日欲上狀塵累無窮力或不給過承賢者曲有頌教感  
荷愧怍豈易殫陳即且未審動止何似共推道腴自足  
外愛每多清福也不肖已歸金華未期并合渴慕餘乞保  
愛不宣

與樓謙中秘校二帖

黃戶曹

講服德誼久之鄰封數舍無緣展覲方此趨府黃緣一



見游從累日而立談有古風出語無俗忌坦然索我於  
形骸之外而不啻十年之雅遠尔別去恍若有失但神  
馳而形留方此懸懸遽辱教墨且感且愧山色僻左如  
坐深井書史索之高閣而筆硯塵埃積有日矣未審何  
日得遂晤語有所啟發因風無吝惠音鞭所不及餘惟  
眠食自重

浦江事簡加之明君子相與裁治聞日中則庭無留人  
終日相對清談而已欽羨欽羨東陽山水固有之絕無

佳處但重崗峻壁雲崖鳥道要非人迹之所至時有驗  
定不免攀藤蔓緣蘿枝久之乃至絕頂下視萬仞之淵  
令人股栗而背汗當此時乃知五斗米不易得也塵埃  
奔走惟我為多而趨向高麗當君之所獨也居家迫以  
吏役出入畧無寧息鄉下得公書益深感愧跋仰風騰  
有馳情餘非筆舌之所能寄也

與林仲遠秀才

鄒正言

遠去左右倏忽累年下情仰德何可云喻即日尊候動



止伏惟迪吉某抱虛類宮未遂斥去餘託所逮良以為  
幸比來講習甚處所與共者謂誰公學術之優淹回久  
矣此舉當遂奮亨以光下交更莫淬厲正阻前見切希  
以時自愛不宣

與鄭武年宣義

蔡推官

伴來辱書見意竊承莅政之暇由閫而內共保康佳遠  
情深慰蹈考無少立但勉自全而已願無見恤清秋  
景物登臨感慨而又擾如川之逝吾何能久皓首高

志是以察為悲夫勞生竟止此耳某人持觴覽詠意思  
何如輟暇行樂人誰如之無自阻也時引望天末雲山  
相接君子不可見乃心何如萬：順時為重

與錢舍人三帖

蔣穎叔

舍人以職事得責此固賢人君子立朝之大節可無愧  
于古人矣名望事業固已素重于天下而由此又益加  
重在小人已為可唁而君子以君為可賀也士之進退固  
有義命不計于一日升黜之間則今日之貶安知不為



後日光大之漸也世俗慰藉之辭皆非之奇之所當陳  
左右惟汎然自豫不輟朝廷貶責之輕重隨所至而安  
之以俟進用者此憊之所望也

近附宗魯以手狀通門下亮塵視覽即日舟御伏計已  
至淮南尊侯萬福舍人以忠正得罪內無所愧者然朝  
廷之貶責亦太峻矣前來有此乃士大夫之深嘆而重  
惜者在不肖尤為悵然也公議自存滌蕩之行旦夕當  
還願幸以為道自處無以得喪經懷而安義守命乃區

區之望尚遠乞為國加重不宣

自舍人之貶所論者皆以歎處比承居之安然殊不少  
動心者蓋惟君子所造之深而有以自待也然臺列無  
一言以為援救而士夫議者頗不平之舟御必已還鄉  
里為將往之貶所也千萬自愛

與錢舍人君倚

孫少

向蒙賜書未暇修答忽聞有滌上之行自古君子立世  
未嘗此在有道者恬然無戚不為世俗所窺區之望



也滌雖窮僻有山泉飲食之樂能自處以理固無出處窮達之愧况君倚學深守固必能了此惟慎密勿以外事切：上百事自樂但時苦疾病然今頗康矣復何為哉窮而益堅斥而益高惟君倚勉之

與馮待制

呂濟叔

辱教且審興居之詳冬日不宜踈利切忌動臟腑也連日迎候亦以為勞不敢去求見恐息偃伯鎮之命固知必有謂也然無根之語尋常自明必有知之者而世路

難附甚矣俟面以罄不宣

與王承議

張司農

昨日承教還華嚴適少幹不及隨答深喜體中寒壅已安元正伏惟多納福休某罪廢弃固宜朋友所當貶絕而公且誨慰者有加弟自感惻然自此遂得息心于此庶幾古人真境之游矣雪開俟車馬之音慰此牢落不宣

與李太博

馮京



素未相知今遂得一見與君相愛懽如平生此以私跋  
遽爾分爾別豈勝不足其今且在洛陽粗遣遣不煩念及回  
首門墻傷如之何行矣自壽

與李龍圖

承示書深老慶耐嘗一到府解編陋但東園差勝耳同  
年七人皆動介甫何峻而君倚何衰也而君操又皆在  
極塞日與噲伍何其異耶年來志氣消沮蓋大憂累年  
不能堪之耳日夜惟望南歸湘湖予樂也寵友川賤至

愧至愧葡萄四籬輟附來价餘莫遵攀企攀企

與李大夫

黃祕書

某備吏府下久託下庇如嬰稚之慕慈親鞠育教誨無  
不周至仰惟願過之隆孰與儔比偶汙漕檄遠有千里  
之投亟去門墻曷勝眷戀中竊料中秋比還賤局時執  
事已被嚴召趣赴近班區：無所依附預深黯結之誠  
炎暑向盛倍祈精調寢餼別膺大邦之任虔頌不宣

與俞教授

馬朝散



違離未久感戀良深奉惟自還郡而來所履無他門中  
皆安也某月三日方渡江今留杭未能亟行幾望恐方  
北去益遠言笑千萬自愛不宣

與郭祥正太博

章子平

介來辱書并惠雜言及新詩十首啟緘伸讀感與抃會  
况然若掣雷掣電霹靂羣動使人魂驚鬼愕何氣噴之  
壯至於此耶冷然若冰壺雪竇激滌萬物使人骨寒而  
神灑何辭句之清至於此耶而又揮毫落紙洒然若龍

蛇之蟠蟄煙雲之卷舒使人心開而目明何筆力之精  
妙至於此耶天下之士其才性如功甫者孰為勅敵哉  
鄭毅夫吾叔表民及梅聖俞皆謂功甫為李謫仙之後  
身吾不知謫仙之年如夫子之少時其標格淵敏已能  
如此老成否惜乎賢士大夫未有以功甫之名為天子  
道者予既力弱而言輕難取信于當世又不能與之涉  
虛閣臨清流飛大白笑傲萬物聽玉聲之琅々憚然于  
中烏得而已耶春深氣暄強飯自愛不宣



與蘇世美殿丞二帖

沈獻達

近者幸得瞻奉實慰向往比復詣館轂乃承行矣即日  
伏惟榮歸待下動止休福不審車馬早晚東下會晤無  
由但審馳想暑甚敢希善愛以對光寵區、所望也  
近幸欵奉少慰傾向不審還止嚴邑動止佳否某區、  
更三五日遂歸明方遠言色千萬善愛子光居喪無恙  
尚未出數求見之欲借小舫至杭省親不知局中有與  
否不然僦一航亦可賤累且頌首矣

與呂尉

奉違未幾殊深馳向使至先蒙圓封為貺益用欽戰伏  
喜陰寒尊候均福慰浣慰浣至節不果前慶唯冀倍迎  
休社佇期亨嘉庶慰虔祝萬一也

與郭功甫太博

鄭毅夫

曩者辱示長篇病懶不即為謝前日劉推來又蒙手諭  
乃佳制之巨編讀之令人直欲仙去耳欽嘆欽嘆荊州  
事簡頗有勝境恨無健筆為之揮掃尤所懷想也初夏



加飡自壽

與曹輔之著作

舒信道

某啟侍堅道兄讀書于越之蒙山：枕湖氣象頗清絕  
復僻不接賓客援毫開卷間有倦色則短舟泛酒拾落  
果釣溪魚醉倒于荷月影之下無用之身所失如彼所  
得如此亦故不為世人笑也

與呂少府

向以狂妄見黜于朝毀于鄉人深自退縮不求聞達也

承累索文字某不敢辭拒復承過有譽許此乃見左右  
色荒溢美之情也餘留面目以盡區區

與蔡密學

張安道

乍此睽間良劇瞻詠使至承示盛詩辭旨精確句實流  
暢真作者之言欽服欽服樞密給事早在諫垣議論切  
直輝映前後今所視正皆時之急何不可之有不宣

與金華宰

陳郎中

近者有方臺之行而道出大邑承足下越數百里訪我



于山館經三四夕為之會聚舒笑相樂甚增方外之意  
昔有解體世紛浪情物表者茲焉無所愧別後闕于贄  
問惟瞻企粹表何勝依悒首夏希公外自重

與李通直

王通

昨日特承顧過良深佩仰得簡喜起居安適昨晚歸後  
懷缺

之景非人世所當有欲作一詩未有好

句以稱之徒為恨耳

缺

可以同見仲叟忙中不一

與李侍郎

孫巨

伏蒙寄惠妙墨尋滌硯試之其衆美備矣前後為充海  
太守者絕不留意都無以為比誠文房之至寶也銜荷  
厚恩無以為報愈銜荷無窮耳

與五道源殿丞二帖

李仲求

無狀被逐幸見故人暫聞玉音實慰蓬累辱示乎教并  
佳篇旨義高遠讀之感慨不能已已季長相見當為之  
盤桓况御史在舟必無他謗唯湖陰宛陵不得不覺察  
也呵：景純又未及拜狀敢煩致懇山野之性乍得脫



此輒復放縱臨紙不竟所懷惟自重以副馳情景純下  
問欲為易地之情此甚無妨願速投之從否計朝廷也  
不宣

繼奉二教又辱佳篇感歎無已冬仲加寒伏惟道氣冲  
勝南譙詩得安問陵陽佳郡景純賢守樓觀歌舞一時  
之盛道舊故為笑樂甚通無窮使印綬可投夜起待旦  
東望賢聚恨：耳二書輒寫以為秘藏更煩見索謹納  
行楮聞適外邑得無冒犯之勤日企還車以少餘論唯

祝自壽不宣

與周朝請

謝師直

中秋氣候肅索不審通日興居何似某無狀比讀書作  
詩飲酒皆懶不喜雅：暝目燕坐或眠耳然則尚得  
復為吏乎時得與方士語以解頤爾餘光無幾且求自  
便是為尚可暇一一為子孫計乎半夏陽起石防風之  
類如不貴切寄惠殊所切用也樂彼有而此不如者願  
勿惜也臨書馳結



與吳承務

秦太虛

窮冬急景佛舍蕭然甚無聊賴以此頗深企想不審公  
外履尚何如西臺法帖昨日方尋得謹馳上公家筆法  
妙絕如此何必不如他日所書乎繆禮更不敢為獻情  
恕幸甚

與范堯夫

秋來雨水頻仍聞府下民田多苦潦濕又蝗虫為害不  
審如何尚煩撫綏將下兵皆西行巡邏例闕人何以為

畫也此郡地帶高燥雨水差不為害田收可得七分又  
蝗虫自北來正礙秦山不衝山過乃稍循山向西南去  
以故到此者亦少二事俱為幸謾要故人咫尺阻奉言  
笑傾渴傾渴

謝李運使

元厚之

溽暑漸涼伏惟德履清勝欽企通者兒子來辱惠  
翰墨意愛加厚感慰無已小子愚駮足下以鄙夫故曲  
垂存照凡今之世觀勢厚薄為之輕重乃知賢者賦于



道義不為此態也銘感歎服切承漕事頗冗暫勞裁決  
王卿出陸而來必非晚休息矣未涯瞻對惟冀以時保  
重

### 荅丘道源

睽間近二十年各乘風波久不會遇瞻企盛德未始忘  
也去冬自朔部移番禹泛潁絕江踰嶺萬里四月到官  
六月遂還冒犯大暑一家番病次臨川女子傾逝今將  
其旅櫬西歸卜此月二十舉亡兄以下七喪歸葬先塋

到此旬日匆、少暇未敢入城須襄窆已事乃修人事  
前人見擇之言同年經遊在此方欲修問辱既真誨但  
深嗟感高年多難惟宜自寬腹疾亮漸良已下弦到府  
中郎詣門館餘須面布未間衷中自愛不宣

### 與張龍圖

邵興宗

首夏清和體履佳謚承出領留都涓日視事幸鄰封矜  
先辱緘誨何愧如之未涯覲集惟以時倍加保護匆、  
修謝不宣



答蘇子平

錢濟明

昨日竟不得一別為恨欲上問又未果乃頓手教先及感作無量餘暑伏承起居佳勝承遷居江上亦復擾：但丈君相對四壁生風自可樂豈可與向來同日而語耶煌害小及已破五十斛缺書所謂有本者與公正同也何緣晤歎萬：以時自愛不宣

與呂縣丞

衰病侵尋不能結茅山水間以遂魚鳥之性雖日杜門

未免拂逆緬懷淵明我醉欲眠抑當且去之適未易得也每念君家兄弟了然鸞鶴姿耳又復不得相與助翔雲杪向往可勝道哉了然近日出所惠教伏承履茲歲晏侍奉萬福某日益老懶百無所堪睡耳了然未只說閒話兩日之席已能使人習中珠琲跳出况吾弟久與之親耶亦聞有意見臨便欲倒屣須能屈就茅齋十日笑語若作子猷訪戴孤雲去來只堪留與問人傳作奇話耳如何如何未緣一奉笑燦子平或歸願及意餘覲履



端以壽親庭無疆之休謹奉手啓不宣

與陸奉議二帖

趙提舉

稍寒伏惟布政之餘動止增勝某不肖講服聲稱為日甚久比者獲倖永嘉而幸在鄰庇有若夙會方欲修問乃承賜教所以獎引之意良荷感慰而已尚遙叅候敢冀珍衛以須寵擢不宣比由治邑幸際顏論辱顧殊厚感愧弟增奉違逾月雖劇馳戀而到溫匆、未皇修問首承賜教曷勝銘荷冬凜伏惟自重不宣

與楊朝奉

陳伯模

僂伏高誼曠日持久此承下車阻遠不獲叅賀即辰嚴寒伏惟神決之暇榮候休福某鄙野無蹭蹬場屋始竊一命守官淮甸土廣事繁固非愚拙所宜當也到任經年粗免曠敗敝鄉有幸而得賢守久欲馳書上問尊候以賤局百冗出處不常用是稽緩深負愧慙臘窮春啟切祈若時自重以對光寵不宣

與李祕校

袁思正



前日持承左顧仍以奇文一軸見遺于不肖久此愧處  
乍窺高蘊如于葑屋獲觀驪珠光耀襲人畧無間斷一  
何偉麗卓絕以至于是耶感戢感戢春寒伏惟德履萬  
裕某今日適有數親客見訪未及詣左右專人聊此布  
謝萬一不宣

周朝宗二帖

陳留別後不復顏論者數年中問塵忝丁艱逮從仕官  
南缺上狀以承動止唯是向往之懷未嘗于左

右廢也早春氣候微暄伏惟尊體起居萬福某待次全  
椒在明年秋食貧里居殊無聊賴望塞垣幾三千里何  
緣叅晤臨紙不甚悵：餘惟眠食保嗇以對光寵不宣  
調官京還席未暇暖即督赴官去月二十七日到縣交  
割僻左山色邑聞見極少地褊迹寒何望知音解舍粗完  
園池亭樹畧有可觀處更得盜息事簡拙者私幸前日  
折腰起府愧汗浹背半生讀書出應其効若此信知平  
侍從慕他人正是業識去鄉不遠常冀流音以慰孤陋



五百家類書卷之六  
至望至望

黃魯直

領太平事八日奉朝廷罷歸吏部當復還荊州稍謀生  
事道出治部奉別才百許日乃得瞻望實慰馳情秋候  
小冷伏惟尊候萬福比晚詣賓次謹勒手狀不宣

春深多雨景氣未佳不審化境何如伏惟樂易之政民  
得職雨暘時若粟麥茂好神所相勞寢食且宜前者人  
還蒙教答且有招延之日感服無以為喻寓舍既完遂

成懷土未能即去荅仰察軼何日不勤謹附承動靜

承誨諭致蒲圻紙適家徑無悔蒲圻作慰即令往市紙  
名滓又薄厚不均色黑似不堪用有人惠分寧化紙差  
白但苦薄謾往五百或可作家書耳新雙井分上數之  
吸蕭君解岳陽尉歸廬陵乘鄂渚江至貴部欲得依高  
明得一舟至南康不審可否蕭君廬陵文士亦強毅有  
立不肖與渠父子游故輒恃眷與請之幸垂盼也

聞者往來道出治部過蒙地主之禮勤重千萬別來懷



想何日不勤頃至武昌即留居完葺民屋久之乃小完

是欲修記亦不暇即日春寒不審尊候何如伏惟晏息

安堵寢食之味神所相勞缺 避范德孺法當遷居輒

欲就貴部求自謀一舍不敢煩公缺 知有責降宮

觀人在貴州否某已具人舩聽誇諭乃發耳缺 有

親依之便望路欣謹勒手狀以承動靜缺 即日伏

想尊候萬福和父所苦想漸平否時有清集以謝缺

比見逐客之名未有在貴州者但疑孔毅父或歸來

耳然缺 屋在金陵不能無疑故不敢徑往依投耳

早得回書幸甚

奉別兩見秋暑懷想何日不勤中兩上狀不審皆得達

几案否不雨四十餘日歲事幾失望時雨三日甚慰人

意想貴部亦沾濡秋成有望憂民者可以加餐矣蕭彥

和解官去新通判謂誰相歡否某寓居蒙免末緣詹望

臨書馳情伏祈為國自重

比來不審尊候何如伏惟平易得民人有和氣寢食之



味神所相勞時：到廬山否孔毅父竟未否何元吉必時  
到樽前：書恐公茶具中有分茶盞有餘者乞一枚乃是范  
德儒所欲如有願報也外甥前繁昌尉洪羽謫處貴州當  
蒙庇賴欲得一安便泊家處願垂顧省率易恩濟亮明棟  
盛暑煩縟不審尊候何如伏惟平易近民：已信服府  
庭清淨飲食之味神所相勞頃者追盜急迫今必已肅  
然矣寄建溪茗此間無有草蟲扇又及時併深感刻紙  
是鄉中莊客所作品色極下但可代匱耳今再奉五百

價亦極平不必問也有小鈔妙者時分五七片足矣末  
緣瞻望臨書馳情伏祈為國為民自壽自重

昨蒙惠教勤懇并貺建溪珍品敬佩不忘之意即是霜  
寒不審尊候何如伏惟忠厚樂易風行偃草樽俎談笑  
自得江山之助承誨諭欲求閑冷恐不能無嫌也未有  
詹承之便臨書懷仰伏祈為民自重長使鰥寡得職  
奉承清談不能三日遂作遠別何能不惘然承旌旂晚  
即出城不審戾止寢膳安否千字文愈看愈好此字奇



書也遇知音必大賞之不肖何足惜重承囑累之勤謾書數字或附此書傳耳且暮起行臨書懷仰伏莫珍晉再拜上六舅安撫龍圖專人及寓遞兩奉委曲審下車南缺嘉靖慰喜無量即日天氣日涼想穰下雨餘亦有有秋之望頃自安樂來已半月五六月飲食起居皆佳也七兄到此留十餘日方行計五日以前必交局矣諸處皆得安問承遣十七到謝家詢知謝推被攝幕府書甚慰懸情耳阻叅侍忽欲五十許日曷勝傾渴伏祈為國

自重以綏百祿不備

李端叔十二帖

久別教席仰詠不能已暑伏舟行良苦尊侯起居何似區欽仰緒餘常有願親不足之懷於是又將西去瞻之望數千里未卜承侍之期臨書黯然敢冀季順自衛鄙誠千萬蓋非書所能盡切幸於照不宣

自承召命白計行李須郊外迎見遽領教墨深愧已後時矣將聞德誨咫尺欣完可知



兩日少故阻奉教席瞻向盛德義不少忘伏惟從者無  
恙承今日殿對遂即黼座問勞之際想慰淵衷佇望久  
之方從出局偶餞一舊僚明日當叩師几

久不承師誨雖一再具書而瞻仰孝：蓋非紙墨可致  
者其欲見之心不勝朝夕東引伏辱手書教曲記過存  
伏審赴台已次都邑霜寒尊候起居萬福出局遂造席  
末區：謹俟侍坐布露

孤若待盡久不得君子之教雖餘喘不復自理向往之

私惟日此詠<sup>北</sup>逋至忽奉手書藹然風義未忘罪罰而遷

官之度有愧為問之獨緩此日復不審為况何似恭惟  
庭闈康靖眷集均福書成尚在改歲常格所拘稍滯雄  
奮古者治定功成之際玩心神明而沉敏之才多後于  
躡等良務寬大以竦類求

自去冬南去即不與北事相接北歸亦不復可得<sub>不審</sub>  
涉春有以自樂否成書沓不聞期計已有序何日可西  
上公所謂信道篤而自知明者淹回歲晚不失為楊子



五百家類書卷之九  
雲更祈自厚以永終譽所承寵及益見作者之高興坐  
汨塵坐得能諷詠之無窮也感服感服自餘頻寄聲聞  
暑中不審旅食何似瞻企盛義無從請叩區：可知高  
文從來饜觀然未敢廣傳朝入邈暮徧天下矣何時再  
幸占歎病滿之餘草略不宣

寒色伏惟尊履清勝眷聚無恙至節目阻陪樽下為壽  
可勝祈禱不肖職事粗爾乍到冗瑣病滿殊不支仰思誨  
言馳情無既昨晚西來拳：有道君子引企旦：不知

其勞耳盛寒珍重時望惠音不宣

前日連獲手教并盛文二篇曛黑索燭未及恍如在日  
圍中矣既而研味高致非特奴僕命騷人不知三代以  
來作者尚目分路揚鑿已否神遊不遠踈然數日脾氣  
作憤：如醉人無緣款曲承誨以卷別後牢結可知舟  
從定在何日行毒煞踳伏不易處吾生不如意事十常  
七八每於左右眷：尚覲新春東去再尋杖履之適自  
餘不惜音驛交馳惟君勉强於我也千萬垂亮近附遞



修記當浼左右兩日連捧賜教爛然禮意兼幅不能盡畧其愚陋尋繹所賦浩乎若決天漢之瀦而渚之廣莫之野難堪眷過重為愧戴伏惟待敵里中德况佳豫眷聚寧勝昔龐士元為南州士人之冠以世論之則兵戈之際與夫一道德同風俗蓋今日之盛也吾不知賢士大夫能相先高明以掠士元之美否區區願慕之誠非尺書可道指日以茲言歎

伏蒙不鄙孤陋過示盛文大編衍溢法然雖前日蹈海未能若此文章久不到此惜乎先帝不與見也然神遊不遠固當有享輒已傳錄願少寬假數日前日偶誦一二對於同舍中徵索者紛紛日不自給瓌傑偉麗聳動一至於此尤劇賞慕

春物已闌斑而寒色尚此偃薄不審比來起居何似茂惟神之聽之福祿攸肩望門墻於數十置之外謁奉未涯仰異順令倍萬綏將即日異擢謹上



五百家播芳大全文粹

五百家播芳大全文粹卷六十七



國家圖書館, NATIONAL CENTRAL LIBRARY, TAIWAN, R.O.C.



五百家播芳大全文粹

宋 魏齊賢等 全編

卷六十八

尺牘

寄劉共甫樞密

張南軒

程先生易得樞密錄未傳達實學者之厚幸夫所謂易者何哉聖人之言曰生之謂易又曰天地定位而易行乎其中矣又曰乾坤成列而易立乎其中矣此豈獨



謂此數卷書予其必有所謂矣而此數卷之書所以述其蘊也言有盡蘊無窮故學者必於言意之表識易易而後易可讀也項文定春秋此路有邵陽本字差小弒所看舊日嚴州本謹納去春秋即事而明天理窮理之要也樞密觀此書取其大義數千斷為定論而詳味其抑揚予奪輕重之宜則有以權萬變也

鄰民望樞密之至不減赤子之於慈父使人興嗟嘆仰然某之愚有敢為先事之獻者輒以布之某觀近世再

臨舊鎮者聲望率減於前或曰上下翫習之故某以為無是理殆由在我者有忽之之心耳前者既以得譽及其復來將曰此易治耳是一萌則敬肆分宜乎美惡之不同也而况樞密今此之來執位益尊聲名益重則下民之情將有不敢以自盡者隔絕雍塞之患此亦不可以不慮也易曰德言盛禮言恭此言德貴於盛而禮貴於恭也伏惟樞密警懼存心益敬其事謙虛自處不負其有降其辭色惟恐不及使匹夫匹婦之情皆得以



通而士大夫有懷皆得以吐露至於箴規指摘畢聞于前而無所<sup>謂</sup>不敢者則善政日新而無數矣此豈唯一路之幸實經綸之業益以廣大將國家是賴而天下之福也昔人自逆於境逆于郊既觀聽于詞色而議之蓋人心之向背首謹於此時用敢陳于未及境之前側承風聲以慰願望

寄周子充尚書

垂諭或謂人患不知道知則無不能行此語仍未完知

有精粗行有淺深然知常在先固有知之而不能行者矣未有不知而能行者也語所謂知及之仁不能守之是知而不能行者也所謂知之者不知好之者好之者不如樂之者是不知則無由能行而樂也且以考於親一事論之自其粗者知有冬溫夏清昏定晨省則當行溫清定省行之而又知其有進於此者則又從而行之知之進則行愈有所施行之力則知愈有所進以至於聖人之倫之至其等級固遠其曲折固多然亦必由是



而猶可至焉耳蓋致知力行此兩者工夫互相發也  
尋常與朋友講論愚意欲其据所知者而行之行而思  
之庶幾所踐之實而思慮之開明不然貪高慕遠莫能  
有之果何為哉然有所謂知之至者則其行自不能已  
然須致知力行工夫至到而後及此如顏子是也彼所  
謂欲罷不能者知之至而自不能以已也若學者以想  
像臆度或一知半解為能道而曰知之則無不能行是  
妄而已曾皙咏歸之語亦可謂見道體矣而孟子猶以

其行不掩為狂而况下此者哉不識高明以為何如問  
及此間相從者某邇來退縮豈敢受徒但有舊日子子  
數輩時來講問亦不過以行遠自邇登高自卑之方語  
之耳所謂晚輩假竊先儒之論以濟其私者誠如所憂  
胡文定蓋嘗論此然在近日此憂為甚是以使人言學  
之難非是不告語之正恐竊聞一言半語返害事耳要  
亦如金石之言辨即其行實夫豈恟疑虛鳴可掩哉文  
定所論甚詳備在文集中曾見之否



垂論近世學者徇名妄實之病此實區之所憂者但學者徇名妄實而遂謂學之不必講似因咽廢食耳後世盜儒為害者多矣因夫盜儒之多而遂謂儒之不可為可乎熙寧以來人才頓衰于前正以王介甫作壞之故介甫之學乃是祖虛而無害實用者伊洛諸君子蓋欲深極滋獎也所謂聖人誨人有先後學者進德有次第此言誠是也然所謂先後次第須要講明譬如適遠豈可不知路之所從不然只是實行而已至如所謂不

可以聖賢自期者則非所聞大抵學者當以聖賢為準而所進則當循其序亦如致遠者以漸而至也若志不先立即自棄為尚何所進哉所欲言者要須面盡

答潘端叔

大抵讀經書須平心易氣涵詠其間若意思稍過當亦自失却正理要切處乃在持敬若專一工夫積累多日然體察有力只恐難言語上苦思未是也事親之心至親古人至切謂起敬起孝起字須要深身體而用力焉



與顏主簿

竊觀左右論程氏王氏之學有兼與而混為一之意此則非所敢聞也學者審其是而已王氏之說皆出于私意之鑿而其高談性命特竊釋氏之近似者而已哉夫竊取釋氏之似而濟之以私意之鑿故其橫流蠹壞士心以亂國事學者當講論明辨而不屑焉可也今其於二程子所學不翅霄壤之異白黑之分乃欲比而同之不亦異乎願深明義利之判反求諸心當有不待愚言

之辨者惟深察

近玩味已發未發於日用間甚覺顯煥周子識通誠復之說極有理也伯達書來亦說及善不足以明之說某所答曾見否大抵當時知言中如此說要形容人生而靜以上事却似有病故程子云天命之謂性人生而靜以上更不容說纔說性時便已不是性凡人說性只是說得繼之者善也此猶云天下之言性者斯言最為盡之蓋性之淵源惟善可得而名之耳晦叔意如何數日



來看龜山集乃知前輩所造如龜山輩未易輕議也仁  
右道左之說伊川所以有取者亦嘗思之仁字對道字  
而言乃是言周流運用處右為陽而用之所行也左為  
陰而體之所存也仁者天下之正理此言仁乃天下之  
正理也天下之正理而體之于人所謂仁也若一毫之  
偏則失其正理則為不仁矣道也者不可須臾離也可  
離非道也道無往而不存遺書中所謂道外無物物外  
無道即父子而父子在所親即君臣而君臣在所敬是

也如何離得人之所以不能體道者以人為之私蔽之  
也人雖蔽于私不能與道為一然道未嘗離也明道與  
韓持國論克己一段反復此意甚詳所宜深味耳辱垂  
問据鄙意言之要非尺紙可盡未知是否却幸見諭近  
季隨寄物齋隸字并諸書來某報之以頽榜既設所冀  
顧名思義惟日孜孜焉而後可因見時警策之章也再  
玩所為詩語意固佳但如雲清窓涵月春回木放花只  
說得克後意味却於忽處少力觀顏子請問其目而孔



子所以告之者正是告克己之日顏子請事乎此乃萬世標準學者但當深告以勿字工夫致後自會見得若遽說克後意味又恐使之只貪想象之見工夫滅裂耳此亦不敢不告非惟告人在我所當謹也

### 答朱元晦

示及諸君操舍出入之說呂子約所論病痛頗多後二說亦頗得之然其間似未子細按孟子此章首以牛山之木為喻又以夜氣為說而引孔子之言為證以明人

之不可不操而存也心本無出入然操之則在此舍之則不在焉方其操而存也謂之入可也本在內也及其舍而亡也謂之出可也非心出在外蓋不見乎此也無時者言其乍入乍出非入則出也莫知其所止也此大槩言人之心是如此然其操之則存者是亦可見心初未嘗有出入也然則學者其可以不主一為務乎呂子約之說既誤以乍存乍亡為感之用而後說如謂心之本體不可以存亡言此語亦未盡存亡相對雖因操舍



而云然方其存時則心之本體固在此非又于此外別尋本體也子約又謂當其存時未能察識而已遷動是則存是一心察識又是一心以此一心察彼一心不亦膠擾支離乎但操之則存操之之久且熟則天理寔明而心可得而盡矣

中字之說甚密但在中之義作中外之中未安蘇季詳明再問伊川答之語自可見蓋喜怒哀樂未發此事蓋在乎中也只如是涵養才於此要尋中便不是了若

只說作在裏面底道理然則已發之後中何嘗不在裏面乎幸更詳之又中庸之云中是以中形道也喜怒哀樂未發之謂中是以中狀性之體段也然而性之體段不偏不倚亭、當、是固道之所存也道之流行即事即物無不有恰好底道理是性之體段亦無適而不具焉如此看尤見體用分明不識何如忠恕之說如來論精義序引亦已亡疑言仁已載往返議論於後今錄呈所論一字若如老子以形而下者言則可與二三通



數若如知言指道而言則難於復與器通數二三也心譬之水一節某意謂孟子只將水無有不下比人無有不意善味極究性情之理具矣今將心譬之水去水上用意差排許多字固不為異義但恐終費力耳所論知言中餘說再三詳之未有疑可復也

天命之謂性所解立言極明快但率性之謂道竊疑仁義理智是乃道也今亡猶往之仁則有所謂父子之道却恐費力更幸瑩之又如審其是非而修之則知之教

無不充之類亦未穩當此首章三語以某所見更須詳味伊川先生遺書中語每多方欲下一轉語俟却錄去求教也在中之說前書嘗及之未知如何中者性之體和者性之用恐未安中也者所以狀性之體段而不可便曰中者性之體若曰性之體中而其用則和斯可矣

仁之說前日之意蓋以為推原其本人與天地萬物一體也是以其愛無所不至猶人之身無分寸之膚而不



貫通則無分寸之膚不愛也故以惟公近之之語形容  
仁體最為親切欲人體夫所以愛者言仁者蓋言之矣  
而以所言愛字只是明得其用耳後來詳所謂愛之理  
之語方見其親切夫其所與以天地一體者以夫天地  
之心之所存是乃生之之蘊人與物所公共所謂愛之  
理者也故探其本則未發之前愛之理存乎性是乃仁  
之體者也察其動則已發之際愛之施被乎物是乃仁  
之用者也體用一源內外一致此仁之所以為妙也前

日所謂對義禮智而言其發見則為不忍之心非謂  
義禮智與不忍之心均為發見正謂不忍之心合對義禮  
智發見者言羞惡辭讓是非之心是也今再詳不忍之  
心雖可以包四者然据文勢對乾元坤元而言恐只須曰  
統言之則曰仁而已可也或云天地其德有四云云而  
而統言之則無為善之長人之心其德亦有四云云而  
統言之則仁為入之心如何前日所謂元之義不專主  
於生物者疑只云生物說生之意不盡今詳所謂生



物者亦無不盡者矣在中之義程子曰喜怒哀樂未發只是中也蓋未發之時此理亭、當、渾然在中發而中節即其在中心理形乎事、物、之間而無不完非是方其發時別為一物以主張之於內也情即性之發見也雖有發與未發之殊而性則無內外耳若夫發而不中節則是失其情之正而淪其情之理然能返之則亦無不在此者以性未嘗離得故也不識如何

共父相處二年心事儘可說見識但覺日勝一日亦不

易得作別殊使人闕情也君臣之義要須自盡積其誠意庶幾感通是間若有一絲毫未盡則誠意已分烏能有動乎孟氏敬王之義所當深體也所寄諸說亦備觀大槩林擇之思慮甚親可重可重鄙意有欲言者不敢隱容後更一、寫去共講論也近來此間相識却是廣仲晦叔甚進德美已入書院生徒十五六人但肯專意此事者極難得耳

近世議論真所謂謀其身則以枉尋直尺為可以濟



事謀人國則以忘親苟免為合於時變世間號為賢者  
墮在此中况其他哉此風正熾正道湮微率獸食人甚  
可懼也吾曹但能相與講明至學之明於下庶幾有正  
人心承三聖事業耳

某幸如昨但自家第赴官極覺離索之思耳日夕不  
敢廢學第覺向來語言多且易只欲自做工夫讀所寄  
來伊川先生簡語尤用悚然不知尊兄意如何每玩來書  
未嘗無警益愈恨相去遠未得聚首耳中庸義邇來

細讀自誠者天之道以下尤覺所解有工前而於鄙意  
尚多疑處今復旋具呈子重編集解必經商量刊成願  
得之此書極有益也傳心閣銘序語誠贅刪之甚佳尤  
溪學記此本勝前之本大抵意不甚達耳某近為邵州  
作復舊學記其間論小學大學意偶亦相類錄呈今猶  
未刻有可見教尚冀速示也岳麓書院邇來却漸成次  
第向來邵懷英作事不着實大抵背向傾懷幸得共父  
再來今下手草也書院相對後山頗有形勢屢為有力



者睥睨作陰宅昨披棘往看四山環遠大江橫前景趣  
在道鄉碧虛之間方建亭其上以風雲名之安得杖履  
來共登臨也它幾以道義自重

知言疑義反復甚詳大抵於鄙意無甚疑而所以開發  
則多矣其間數段謹錄呈今自寫出再看又覺此內亦  
有不必寫去者亦且附往論語仁說區々之意見學者  
多將仁字做活絡揣度了無干涉如未嘗下博學篤志  
切問近思工夫便做仁在其中矣想像此等極害事故

編程子之說與同志者講之庶幾不錯路頭然下語及  
難隨改未定方另錄呈亦俟諸老行寄去讀史管見當  
併往近看此書病敗不可言其中間有好處亦無完篇  
耳看元來意思多是為檜設言天下之理而往々特為  
譏刺一夫不亦隘且陋乎編通鑑綱目極善以鄙見每  
事更采舊史尤佳恐通鑑亦有所闕耳遺它懷併須後  
訊

晦叔留此句餘備詳動止繼而游掾來亦能道近况狀



釋為多見前後與諸人論操舍出入之說剖析極仔細  
最後答游掾之語尤完呂子約雖知聖人此四句正是  
論心然未能明別其間始終真妄邪正之所歸故遂指  
其乍存乍亡為感用此其差示不示來示似未以此告  
之耳近因游掾來會理出入字有答之語錄呈未知  
尊意何如易與天地準章後來愚意亦近是然不如來  
說之詳明更不寫去

某飲食起居皆幸已復舊向來且欲完養此數日方出

報容城南亦五十餘日不到昨一往焉綠陰已滿湖  
水平漫亦復不惡方於竹間結小茅齋為夏日計雨潦  
稍定即挾策其間也嘗令畫圖俗工竟未能可人意俟  
勝日自往平章之方得寄往耳伯恭近專人來講論詳  
細如此朋友真不易得但論凡出處引周可受之義却  
是未然又向來聚徒頗眾今歲已沙遣然渠猶謂前日  
欲引而引之以善道某為來者既為舉業之故先懷利  
心恐難納之于義大抵渠凡事似於果斷有所未足



游誠之資質確有志世故心實愛之但正宜為學不然恐未免為才使今歸必首去求見某以乍出人事頗多故遣此紙早晚樞帥又自有入行也孟子解渠却錄未畢樞處却將寫來了當祝封呈餘幾為道自重

某匱勉為州不敢不敬深惟聖人心誠求之與以人治人之義庶幾萬一而未之能也幸人精粗情相安蚕麥差孰丁稅朝廷蠲末等無常產之輸七萬餘緡稍寬目前但弊根不除少頃吏力論之唯是興利之臣日進將恐

多所紛更孤迹其可久於此耶

某出入省戶日負素餐反復古義不違寧處晦叔行時已畧言所處大概有以告之是望區區在此不敢不盡誠正恐學力不到無以感動惟悚懼耳正論極微假借為此論者未嘗了然于義理之所在而徒遭回於利害之末途自顧藐然之身其將何以障此波瀾然苟留一日不敢不勉用是瞻仰不勝言伯恭鄰牆日得晤語近來議論甚進每以愚見告之不復少隱也



日省中歸即閉門溫緯舊學向來所見偏處亦漸有  
覺但絕少講論之益無日不奉懷耳西銘近日嘗讀理  
一分殊之旨龜山後書終未之得蓋斯銘之作正為學  
者私勝之流昧無天理之本然故推明理一以極其用  
而其分之殊自不可亂蓋如以民為同胞謂尊高年為  
老其老慈孤弱為幼其幼是推其理一而其分固自在  
也故曰分立而推理一以止私勝之流仁之分也龜山  
以無事乎推為理一引聖人老者安之少者懷之為說

恐未知西銘推理一之指也闡範之說極佳即以語伯  
恭矣只如此讀過誠可戒也伯恭近來儘好說話於蘇  
氏父子亦甚知其非向來見渠亦非助蘇氏但習熟元  
祐間一等長厚之論未肯誦言排之耳今亦頗知此為  
病痛矣孟子答公都子一章要須知此方為聖賢作用  
此意某見得但力量培植未到要不敢不勉耳此語到  
此尤覺難說邪說甚熾人心消蕩一至於此每思之不  
遑寢食也奈何奈何



某出入者戶日愧無補所以見告者所謂實獲我心但請對之說容更思之區、本欲俟轉對、却在正初又恐遲耳自念學力未到誠意不能動人只念退歸勉其在戎者然竊念吾君聰明勤勞不忍只如此舍去當更竭盡反復剖判庶幾萬一拳、之心不敢不自勉惟吾兄實熟知之、寫至此不覺酸鼻也

西銘之論甚精乾稱父坤稱母之說某亦如此看蓋一篇渾是此意也但所論其間有一二語卻意未安俟更

為精讀深思方報去所貴十道者二上蔡之說誠欠却本來一段工夫二程先生之言真格言也某近只讀易傳及遺書益知學者病痛多立言蓋未易也知言之說每段輒書鄙見于後有未是處却索就此簿子上批來庶徃復有益也近來又看得幾段及昨日讀寄來者皆未及添入俟更詳之後便寄去

某邇來思慮只覺向來所講之偏揚然內懼而不敢不勉每得來書益我厚矣蓋諸君子徃、因有所見便自



處高執之固後來精義更不可入故未免有病若二先  
先其猶一氣之周流乎何其理之該而不偏辭之平而  
有味也讀遺書易傳他書真難讀也西銘所謂理一而  
分殊無一句不具此意鄙意亦謂然來示亦盡之矣但  
其間論分立而推理一與推理以存義之說頗未相同  
某意以為分立者天地外而萬物散殊其親疎皆有一  
定之執然不知理一則私意將勝而其流弊將至于不  
相管攝而害夫仁故西銘因其分之立而名其理之本

一所以謂止私勝之流仁之方也雖推其理之一而其  
分森然者自不可亂義蓋所以存也夫抵儒者之道為  
仁之至義之盡者仁立則義存義精而後仁之恥為無  
蔽也似不必于事親事天上分理與義亦未知是不曾  
子之言二先生互相發明可謂至當知言疑義前已納  
矣今所寄尤密方更參詳之伯恭近日儘好講論喬拱  
在此如此等士人甚難得潘友端年方十七而立志殊  
不凡皆肯用力潘令暫歸省俟其來皆令拜書去求教



李伯諫林擇之兄弟各有報書陳韓在此時相見亦肯  
回頭乃願草耳某近因與喬潘考究論語論仁處亦  
有少說續便錄呈晦叔猶未得到長沙書共父想已過  
九江探伺渠到家專人言之是時亦得拜書憂患中正  
疑進德此有賴于死也今日達官似有不逮之故愛之  
尤深而責之尤重耳元履所謂但證候少變者鄙意亦  
云爾遺書當更令修治

某備數於此自仲冬以後凡三得對區區之誠不敢不

### 自竭

上聰明反復開陳每荷領納私心猶有展幾乎萬一之  
望正幸教誨之及引領以冀也講筵開在後月自此或  
更得從容以盡底蘊惟是迹孤愈甚側目如林此則非  
所計也劉樞歸想得款曲憂患中益進德業異時當大  
慰人望晦叔以行未耶聞其歸計費力極念之亦有一  
書不知尚可及否大極圖解析理精詳開發多矣垂誨  
甚荷向來偶因說話間妄為他人傳寫想失本意甚多



要之言學之難誠不可容易耳圖解須仔細看方求教  
但覺得後面亦不必如此辯論之多只於綱領處拈出  
可也不然却只是騁辨求勝轉將精當處混汨耳如何  
某也勉南來視事踰旬矣廣右比之他路最為廣莫而  
彫瘁則最甚蠻落昨盱邊備寡弱日夜闕慮固當以安  
靜為本然要項在我有隱然之勢則安靜之實乃可保  
方考究料理不可苟目前也遠方法度廢弛惟以身率  
之立信明義庶幾萬一諸路土丁祖宗良法今虛籍雖

存而其實都亡方尋繹舊規若此事有緒庶幾邊防  
差狀瘁誠之已來未到也南來朋舊濶遠殊重離索  
之歎偶府中遣人買茶畧附此紙少定專人去相看共父  
想已到建康責任甚重臨行亦畧獻區區也

某守藩已八閱朔矣佩聖人心誠求之訓味哀矜勿  
喜之言日夜甬勉悚惕之不暇所幸綱紀粗定人情頗  
相信向又歲事極稔盜賊屏截目前僥倖無他而環視  
一路可寒心事極多邊備兵政亦隨力葺理保甲一事



亦頗有條流惟是自靜江之外諸郡歲計闕匱異常  
甚至官吏之俸軍兵之糧此亦何以為郡坐是民愈困比  
有請願與漕憲共考究一路財賦底裏通融均濟之計  
幸蒙賜可才此詳講熟慮庶幾有少寬然其間曲折亦  
多又不敢遠速也學校畧與整修士子中亦有好資質  
時呼一二來郡齋與之講論庶知向方三先生祠甚設  
有小記納去凡此不敢不盡區區耳官僚其初頗有拘  
束之歎蓋習于放縱已久今却極相安有樂趨事之意

其間亦有數人慙實可委其餘隨力使得自展有不率  
者先之於訓篤不悛而後加之以法邇來覺得斂縮者  
多也此路向來盜賊之多正緣配隸之人萃焉例皆逃  
逸為害比嚴首捕之科明其賞罰接踵而至幾無日無  
之收其強壯以為效用故少戢也然廣中之人亦自多  
犯法徒流常有刑不足以勝姦宄使人愧懼恐兄見念  
欲知其詳故縷縷及之靜江氣象開廓風氣疎通覺得  
無瘴癘寒暄之候殊不異湘中環城諸山奇變柳子厚



所謂拔地峭壁林立四野此語足以盡其大槩近觀水  
東諸岩空明寬敞惟龍影最為矇絕蓋在小溪之濱水  
貫其中深窈潏狀以舟入焉石青特清潤磷駁變怪殊  
可喜也某日間亦得暇讀書但覺向來語言多所未安  
尤不敢輕易立辭中庸末章自衣錦尚綢而下反復引  
詩明慎獨始終之道區、朝夕惟從事於此而未之有  
進也誠之在此極得其助讀中庸章句晦叔許一來已  
遣人取之旦夕可到相與講磨少慰離索也共父回得

書請祠之意甚濃聞所施為大抵類長沙長沙之人至  
歲緣茶賊之擾害甚思之但某前書勸渠謙虛使人得  
以自盡人才大小皆有用處而報書謂到江上尤不見  
有人才某竇懼此語天下事豈獨智力能辦通都會邑  
豈無可累使者恐吾恃聰明以忽之彼無以自見耳若  
當天任恐有所妨方欲作書亦望兄自以己意開廣之  
今日違官如是公誠亦不易得望之深耳伯恭今次講  
論如何得渠書云兄猶有傷急不容耐處某又恐伯恭



却有太容耐處然吾曹氣習之偏乘間發見誠難消化  
想兄存養有道如某病痛多兢之不一逞正有望時加  
砭劑也陸子壽兄弟如何肯相聽否子澄長進否擇之  
亦久不聞問矣無咎昨寄所編祭儀及呂氏鄉約來甚  
有益于風教但鄉約細思之若在鄉里願入約者只得  
納之難于揀擇若不擇則或有甚敗度者則又害事擇  
之則便生議論難于持久兼有所謂罰者可行久之更  
須詳論精處若閑居行得誠善俗之方也賀州有林君

勲本政書想亦須見謾附一本其間固多未盡然其人  
一生用不於此其說亦着本可貴此外又於其家求得  
數書有論屯田項目亦甚有工才抄錄續當奉寄此  
公所至有惠政乃是廣中人才之卓然者殊惜其不得  
施用也所欲言甚多未易殫究餘見別紙

答晁得美

垂諭之詳再三誦之正所望於良友者但鄙意不能無  
疑如自滅天命固為己私一段恐錯斷文句故失先生



之意已於季立書中言之矣想必須見幸更深思平心  
易氣無為己私橫截斷處乎其有取矣知言序可謂犯  
不避其教處極幸但亦恐有未解區區之懷處故不得  
不白如云夫子未嘗知言性子思中庸首章獨言之  
此蓋是設或問之辭故以或曰起之然云指言則謂如  
天命之謂性是指言也其他說話固無非性命之奧而  
非若此語指而言之也故于答之之辭中引子貢之語  
以為夫子之言無非天命流行發見也意則可見矣更

幸詳觀却以見教若夫辭氣不足以發則誠陋之故也  
來書雖援引之多愈覺泛溢天抵是舍實理而駕虛設  
忽下學而驟言上達掃去形而下者而自以為在形器  
之表此病恐不細正某所謂雖闢釋氏而不止墮其中  
者也故無復窮理之工無復持敬之妙皆由是耳某近  
來反復思之不可為不盡言惟天資慤茂必能受朋友  
之實攻若忽而置之曰吾所謂自高妙矣則僕亦不敢  
進說于進也然某之見亦豈敢以為便是哉願更講之



五百家播芳大全文粹

耳

五百家播芳大全文粹卷六十八



五百家播芳大全文粹



五百家播芳大全文粹

宋 魏齊賢等 全編

卷六十九

尺牘

與張欽夫書

前書所稟寂然未發之旨良心發見之端自以為有小異於疇昔偏滯之見但其間語病尚多未為清切比遣書後累日潛玩其於寶體以益精明因復取凡聖賢之



書以及近世諸老先生之道語讀而驗之則又無一不合蓋平日所疑而未白者今皆不待安排徃々自見洒落處始竊自信以為天下之理其果在是而致知格物居敬精義之功自是其有所施之矣聖賢方策豈欺我哉蓋通天下只是一箇天機活潑流行發用無間容息據其已發者而指其未發者則已發者人心而凡未發者皆其性也亦無一物而不備矣夫豈別有一時拘於一時限於一處而名之哉即夫日用之間渾然全體如

川流之不息天運之不窮耳此所以體用精粗動靜本末洞然無一毫之間而鳶飛魚躍觸然朗然也存者存此而已養者養此而已必有事焉而勿正心勿忘勿助長也從前是做多少安排沒頓着處今覺得如水到船浮解維正柁而沿廻上下惟意所適矣豈不易哉始信明道所謂未嘗置纖毫之力者真不浪語而此一殿事程門先達惟上蔡謝公所見透徹無隔礙處自餘雖不敢妄有指議然味其言亦可見矣近范伯崇來自邵



武相與講此甚詳亦歎以為得未曾有而悟前此用心之  
左且以為雖先覺發明指示不為不切而私意汨漂不  
見頭緒向非老兄抽關啓鍵直發其秘誨論諄不以  
愚昧而捨置之何以得此其何以感幸如之區、筆舌益  
不足以為謝也但未知自高明觀之復以為如何爾孟  
子諸說始者猶有齟齬處一二條陳以請今復觀之  
恍然不知所以為疑矣但性不可以善惡名此一義某  
終疑之蓋善者無惡之名夫其所以有好惡者特以好

善而惡：耳初安有不善哉然則名之以善又何不  
可之有今推有好有惡者為性而以好惡以理者為善  
則是性外有理而疑于二矣知言于此雖嘗著語然恐  
孟子之言本自渾然不須更分裂破也知言雖云爾然  
亦曰粹然天地之心道義完具此不謂之善何以名之  
哉能勿喪此則無所適不為善矣以此觀之不可以善  
惡名大似多却此一轉語此愚之所以反覆致疑而不  
敢已也



答何叔京

心說已喻所謂聖人之心如明鏡止水天理純全者即是存處但聖人則不操而常存耳衆人則操而存之方其存之亦如是此但不操則不存耳存者道心也亡者人心也心一也非是實有此二心各為一物不相交涉也但以存亡而異其名耳方其亡也固非心之本然亦不可謂別是一箇無存亡出入之心來換却只此是心但不存便亡不亡便存中間無空隙處所以學者必汲

汲於操存而雖舜禹之間亦以精一為問也且如世之有安危治亂雖堯舜之聖亦只有是治亂而無安危耳豈可謂堯舜之世無安危治亂之可名邪如此則便是向來胡氏性無善惡之說更思之却以見教

答石子重

心說甚善但恐更須收斂造約為佳耳以心使心所疑亦善蓋程子之意亦謂自作主宰不使其散漫走作耳如孟子云操則存云求放心皆是此類豈以使彼之此



王百家抄方大全卷九  
謂邪但令人着箇察識字便有箇尋求捕捉之意與  
聖所示操存主宰之味不同此毫釐間須看得破不  
爾則流於釋氏之說矣如胡氏之書未免此弊也昨  
日得京叔書論此殊不快答之如此

再答何叔京

伏蒙示及心說甚善然恐或有未盡蓋入而存者即是  
真心出而亡者亦此真心為物誘而然耳今以存亡  
出入皆為物誘所致則是所存之外別有真心而孔子

之言乃不及之何耶子重之論病亦如此而子約又欲  
并其出而亡者不分真偽皆為神明不測之妙二者蓋  
胥失之某向答二公有所未盡後來答游誠之一段方  
稍穩當今謹錄呈幸乞指誨然心之體用始終雖指實  
妄邪正之分其實莫非神明不測之妙而其真妄邪正  
又不可不分耳不審尊意以為何如

答游誠之

心體固本靜然亦不能不動其用固本然善亦能流而



入於不善夫其動而流於不善者固不可謂心體之本  
然亦不可不謂之心也但其誘於物而然耳故先聖  
只說操則存存則靜而其動也無不善矣舍則亡於是乎動而流於不善者出入  
無時莫知其鄉出者亡也入者存也本無一定之時亦無一定之處特係於人之操舍如何耳  
只此四句說得心之體用始終真妄邪正無所不備又  
見得此心不操即舍不出即入則無閑處可安頓之意  
若如所論出入無時者為心之正然則孟子所謂出入  
無時者乃心之病矣不應却以惟心之謂與一句直指

而總結之也所答石呂二書寫呈但子約書中語尚有  
病當時不暇仔細剖析明者擇焉可也

答范真閣

伏蒙教諭忠恕之說自非愛予之深不鄙其愚豈肯勤  
勤反復如此感幸深矣但伏思之終有未契處不敢默  
默請畢其詞以求正於左右某前書所論忠恕則一而  
在聖人在學者則不能無異此正猶孟子言由仁義行  
與行仁義之別耳孟子之言不可謂以仁義為有二則



某之言亦非謂忠恕為有二也但聖賢所論各有所為而發故當隨事而釋之雖明道先生見道之明亦不能合二者為一也非不能合蓋不可合也強而合之不免降高以就卑即近以為遠姑倚一偏終必乖戾蓋非理之本然是乃所以為不一也蓋曾子專為發明聖人一貫之旨所謂由忠恕行者也所指既殊安得不以為二然較其所以謂忠恕者則其本體蓋未嘗不同也以此而論今所被教問曲折可以無疑矣不識尊意以為然

否某謀又有以明之蓋忠恕二字自眾人觀之於聖人分上極為小事然聖人分上無非極致蓋既曰一貫則無大小之殊故也猶天道主教四時行百物生莫非造化之神不可專以太虛無形為道而以判而下者為粗迹也此孔子所謂吾無隱乎爾者不離日用之間二三子知之未至而疑其有隱則是正以道為無形以日用忠恕為粗迹故曾子於此指以示之爾此說雖陋乃二程先生之舊說上蔡先生又發明之顧某之愚實未及



此但以聞見之知推行為說是以不自知其當否而每有請焉更願詳覽前書重賜特誨不勝幸甚前日諸疑亦望早賜鐫磨俾無疑為望時序向熟伏乞為道保重以須環召區區不勝大願

答余正甫

辱書相與之義甚厚而陳義又甚高三復感歎不得所言然嘗竊謂天下之理萬殊然要其歸則一而已矣不容一二三也知所謂一則言行之間雖有不同不害其

為一不知其一而強同之猶不見於一二况遽以二三為理之固然而不必同則其為千里之謬將不俟舉足而已迷錯於戶庭之間而已矣故明道先生有言解經有不同處不妨但緊要處不可不同耳此言有味也所示中庸大學諸論固足以見用力之勤者然足下不以僕為愚方且千里移書以開講學之端而先有以脅之曰是不可同之即為荆舒以禍天下則僕尚何言哉姑誦其所聞如前者足下倘有意而往復焉則猶將繼



此以進也

答高卿

蓋天地之性即我之性豈有死而遽亡之理此說亦未為非但不知為此說者以天地為主以我為主耶若以天地為主則是性即是天地間一箇公共道理更無人物彼此之間死生今古命之別雖曰死而不亡然非有我之得私矣若以我為主則只是於自己身上認得一箇精神魂魄有知有覺之物即便謂之性把持作弄死

不肯捨放謂之死而不亡是乃私意之尤者尚何足與語死生之說性命之理哉釋氏之學本是如此今其徒之點者徃々自知其陋而稍諱之却上面別說一般元妙道理雖若澆漾不可致詰其歸宿實不外此若果如此則是一箇天地性中別有若干人物之性每性各有界限不相交雜改名換姓自死自生更不由天地陰陽造化而為天地陰陽者亦無所施其造化矣是豈有此理哉以此問于晦渠必有說却以見喻



再答余正甫書

二先生所論敬字須該貫動靜看方其無事而存主不懈者因敬及其酬酢不亂者亦敬也故曰毋不敬嚴若思又曰事毋不敬執事敬豈必以攝心坐禪而謂之敬哉禮樂固必相須然所謂樂者亦不過謂胸中無事而自和樂耳非是着意放開一路而欲其和樂也然欲胸中無事非敬不能故程子曰敬則自然和樂而周子亦以禮先而樂後此可見也則自得後須放

開不然却只是守此言既是得是則自然心與理會不為禮法所拘而自中節若未能如此則自未有所得才方是守法之人爾亦非謂既自得之又却須放開也克已復禮固非易事然顏子用力在于視聽言動禮與非禮之間未敢便道得其本心而了無一事也此其所以先難而後獲歟今言之甚易而若其行之難亦必考諸此而已矣

答高卿書



向來奉答所喻知生事人之間已發其端而近答爲卿  
書論之尤詳意者一讀當已洞然而無疑矣而來書之  
喻尚復如此雖其連類引義若無津涯然尋其大指則  
皆不出前此二書所論之中也豈未嘗深以鄙說思之  
而直以舊聞爲至乎既承不鄙又不得不有以奉報幸  
試思之蓋賢者之見所以不能無失者正坐以我爲主  
以覺爲性爾夫性者理而已耳乾坤變化萬物受命  
雖所稟之在我然其理則非有我之得私也所謂反身

而誠蓋謂盡其所得乎己之理則知天下萬物之理初不  
外此非謂盡得我此知覺則衆人之知覺皆是此物也  
性只是理不可以聚散言其聚而生散而死者氣而已  
矣所謂精神魂魄有知有覺者氣之餘也故聚則有是  
散則無若理則不爲聚散而有無也但有是理則有是  
氣苟氣聚乎此則其理亦命乎此爾不得以漚比也鬼  
神便是精神魂魄程子所言天地之功用造化之迹張  
子所謂二氣之良能皆非性之謂也故祭祀之禮以類



而感若性則豈有類之可言耶然氣之已散者既化而無有矣而根于理而日生者則固浩然而無窮也故上蔡謂我之精神即祖考之精神蓋謂此也然聖人之制祭祀也設主立尸燭蕭灌鬯或求之陰或求之陽無所不用其極而猶主也庶或享之其至誠惻怛精微恍惚之意蓋有聖人所不欲言者非可以世俗粗淺之見執一而求也豈曰一受其成形則此性遂為吾有雖死而猶不滅截然自為一物藏乎寂然一體之中以俟夫子

孫之求而時出以享之邪為如真說則其界限之廣狹安頓之處所必有可指言者且自開闢以來積至于今其重併堆疊計已無地之可容矣是又安有此理耶且乾坤造化如天洪爐人物之生々無少休息是乃所謂實然之理不憂其斷滅也今乃以一片太虛目之而反認人物已死之知覺謂之實然之理豈不悞哉又聖賢所謂歸全安危者亦曰無失其所受乎天之理則可以無愧而死爾非以為實有一物可奉持而歸之然後吾之



不斷不滅者得以晏然安處乎冥漠之中也天壽不貳  
修身以俟之是乃無所為而然者歟異端為生死事大  
無常迅速然後學者正不可同日而語今乃混而言之  
以彼之見為此之說所以為說愈多而愈不合也凡此  
亦皆粗舉其端其曲折則有非筆舌所能盡者幸併  
前兩說參考而熟思之其必有得矣若未錄遽通即  
且置之姑即夫理之切近而平易者實下窮格工夫使其  
積累而貫通焉則于此自當曉解不必別作一道理求

也但恐固守舊說不肯如此下紅則拙者雖無多言終  
亦無補

答范直閣書

四月一日領所賜教帖伏讀再三仰佩眷予之厚感慰  
不可言前日因平父遣人亦嘗拜狀矣不審已達台聽  
否即日初夏清和伏惟台候起居萬福某奉親屏處幸  
粗遣小間深僻亦可觀書又得胡文來歸朝夕有就正  
之所窮約之中此亦足以樂矣迫于親養夏末須為武



林之行計必三四月未得定居也伏蒙別紙垂諭忠恕  
仰荷不棄其愚與之反覆為德甚厚謹以來教所未熟  
思之復敢為說以請益焉某前所謂忠恕者乃曾子所  
一貫之語默有所契因門人之問故于所見道體之中  
指此二事日用最切者以明道之無所不在所謂已矣  
者又以見隨在各足無非全體也忠恕兩字在聖人有  
聖人之用在學者有學者之用如曾子所言則聖人之  
忠恕也無非極致二程所謂維天之命於穆不已天地

變化草木蕃著正所以發明此微也以夫子所以告學  
者與子思中庸之說則為學者言之也故明道先生謂  
曾子所言與違道不遠者異動以天爾蓋動以天者事  
皆處極曾子之所言者是也學者之于忠恕未免舛校  
彼此推己及人則宜未能誠一於天安得與聖人之忠  
恕者同日而語也若曾子之所言則以聖人之忠恕言  
之而見其性與天道者未嘗為二所以為一貫也然所  
異者亦以所致之不同言之猶中庸安行則行勉行之



別耳苟下學而上達則亦豈有所隔礙哉愚見如此更乞教其所不至者重賜錫曉使得所正焉不勝幸甚他疑意尚多蒙諭使得請教此夙昔之願但今日方聞伯崇欲以初三四日行迫遽未暇抄錄所記候暇日料理有便即附行也前日在共父處得直閣丈還朝陞對副本讀之不能舍去愛君敬主之義益終篇三致意焉雖然久矣莫以此言罄歎吾君之側者矣近日所召用雖不能盡滿人望其間若亦有一二端士焉前言倘見

思乎思其言必用其人延登之命亦非晚矣願為斯道斯民厚自保重副此依歸謹上狀不備

再答

向嘗以忠恕一貫之說質疑於函丈伏蒙錫曉切至但于愚見尚有未安比因玩索遂于舊說益有發明乃前日請教之時雖畧窺大義而涵泳未久說詞未瑩致頓辨析之勤如此今謹錄近所訓義一段拜呈乞賜批鑿可否示下容更思索續具咨請也去歲在同安獨居



幾閱歲看得論語近千篇其間疑處極多筆札不能載  
以求教伏紙但切馳仰

### 與袁寺丞書

某失記比來無可言者初若稍可支吾亦不敢必為去  
計今內則精神昏憤兩目生花白晝對人往往坐睡而  
省閱文案簽書決遣之際為尤甚此一當去也外則財  
用耗竭支遣不行性本疎拙不能稽考收拾恐更一二  
月轉見狼狽此二當去也至于刑獄最是重手一經監

司呵問官吏便欲望風希旨變易情節則是此事亦復  
不得自專此三當去也鄙性抗直不能俯仰所以忍飢  
杜門去敢萌仕進意今行年五十乃復變其所守為暇  
盱以求苟免於譴辱中夜思之既已自愧而當其俯仰  
之時大悶無聊深思不能自抑而忽發其狂疾此四當  
去也到官兩月思歸之情不能自悶徃々無日不發于  
言語詩問之間官吏知之亦不復以尊重難危自期所  
以號令不行財賦不辦而某以一身孤客于此携小兒



甥在此無婦女看管無日不病病時又須自視問其醫藥家中碎小想見無人收拾亦復不成模樣業已如此不為久計又不容復往般取以耗公家此五當去也蒙喻作書從班言路諸公非所憚也但初意只一二月間故不能虛為此以違素心今既不能得去又有所奏語事執頭閔白已不免作書與之但言語拙直不能婉順其間未必不有觸其諱忌者或反以速其抨彈亦不可知也此六當去也向來閑中私竊有以論著自謂庶幾

可以傳前聖之心問後學之耳自實非細事今既來此無復工夫可以白此而哀困<sup>斯</sup>漸盡與死為隣萬一溘然于此則此事遂成千古之恨非獨某不昧日而已也此七當去也當去之事畧為之有此七條其他曲折不暇編舉非不有書懇諸公丐祠然又不敢盡言此意只告尊兄力為一言使之必從所請乃千萬之幸大抵自度材力事勢<sup>部</sup>之外選甚差違都做不得小郎小狼類大郎狼類天遠即遠狼類近即近狼類諸公倘相哀憐



必欲扶之而全安之豈應使至此極耶幸以此意極力  
盡言使不至于再請以煩尊聽則大善不然繼此亦須  
有請但恐前陳所者或有一事不恰好則諸公雖欲曲  
相維持亦無所用其力耳

答陸子壽書

先生制禮本緣人情吉去之際其變有漸故始死全用  
事生之禮既卒哭祔廟然後神之然猶未忍盡變故生  
復于寢而以事生之禮事之至于三年而遷於廟然後

全以神事之也此其禮文見于經傳者不一雖未有言  
其意者然以情度之知其必出于無疑矣但遷廟一節  
邢氏用穀梁練而壞廟之說杜氏用賈逵達服虔說則以  
三年為斷其間同異得失雖未有考然穀梁但言壞舊  
廟不言遷新主則安知其非于練而遷舊主于三年而  
納新主耶至于禮疏所解定氏說但據周禮廟用古此  
一句亦非明驗故區區之意竊疑杜氏之說為合于人  
情也來諭考證雖詳然其大槩以為既吉則不可復去



既神事之則不可復以事生之禮接爾竊恐如此非惟未嘗深考古人變革吉去之漸而亦未暇反求于孝子慈孫深愛至痛之情也至謂古者几筵不終而力詆定杜之非此尤未敢聞命據禮小斂有席至虞而後有几筵但卒哭而後不復饋食于下室耳古今異宜禮文之變亦未有可深考者然周禮自虞至祔曾不旬日不應方設而遽撤之如此其速也又謂終喪撤几筵不聞有入廟之說亦非也諸侯三年喪畢之祭魯謂之吉禘魯

謂之禘祀禮疏謂之特禘者是也但其禮亡而士大夫以下又不可考爾夫今之禮文殘缺者多矣豈可以其偶失此文而遽謂無此禮耶又謂壞廟則變昭穆之位亦非也據禮家說昭常為昭穆常為穆故書為文王之穆考詩謂武王為昭考至左傳又謂畢原鄭卣為文之昭邢晉應韓為武之穆則昭穆之位豈以新主祔廟而可變乎但昭主祔廟則二昭遞遷穆主祔廟則二穆遞遷爾此非今日所論之急但設言以見來說考之未精類此又謂古者每代異廟



故有祔于祖父祖姑之禮合同一室則不當專祔于一人此則為合于人情矣然伊川先生嘗譏闕中學禮者有役人之弊而呂與叔以守經信古今學者廢幾無過而已義起之事正在盛德者行之然則此等苟無大害于義理不若且依舊說亦夫子存羊愛禮之意也某于禮經不熟而考訂亦未及精且以愚意論之如此不審高明以為如何然亦不特如此某嘗以為大凡讀書處事當煩亂疑惑之際正當虛心博采以求至當或未有

得亦當且以闕疑闕<sup>殆</sup>之意處之若遽以己所可粗通之一說而盡廢己所未究之衆論則非惟所處之得失或未可知而此心之量亦不宏矣閑併及之幸恕狂妄

答司戶書

某衰晚無堪學不加進足下過聽辱先以書其所以稱訟道說者足以見賢者之志矣然非區區所及也示喻程氏格物之說誠若有未易志力者然其言天地之所以高厚一物之所以然蓋極其大小而言之以明是理



之無不在而學問之功不可一物而有遺爾若其所以用力之地則亦不過讀書史應事物如前之云爾豈茫然考其心于汗漫紛綸不可知之域哉人所當為者而以鄙見如此賢者以為如何恐有未安幸復見告也于澄去秋相見甚款近復招之尚未有來信天台近有萬君人傑者見訪見留之學中氣質甚美議論亦可反復殊不易得云亦嘗從游也某比已丐祠似聞諸公有意聽許適聞張荊州之訃若便得當請一走長沙而歸爾

未有承晤之期臨風馳想切冀以時為親自愛

與程允夫書

久不聞問方以為懷人未備得兩書備審比來侍奉之餘進學不倦某去冬走湖湘講論之益不少然此事須是自做工夫于日用間行住坐臥處方自有見處然後從此操存以至于極方為已物爾敬夫所見超詣卓然非所可及近文甚多未暇錄且今寓此一銘去此尤勝他文也密院闕期尚遠野性難馴恐不堪復作吏然亦



姑任之不能預以為憂耳所示語孟諸說深見日來進  
學之力別紙一一答去更且加意如此探討不已當有  
得耳叮嚀葉仁來時去取書恐更有商量處一一示及  
孤陋無所用心惟得朋友講論則欣然終日千萬有此  
慰此懷也可欲之謂善此句尋常如何看因來諭及  
龜山易傳：出時已缺乾坤只有草藁數段不甚完備  
繫及三四段不絕筆亦不成書此有寫本謾附去然細  
看亦不甚滿人意不若程傳之厭飲充足潘子溥書頭

亦見之蓋雜佛老而言之者亦不必觀向所論蘊學之  
蔽吾弟相信未及今竟以為如何時于已學上有見處  
此等自然冰消瓦解無立脚處游于聖人之門者難為  
言真不虛語正蒙已領近泉州刊行程氏遺書乃二先  
生語錄此間所錄旦夕得本首當奉寄也所學寂寥  
士友不肯信向吾弟幸有其志又有其才每一得書為之  
增氣更願專一工夫期以數年當有用力處如良齋銘  
便是做工夫底節次近日相與考證古聖所傳門庭見



立此箇宗旨相與守之吾弟試熟味之有疑却望示諭  
秩試得失當已決早了此事一亦佳然是有命焉亦不  
足深留意也

答汪伯虞書

月日某頓首復書伯虞茂才鄉文執事某之外家子門  
下有姻婭之好而執事丈人行也久客閩中未獲一見  
獨幸從親故間講聞聲譽之美差以為慰茲承不鄙遠  
見致長書札意既隆而所以稱道期許之日又過其實

某不敢當也示諭尚書金公名堂之意俾得贊一辭焉  
幸甚幸甚金公亦先友也某頃歲嘗拜之臨安俯仰十  
有七年矣三復來誨若復得望見其衣冠而聞其譽歎  
者甚矣金公之厚於執事所以相見者之切當也邕州  
使君徃見荊州呂著作皆稱其才今讀記文又有以見  
其所存者蓋未得一聽議論之益也顧二公之意所以  
望于執事者皆非他人所能與獨在明者精擇而力  
行之耳况如某之淺陋某又何以辱禮命之勤哉如



以疎拙乍親吏事公私假僂日不暇給尤憑荒溢不能  
一吐胸中所欲言者因風先此致敬以謝先辱旦夕倘  
得脫此羈馱歸臥田間呻吟之悔乃當有報執事耳  
惠墨甚富且珍未有以報此間石刻各徃一通幸視  
至未有承晤之日正惟進德自重慰此願言

答崇安趙宰書

伏承誨諭良荷不鄙但屏居杜門不敢干與外事向來  
雖聞貴縣令保正副出錢雇募耆長人甚苦之亦不敢

遽有稟白但嘗因下問之辱欲乞博詢民情之所利病  
而罷行之正為此耳初不知其為倉司拍彈亦不聞他  
縣之有此也今聞已行罷去自此境內應役之家得保  
生業則其受賜已厚而上司當亦察其無他矣恐不  
必更假拙者之言以為重輕也自餘曲折更托劉監廟  
稟知并幾情狀

答建昌顏君書

七月九日某頓首復書顏君足下包顯道在此數稱吾



子之賢每恨未獲一見辱書備見雅志亦足以當晤言  
矣然所謂古人學問不在編籥必有所謂統之宗會之  
元者則僕之愚于此未有諭也聖人教人博文約禮學  
問思辨而力行之自洒掃應對章句誦說以至于精義  
入神酬酢萬變其序不可誣也若曰學以躬行心得為  
貴而不在于簡編則可若曰不在簡編而惟統宗會元  
之求則是妄意躐等以陷于邪說設行之流而非聖賢  
所傳之正矣抑觀來書詞氣之間輕揚傲誕無謹厚

篤實之意者吾子于下學之功有未嘗加意者不知  
往年見張陸二君子其所以相告者果何事也又聞不  
念身體膚髮之重天叙天秩之隆方將厭薄世故以從簡  
畧之習則又深為網然不知吾子之尊敬天所而趨者  
若是豈亦所為統宗會元者之為崇而使吾子至于此  
耶顯道不能諫正已失朋友之職節夫更有坐緣尤非  
君子愛人之意也聞已得祠曹牒髡髮期急作此附  
遞奉報願吾子于此更入思慮或意已決亦宜更與子



靜謀之必無異論而後為之似亦未晚如何不然則道不同不相為謀不知所以為子計矣秋氣向涼餘惟自愛

答歐慶似書

頃在里中雖屢獲見而常苦忽不及盡心欲言然已固知所志之不凡矣今惠若問乃慨然有志于學甚善甚善抑嘗病今之學者不知古人為己之意不以讀書治己為先而急于聞道是以文勝其實言浮

子行而終不知所底止方切以是反而求之而未之有得也  
愧辱下問之勤無以稱塞敢私布之不識明者謂之然否

答李伯諫書

誨諭勤、深荷不鄙然人之為學各有所見豈能必于盡同亦各信其所信而勉焉爾今高明所造日深日遠而愚蒙底滯不能變其初心竊意必無可合之理來書乃欲曲加錫誨期之異日雖荷眷舊之私然恐亦徒為



五言家指方太史稿  
競辨而無補于進修之實也謹此少謝厚意之辱伏幸  
裁照

答潘端叔

示諭講學之意甚善甚善但此乃吾人本分事只以平常意思添加懸實久遠工夫而勿計其効則從容之間日積月累而忽不自知其益矣近時學者求聞訐獲之私勝于其學問思辨之功未加毫末而其分畫布置率擬度量之意已詳然于外矣是以內實不足而游聲而

馳及其究也非徒無益于己而其為此學之累有不可勝言者惟明者念有以反之則朋友之望也

答許順之書

人皆有仁義之心但為物欲所害恰是都無了然及其夜中休息之時不與物接其氣稍清自然仁義之良心却存得些子故平旦起來未與物接之際好惡皆合于理然才方如此且晝之所為便來耗亡之此仁義之心依前都不見了至其甚也夜間雖得休息氣亦不清存



與仁義之心不得便與禽獸不遠學者正當于旦晝之所為處理會克己復理懲忿窒慾令此氣常清則仁義之常存非是必待夜間萬里澄寂然後用功也若必如此則日間幹當何事耶

答許順之書


孟子此四句只是說人心是箇活物須是操存不要放舍耳不須如此安排也心一也操而存則義理明而謂之道心舍而亡則物欲肆而謂之人心

亡不是無是走出逐物去了

自人心而收回便是道心自道心而放<sub>放</sub>出便是人心頃刻之間恍惚萬狀此所謂出入無時莫知其鄉也



五百家播芳大全文粹卷六十九



國家圖書館, NATIONAL CENTRAL LIBRARY, TAIWAN, R.O.C.



五百家播芳大全文粹

宋 魏齊賢等 全編

卷七十

尺牘

釋道

與惠林廣慧禪師三帖

蘇東坡

經年不聞法音經術荒蕪無與鋤治者忽領手教累幅  
稍覺洒然仍審比來起居佳勝行役二年水陸萬里近  
方弛擔老病不復徃日而都下盡事十倍於外吁可畏



五百家類書卷之六  
也復望如去年相對溪上聞八萬四千偈豈可得哉南  
望山門臨書淒斷若寒為衆自重不宣

東林寺碑既獲結緣三寶稍除業障又得托名大士皆  
所深願但自別後公私百冗近又絕無頃刻閑不敢草  
草下筆專在下懷惟少寬限也悚息悚息

示喻臂痛示與衆生同病耳然俗眼未免懸情更望倍  
加保練王氏博施方中三冊有一虎骨散及歲靈仙丸  
此仙方也僕屢用治臂病其効如神切望合喫元瓦用虎

腰悞寫作腦骨切望相信便合服必効必効自餘都下  
有幹望示及惠貺名茶謹以捧頌感刻

與賢師上人

辱簡喜聞法履增勝知續修者琴願有聲韻不知何日  
可得也法醞三壺充下藥不一

與金山祖印

昨夜清風明月過蒙法施今又惠及清泉珍感不已未  
湯法政恐觸致好供復却回納不一



與雪齋言上人

去歲吳興倉卒為別至今耿耿謫居窮陋往還斷盡遠  
辱不遺尺書見及感怍殊深比日法體佳勝札翰愈精  
健書必稱是不蒙寄示何也雪齋清景發于夢想此間  
但有荒山大江修竹古木每飲卽酒醉後曳杖放脚不  
知遠近亦曠然天真與武林舊遊未易優劣也何時會  
合一笑惟萬々自愛

與金山寶覺

去歲赴官迫於程限不能枉舟一別中流縱望雲山杳  
然有不可及之歎既渡江遂蒙輕舟見錢復得笑語一  
餉之樂漸荷之懷殆不可勝言別來因循未及奉書專  
人至辱教累幅慰喻反復讀之爽然如對妙論仍審比  
來法履佳勝某此粗遣但未有會見之期臨然惘然惟  
萬々自重至游堂記卽當下筆遞中寄去近有後祀  
賦一首寫寄以當一笑人還草々

與大覺禪院



五百家類書卷之九  
人至辱書伏承法候安裕傾向傾向昨聞奉欲捨禪月  
羅漢非有他也先君愛此畫此心以為捨施莫如捨所  
甚愛而先君所與厚善者莫如公又此畫頗似靈異累  
有所覺於夢寐不欲盡談嫌涉怪耳以此益不欲俗家  
收藏意上如此而來意乃見疑欲換金水羅漢開書不  
覺失笑近世士風薄惡動有可疑不謂世外之人猶復  
爾也請勿復談此某比之人可令齋去兵卒之類又不  
足分付告我師差一謹幹不帥齋籠杖來迎取并古佛

一軸亦同捨也錢塘景物樂之志歸舍弟今自陳州得  
替當授東南幕官冬初恐到此亦未甚的也詩筆計益  
老健或借得數首一觀良幸到此亦有拙惡百十首閑  
暇當錄寄冗中不一

近不復如往日愛書畫閑物蓋衰老事寡惛公猶以  
往日之意見期也慎勿見示他畫雜物之類切切

與參寥大師二帖

別來思企不可言每至道遙堂未嘗不悵然也為書勤



勤不忘如此仍審比來法體康佳感報兼至二詩皆清  
妙讀之不釋手且和一篇為答所要直贊尚未作來人  
又不敢久留甚愧甚愧知且伴太虛為湯泉之遊甚善  
甚善某開春乞江浙一郡候見去留當以書奉約也要  
墨納兩笏皆佳品也餘惟為法自重適有數客遠來相  
看陪從少暇奉啓不盡意

去歲倉卒離湖亦以不一別太虛參察為恨留語與僧  
官不識能道否到黃已半年朋友希少思念二公不忘

心懶且無便故不奉書遠承差人致問殷勤累幅所以  
開諭獎勉者至矣僕罪大責輕謫居以來杜門念咎而  
已雖平生親戚亦斷往還故宜爾而釋老數公理乃復  
千里致問情義之厚有加于平日以此知道德高風果  
在世外也見寄數詩及近編得一詳味洒然如接清顏  
聽軟語也比以焚硯斷作書故無緣屬和然後一問以  
慰孤寂幸甚幸甚筆力愈老健清熟過于向之所見此  
于至道初不相妨何為廢之耶當更磨礱以追配彭澤



未間惟萬：自愛

與育王大覺禪師

葛叔忱

前經從山中得一笑言頗慰塵勞尋以職事頻出稍疎  
問訊勞想可知春寒雨重不審法候何如不宣

前日入回附寄當已呈達輒為鄙句復與俞君同賦一  
篇因寫奉呈惟是疎拙之詞已窮矣可取禪餘一笑也  
向者城東得一夕以奉清論多所開益尋以陰雨遂不  
成山中之約順流以歸回望寶剎馳情何已

病衰百事倦懶復汨於塵事中日益昏愚矣何時一  
侍圓音以開鄙塞永遷入文室即惟輕適尚冀珍重

即日粗遣頭天氣少涼病體方可出入當上候左右比  
來筆硯幾於屏絕惟多於空法粗知信向而性昏業重  
無可趨之途乃懷教誨翹誠何已

病體衰怯坐隔禪席瞻依餘教馳情何已秋暑特甚違  
者既自有以清涼其身而山中無復人事之勞何樂如  
之



前日同宰君過山中會承仗錫入城快々還舍有五言一首并作詩二詩繕寫以呈塵俗之人無情而言謾資一捧腹耳

比得曉夕奉餘誨慰釋無窮自天童回方欲轉錢湖却宿東館以紓平日瞻懷仰慕之意會中速得家問言稚子病洩日益即疾驅徑還俗累如此其免為達者所笑乎却望觀刹但有牢吝薄寒四大如何

昨潛上人還山因附問已知呈達病倦冗率雖失繼音

而客子往來時得動息之詳用以為慰不待餘論久矣區區鄉徃勞於夢寐過節當造丈室即日不審法候何如

今年暑熱特甚海邑殆不可過日書緘廢置故久不獲奉寄但以企仰山中清勝計多賞心不審即日法候何如專使人叅問

雨後頓涼方思一請法席忽辱來示并貽清詩開闔欽嘆不待親承餘論而滯思已釋矣即日四大安好自決



間庶得叅奉

比辱惠教日窘于局事而又私室多故遂曠馳問惟深仰企即日法候安和某蒙照如昨沈迷簿書日益厭悔竊思承教逸未可得倘未弃遺時枉誨言幸甚幸甚

與神智大師三帖

慈承惠矐仍示訊函過形柔軟之言特慶遷除之命永言愧感莫罄喻云時在暄融路方濟阻勉勤法味以承永吉祥專修狀陳謝伏希垂照不宣

遠勞書示深荷勤誠知己彼四衆之請始嗣廣智道場江東度門今知不墜矣塵勞之繫相見未由千萬聆風但深企想

春暄萬福自聞續廣智道場相距遼遠未由一面行人茲至再沐書示備聞宣揚祖教為一方依怙良慰遐抱晤期未卜良想孤風希為四衆倍調清味

與神照大師三帖

小介遠來笥書為貺欣承晏坐之餘道氣充集深慰傾



企也鄙夫汨在宦途日走朝市雖一舉手一下足不離法界然而聽松風望秋色與悟空大士揮塵抵掌為禪悅樂不能無滯望矣勉旃自愛以浣瞻仰不宣

近知郡司勳附上庵銘行者來損書乃知此信尚未達涉履炎夏山居化道外且喜道用休暢承示及省像一軸傾風林下想見標表鄙夫即日几筵之下尚存餘喘揮磨一接未易前期更為宗教努力自重

久不接音問不勝瞻詠之至行者來損書并刊石亂道見既慚荷倫承山居道體冲寧檀越三五年憂患奔走異方風土人物滿日異類思一見東南山水與僧高談真假之說豈可得哉放生池一事是大因緣無不在心當偶良便為吾師成之但少須之耳高秋珍重

重江複山相望數千里惠而好我時獲音教歲律驟改忽焉新春山中聚徒教化不易示及放生事在心固久矣雖然未放生而未嘗不放生更少待之珍重珍重

與梵才大師

梅聖俞



昨晚鄙句且塞嘉命恐別後難過使人寄上所以倉卒而成忝故舊略不指瑕而褒言實令人頓然衣物於深愧輟况聊表意耳何更見拒伏望敦契收留幸甚幸甚未行間可能一顧少接清話耳

與梵才大師

久別喜道氣冲勝知在迎鑿多日一帶之阻披會末由遠示長跋并北山新集欽玩欽玩所諭冠引不敢辭避但紛々俗事少有清興并野性漸懶不奈驅策須作

期以副雅旨耳不宣

與梵才大師

宋諫議

執別有年矣人間多事不得時訊與居然心照所會千里如咫尺比日不審少病少惱否頃者不遺寄既近詩二軸風俗愈峻思致益深申詠累日不能釋手乃知上慧所證道妙所存道韻自然宜契耳欽服欽服某即日粗如幸勿多郵來唱當繼得適有鞅掌未遑屬思恐少暇得和為謝春序向晚宜加保養臨紙不宣



薦辱書詢會出處不定稽于裁復不恨無量比再示教  
承微爽清不未還故止昔維摩詰問世尊以少病少惱  
則能仁不得免亦欲示衆生病而救其惱耶幸順世法  
稍加調以慰切：詩編題引故不敢辭但二公敷演足  
下之長辭高誼遠俾小子繼之得無贅疣今且先質二  
篇為謝餘須復訊餘杭假守或遂所求庶下清昭

與梵才大師

鮑郎中

睽索已來屢更歲律欽跂之素伊不下陳某自守四明

僅周載歲雖精益不遠道韻可接然坐拘簿領無緣際  
遇良增馳想故歲中存辱題誨終以鮮便久稽修答胡  
進士來再貽珍削仍惠及詩筆一軸詞清格峻韻古意  
深諷誦數四寶增降愧珍重珍重春吏司職陽旌布和  
宴坐之餘法味何若萬希葆留式慰遐思

與梵才大師

晉內翰

逃違法罟屢易歲躔瞻合增勞音題荐至喜至燕處  
方外安隱少惱兼承惠詩并問信教節如何達人尚肯



以塵勞為念愧刻愧刻侯冗務稍隙聊一致意今寄蜀  
牋一軸少助吟費秋涼為道自愛不宣

比兩辱真翰并新吟十餘章開緘且喜旅汨中道用  
安穩威制體格冲淡詞句清雅順其淵源蓋王右丞畫  
公之流亞也加之聲韻平安與時無迕覽之數回不倦甚  
喜甚喜此於空宗中雖復一餘藝耳然讚歎佛事道  
韻物情不可無也知却歸東寺宴處如何寒律初嚴  
高談末節以副區區之繫望也

與梵才大師

累日前辱惠長韻一章并出示古律詩一集共百餘篇  
某累來棄去筆墨忽二惟省心腑問如未知有詩雅之  
趣一得上人高句之辱良用歎服雖病且懶讀之三四  
過而不欲已然如喜見古調者豈僕向之所尚或泥於  
古耶且天台不獨甲於東南實為天下之勝千峯萬谷  
山水重深雲霞猿鳥之清絕高木秀草之環竒復居其  
間作高僧能用聲詩寫狀其融結之精妙以內適我真



王官指芳名卷之九  
常之性其為樂可量也耶風霜搖落圓井如燕獨坐虛齋  
頗覺岑寂然不飲酒茹葷亦復罕睡庶時接清談啜佳  
茗以為慰慕也

與梵才大師

謝紫微

人至辱書甚勤欣承即日法候康適至慰至慰某近蒙  
朝恩擢進詞掖極懷不稱之誚諒吾師相知之深應為  
喜也暑熱異常無由奉款山中演道之外茹芝飲瀑其  
幽樂之興可勝道哉餘希自愛

與榮閣黎

二月初專遣人至曾附書想已呈徹一向不得來旨南  
北相望以懷想比來法履安否何如講席想如舊盛集  
懺會亦應不輟為之殊不聞彼次第劇為思跂也歲暮  
寒溢正濶補軟言更希精加調攝靈修之暇數以書遞中  
見及

與明智大師

曾尚書

得神智大師遣書終天之別愴然于懷然宗教得所付



屬入於圓寂非大善知識何由始終如此蘭若之域相繼表率甚善甚善

沐惠書勤厚感戴感戴比聆闡揚宗風道場甚盛未得一陪高論深所傾企然衰朽久思退迹疲病苟遂素志因得為江湖之游可卜展昭也

延慶道場於私門是為世契先考大師資福之地繼得能仁深所慰喜頌遠頌遣人惠書感戴感戴嚴寒計道腴增膝末由披接若時自愛不宣

與惠滿禪師

去冬調官東還泊舟京口護訪禪林得聆軟語開晤良多倏忽一別已見春殘即日想惟掌握宗風法履清適某十一月抵陽羨寓止待次于溪山之間企仰道場未遂再叩覺論以滌昏蒙何時觀遇聊慰渴思餘冀以道為世自重至禱至禱

攜家傾謁精舍既獲欵叩妙語仍沐顧遇之勤仰佩法慈感服何已區區寓居宜興人事紛冗哀哀度日久欲



持狀上謝因循迄今吾師道力法眼高邁近古勇猛精  
進直造直如開門受徒接引羣昧俾徹彼岸其為力固  
亦大矣豈小補之哉相望方丈不遠教舍何當復展不  
二最上希有之言庶幾有所得以遂鄙願不勝企望

與參寥大師

蘇子由

別後三承惠書仍以佳篇為贈而未嘗奉答雖見愛亦  
當見訝矣然實以家私多故衰之至此非敢慢也太虛  
書中具之幸見亮爾承寓高一精舍彼有與往還當甚

為樂即日道體勝常所示詩卷愈加精絕但吟風無已  
拙詩猶未暇錄奉和一篇殊無意思取笑而已因風尚  
無惜音問千萬順時保愛

辨才大師

績溪蒙恩召還將自宣城沿大江以歸家兄子瞻以書  
告曰不如吳中迫于水涸不能久留十月八日游天竺  
子瞻昔與辨才師相好今隔南山不得見乃作三詩  
以寄之



答悟老二幅

孫彌大

違濶踰年時有請方化士自山中來者得聞動靜每終  
不得其記為慚忽奉誨音聞之欣然其佩存錄之厚自  
公飛錫念欲理舟叩謁因見堂頭妙語冀有驚悟因猶  
未果豈業緣也哉瞻想山門神馳杳靄

自去冬叨冒出自法力之助忽勤慶問可勝感戴屬往  
行在俟歸當報來貺也翠微建行廊并玩老開堂二疏  
以諸公科配牽強為之謾徃一觀之畢丙之勿留形迹

取笑作者行廊賴善夫無輔勸率已有端緒時節因  
緣信如是乎良可喜也

謝旌忠知山三幅

山中忽之別已兩閱月念欲作書謝顧遇之勤老懶  
竟未果也忽奉誨音具審即日法體增勝深以慰感某  
居閒無足念者末由一見萬之為衆珍重

蒙眷私曲記始生之日特煩持頌副以香炬之貺物意  
兩重亡說可辭區區但切悚荷而已



王右軍書法  
聞象馭朝夕有錢塘之行氣候漸冷遠途宜慎護也  
錢塘無他幹蒙諭至感小子近得書恐二十七八間  
抵家矣以故更不附信

謝交老惠茶二幅

區區於此獨公不忘存領誨音豈勝感戴雨涼其間即  
日法候安穩飽繫行朝無由從杖履宴坐林下但勤  
瞻仰自餘未幾珍重惠菽物固妙絕第未有以為報  
感悚何言

答法照大師

牽冗久不果奉狀問訊正以為愧辱問深慰懷想但累  
幅勤解非數以書見及

與徐道士

元厚之

久不與君握手為方外逍遙之游惟是跛仰無窮矣想  
應高臥雲山靜開竹牖一不華髮滿機琅函鸞一朝翔  
牛斗夜步賞心真樂誰可擬之擾々市朝無緣晤語秋  
深氣爽更冀為道自愛



慰書

慰朱相五五幅

鳴蜩成候薰不風自南恭惟感時追慕情何以堪神相孝  
 誠鈞候萬福某艱繫行朝未獲再詣靈幃陳慰謹具狀  
 申問記室某借易震恐下情無任瞻戀之至不備  
 拜違苦次恢復改月引領德宇豈勝燕雀之情不審跋  
 涉川途寢興何似滄暑方隆伏乞順序節哀以全禮制  
 某下情無任瞻禱

竊惟國家艱難之際正賴威德雅量調和鼎鼐鎮一士  
 民而我公遽以憂去朝殊適中外之望然而九重依注  
 四海具瞻雖處苦塊豈忘王室更乞為蒼黔養福天  
 下幸甚

二計鈞旆獲擁太夫人轎車已抵雲邱雲邱山川奇秀  
 諒惟卜兆當得佳城裏大事已有期否某官次拘絆  
 無緣預執紼之列西首受墉但馳精爽  
 衰晚之迹辱知有年備屬樞府日得以職事趨稟曲聆



馨咳豈勝榮幸乍遠鈞座區區向慕之情饑渴莫喻

慰丞相三幅

即日恭惟二慕苦次神相仁孝鈞候支福某衰晚之迹  
荷相公知獎方幸日以職事趨侍遽遠鈞席下情不勝  
犬馬之戀暑氣方隆敢乞為國節哀以全禮制僭易  
震恐

屬者輒犯分又冒昧奉咫尺之書掌記者以鈞旨為辭  
以故云路程晚某偶聞鈞旆擁護太夫輅車已抵雲

上此地山水為東南奇秀之冠諒惟卜兆當得佳城練  
日衰大事將有期否某竊以國家艱難之際相公銜哀  
去朝中外如失唯拱俟頒詔奪情復還廟扉所以望於  
道照也秋過半氣序益爽緬惟法體安適某承不知昨  
第恐荒蕪未能如期待之意賤日既勤持誦又煩既以  
香燭蔬果有存見養之厚可勝感戴末由款承惟幾為  
道珍重不宣

與法照大師



通來道况如何庵居岑寂凡眠食器用又非大利之比  
所不至者多矣自非忘世味未易處也倘慈悲之濶畧不  
至使存歿受賜幸甚靈岩諸小皆不闕住持或有之豈  
敢不展力願寬以待之

與楊君知庵二幅

歲晏寒五伏惟即日法體安穩謹奉啓問詢不宣  
講聞道譽之高奮矣願見未果朔風每一悵恨杖錫未  
有期矣行遂歎奉何喜如之

與知山上人

作別幾月每念前日煩厚過款妙語至今未忘也忽  
承誨音具審即日之不亡惱深以慰感某自雲上過邑  
偶值便舉帆函歸及叩謁回望山門但極馳向尚間保  
愛為衆珍重謹復啓

爾領之因荷辱意但道眼相照何必區區為世態耶來  
使督還甚愧不盡占謝幸察

與雪峯上人



咫尺相望尋常畏勤寵復不敢裁典居之間其如仰德  
之誠未之或置也華嚴想得趣雪山藥苗想益增茂  
何當領衆偕南俱與文殊獲觀彌勒也一笑某輒遣小舟  
迓家叔了此事此又可以雪山外一種公案也呵呵

與張得一道士

黃道大

缺然不講道話久矣炎暉一字不審即日浩養何如每  
到琴軒頗思論琴之意夫學琴雖未能忘乎形聲者也  
苟心無所事乎機手無所事乎巧清音妙韻一於無何

有之鄉松風不下山水殷々相江月白萬籟合乎太虛  
有能之而對之方是時也望德以虛其心滅學以空其  
性則予之遊是軒也與子共之不識能進于是乎幸當  
同濟中興之業天下幸甚

某遲暮不才滿負樞屬賴鴻庇未至汰逐已幸矣復被  
誤恩實出某人平昔陶鑄之賜獨以匏繫行朝無緣趨  
伏鈞屏占叙感激之私惟頂踵圖報萬一神寶臨之  
非敢妄也



與李文思

蔡持正

久別豈勝企想銜恤馳還衝冒霜露思慕摧頹其何以勝無由面慰惟稍寬節以副區區之祝

與練奉議

王承議

久不遑馳問方此念遠承公遭值大故駭歎悲愴何可勝情即日不審號慕外體力支持否太夫人享有高年克生令子雖千鍾三釜豐約未齊而修已致養榮聞則多存歿可無憾矣更維厚自寬譬抑情就禮以全大

孝之義區區不勝懇惻

與滕興公

蘇東坡

向者假守得依仁賢分光借潤為幸多矣不謂純孝罹此哀疾忽遽別去為恨可量某罪大責輕憂患交集狼狽南遷豈敢復自比縉紳尚蒙記錄委曲存撫感激深矣且夕出江愈遠瞻奉惟萬順理自將無致疑也

與胡郎中

得彭書知太夫人捐館聞問哀痛不已行役無便未果



奉疏人至忽辱手書伏審永慕之餘孝履粗遣至慰至  
慰某本欲居常得舍弟書勸歸許下甚力今已決泝汴  
至陳留陸行歸許矣旦夕到儀真不留令邁一到常可  
以款見矣未間惟節哀自重

與林秘書

黃安中

孤苦餘生比臨營奉伏辱加惠挽書繼之奠祭情辭惻  
怛誠禮過愛感佩摧痛何可比說末由一謝左右而比  
枉專馬祇益涕殞即日伏惟起居萬福石君銘誌荷賜

示亡母銘同此上呈病憊姑此奉疏不次

與范堯夫舍人

某再啓前問已悉堯夫高遠已有所見夫子之悲無可  
奈何當勿久留于胸中人生如惠自是吾身朝夕不測  
餘曷足道邪入浴見諸公當可開釋方事閑適惟保養  
為善

與許振叔四幅

慰言聊具前幅冬候已深寒色益嚴緬惟孝思罔極神



明介社契不以來如某遠官亡聊回無足言而振叔憂  
惠皆人世所不能堪者以故願見之心無日不南驚也  
區區上狀餘以道惟自重不宣

不意慶門既罹變故而從者踵嬰遠謫行路之人所共  
嗟惜某蒙眷之厚慨然尺懷則繼之以泣也通直丈遽  
棄榮養哀慕踈絕何所迨及然振叔自少年取材第登  
顯仕榮動鄉里所謂子職者無一不至迨茲傾背固宜  
以此寬遣至於力所不可及事所不可測者振叔處之

必自有道又况仁聖在上察其母辜必賜恩賞惟冀寬  
以俟之不勝區區之禱

自聞被命朝夕懷念不與常比念欲裁書附承又以南  
北罕便因循不知凡幾程至貶所氣候風土飲食醫藥  
諸事如何無煙瘴有士人往還否離鄉之初聞遽一僧  
同行不知謂誰因書願一二及之皆所欲知也某承乏  
於此已兩考七月間蒙恩改正者稱道理前任而代之  
蘭大夫又得指揮替年月自此去替祇十數月冷官况



味置之不復言惟求田問舍之地甚急耳中心所欲與言者亡窮臨紙但劇馳跋

時得小子書頗問周叔昆仲與令嗣居鄉甚安所不堪者以行在遠耳萬々為業寬處也至祝至祝

與汪太守

慰禮粗見右幅氣候清潤恭惟即日承宣之暇台候萬福某竊食祠宮杜門窮巷瞻望使節下情不勝跋慕敬勤恭候

某得請以歸逡巡屢月塊處窮僻<sup>世</sup>與絕以故久不果寓狀即日不審自羅閨門之戚台候何似重名推望宜歸朝廷尚煩藻不之寄敢幾順時調護前所柄除共扶中外天下幸甚比至宜興訪親舊徃々多為鬼籙今者又聞淑人之訃尤切歎息矧齊眉之愛何以為懷然劍去矣追慟何及願痛以理寬遣勿以情累纏繞也

自得報于宜興竊欲一至麾下而閑居舟楫難具以故



未果走价聊致薦奠之禮伏惟恕察幸甚  
新司法來迪功近之官莫已交割否試吏之初願訖誨  
之某與其兄右司為親家輒以姓名浼執事者僭易震  
恐之至

與劉子正二幅

咫尺門牆乍歸賓客書疏紛然以故尚未果叩謁可勝  
愧仰祁寒即日孝履支福謹上狀泰候率略幸察  
長至今節諱惟號絕何以為懷敢幾節押以終禮法區

區之禱唯在念幸甚幸甚

送劉子正墓銘三幅

闊別幾兩閱月沮深跂仰即日恭惟神所傾助孝履支  
福謹具啓候承忽遽不宣

衰晚比蒙恩除皆親舊推借之物敢不知幸月知庵  
訪及且辱惠貺之厚佩服春意不勝鄙情朝夕東去  
匆々殊愧不得一別門牆引領祇極悵仰

鄙拙承以先文親家銘文見屬洵思牽強僅得成文



第愧不足以發揚先德耳謹以持免切幸視至或尚有  
諭不外不外

與戴宰

一別倏焉踰年揭來行朝相逐隊哀念欲詢典起居  
因循未果誨讀先辱禮數過當感不忘秋暑緬維卽  
日孝履支福尚得小姪書具聞體中不佳頗費調治比  
遂良已可勝慰喜親家奄棄孝養追慟何及敢冀節哀  
以機宜親家重寶區區之望也



五百家播芳大全文粹

藝文類

五百家播芳大全文粹卷七十





五百家播芳大全文粹

宋 魏齊賢等 全編

卷七十一

青詞

福寧殿啟建壽聖節道場青詞 王岐公

畫堂發慶適紀誕辰秘殿祈祥載敷妙式企高靈之先  
墮監精素之上通永佑函生大延景祚

太清宮啟建壽聖節道場青詞



歲籥更端陰華生朏興言震風之旦實擁神靈之休爰  
即真祠其敷冲式冀上穹之默鑒錫邦祚之丕隆

上清觀啓建天寧節設醮青詞

草芥雖微皆出乾坤之造君親有慶共殫臣子之誠屬  
誕聖之昌期竭籲天之至懇筵張邃宇像設殊庭冀回  
赫赫之光俯察區區之意伏願顧諟明德惠綏永圖志  
上下以咸同時雨暘而晝若九州四海日陶有恥之風  
億載萬年歲獻無疆之壽

福寧殿啓建天慶節道場青詞

禧動年芳華生月朏仰祥符之盛烈膺上帝之靈文載  
歷嘉辰具循先制祓九重之秘宇舉士極之冲科庶恢  
道甫之宗永介皇圖之尚

福寧殿啓建天貺節道場青詞

珍符發瑞嘉節標期披太素之琅書企紫宸之芝御伏  
冀密誠上格靈貺下敷助永昌圖歸勤大道

靈釐殿滿散乾大節道場青詞



正陽之月震誕紀期涓闡殊庭以延颺仰瓊科葉爰修  
祓以虔伏冀高清儲靈垂佑寡德邦歷之固與民均休  
仰荅至仁匪誠敢台

福寧殿啓建先天節道場青詞

祖著收辰素商臨候稽靈源於道祖啓丕祚于皇基載  
肅殊庭甫虔法會欽若王神之佑永惟重器之承敢怠  
至精以懷其蔭

靈隆殿滿散同天節道場青詞

祇紹慶圖仰繫靈顧屬恢台之布序實誕育之紀辰爰  
即秘庭夙崇法會甫畢齋修之素終蒙保佑之仁

福靈殿滿散先天節道場青詞

寶系自天珍符在國適紀素商之序夙清秘殿之筵探  
道醞於琅函企真游於紫極至誠內罄沖祐長孚

萬壽觀啓建乾元節道場青詞 孫夢得

炎序開端誕辰命節惟冲人之紹歷蔭靈蔭之紹休爰  
敬殊庭載嚴淨式伏冀俯回鑒誕薦賜嘉休永嘉卜世



之基彌固如山之壽

福寧殿啓建天祺節道場青詞

王岐公

圓靈孚佑寶命未符載承先烈之休又紀嘉辰之會夙  
探冲式徧繹真文冀神造之溥臨錫邦圖之永久

靈釐殿滿散同天節道場青詞

大統當天三陽表夏紀靈樞之夙照陳秘洞之重科  
欽不宰之私默丁有生之施終回冲鑿永作皇休

玉隆觀啓建乾元節道場青詞

茂樹交秀薰風導和當炎靈化育之初實眇質誕生之  
候普膺聖護荷真休奉春秋則廟社歆寧御遠邇則  
兵民保乂敢憑醮席恭導虔誠度資薰潔之修迎達紫  
霄之鑿洽敷順氣丕冒羣倫

福寧殿滿散天貺節道場青詞

秘殿集靈倦符紀節祇循綠蘊之範遐禮紫虛之游伏  
冀感真洞元右德錄行陶物生之大順錫邦祚之鴻休

洞霄宮啓建乾元節道場青詞



月旅正陽當百家之茂盛祥標誕節期萬壽之穹隆式  
按舊章載嚴秘殿延紫霄之飛馭誦玉笈之靈篇伏冀  
誠懇上通聖真垂佑賜之多福均動植之微幽永以無  
疆並乾坤之永久

福寧殿啓建先天節道場青詞

秋迎新朔節紀佳辰感靈繫之肇祥企高辰而薦信瓊  
科按式玉笈翻文庶法道之自然以資功于不宰俯回  
冲鑒終佑皇圖

明道觀啓建先天節道場青詞

孫夢得

暑伏畢期商秋開序稽道祖發祥之兆迺先朝紀節之  
辰參建清場載循舊矩寶薰交馥真興長賡伏願精意  
上交太慈光照生民饒衍廣宇大寧

福寧殿啓建先天節道場青詞

王岐公

但昔收節涼颶應辰稽道祖之生期啓皇圖之永祚有  
嚴邃宇式按冲科揚維太寶之承欽若上靈之睠敢忘  
顛慄以嚮順祥



福寧殿滿散先天節道場青詞

寶繫發祥真符告祚肇素煒之凝候即秘殿以陳耕耕集  
供清場致精道果期九真之迪蔭保百世之延供仰答  
願懷敢忘顛慄

福寧殿滿散天祺節道場青詞

大象開先必根于元造寶文騰瑞載紀于嘉辰按參聖  
之舊彙全高辰之列御終祚明烈永孚順釐

福寧殿滿散天貺節道場青詞

上靈顧德早錫於休符季夏協辰載臨於嘉節神謀燕  
後寶懋鴻垂益嚴三景之科遙竚九闕之御幾崇妙蘊  
仰契真風

靈釐殿啓建皇太后生辰靈寶道場青詞

良月戒寒純坤厚宅紀慈闈之誕序會聖懋之嘉辰前  
袂除庭具敷靈式度演真風之妙永同皇祚之休

靈釐殿滿散皇太后生辰道場青詞

尊履皇圖孝申毋養屬商飈之御氣紀沙麓之開祥夙



採秘洞之科履揖列真之御度資道妙丕錫時休

觀文殿滿散皇太后生辰道場青詞

冬籥導寒應就盈之良月母闈鍾慶紀載誕之休辰敬  
別殿之清場研上清之妙教庶續慈靈之茂永均皇曆  
之昌

奉元殿啓建皇帝本命道場青詞

正陽紀月元命屆辰仰叩清都恭開靖會舉靈文而參  
講集才品以具陳伏冀貯嚮儲精希微降鑒垂在天之

仙廕祚卜世之皇基

鴻慶宮啓建皇帝本命道場青詞

別都之奧皇運啓基作為靈宮館寓衆聖顧循妙質嗣  
撫休期屬歲律之垂秋推命元之協協日載嚴道式丕迓  
純釐

慶寧宮啓建皇帝本命道場青詞

猥以涼德獲承至尊顧慶寧之新宮寶明兩之舊綰肆  
惟丕命之發式是羣靈之扶歸命高真資闋妙廕



壽星觀啓建皇帝本命道場青詞

四時回復萬化氤氳祇荷寶圖聿臨元命仙庭之闕列  
御所棲仰薦精衷度回道廡

萬壽觀啓建皇帝本命道場青詞

日晷過<sup>幹</sup>農塲畢登眷惟令辰將及元命潔修道會寅  
啓仙都冀霄極之鑒觀祈聖真之緩祐誕清寓縣豐庇  
生靈

會直觀啓建皇帝本命道場青詞

涵象紫虛實統本生之氣秘言丹錄蓋司定命之文考  
日道祥按科嚴供袂殊庭之中遠佇靈駕之下虞留鑿  
精明輔延昌熾嗣安丕運永嚮真風

崇福觀啓建皇帝本命道場青詞

承天之序享國之安適臨元命之期仰懷乾坤之廡延  
真秘宇按式清壇跂遐福於太清保皇圖於永祚

太乙宮啓建皇帝本命靈寶道場青詞

暢惟眇躬欽被景曆大時播氣元命應辰適臨炎籙之



中預啟珍臺之會瞻玉晨之絕致迎瀛御之下游願鑒  
忱思乎垂惠蔭

建隆觀啟建皇帝本命道場青詞

首春開序元命屆辰爰被殊廷俾陳勝會亶廣揚於妙  
善祈仰格于高真密諒衷懷交敷戩穀寶圖丕固仙廡  
永休

崇禧觀啟建皇帝本命道場青詞

大火臨墟寶肇基于王業羣飈泊館奚系迹於真風顧

蒙寄于丕圖薦推辰于始命往即殊廷之夕具宣元洞  
之科精志所孚皇休是祚

鴻慶宮啟建皇帝本命道場青詞

九清佑下陰扶皇祚之延六氣旋中環次命元之紀肅  
依道守明按真科敢薦誠忱庶迎福順

明道觀啟建皇帝本命道場青詞

天心丕應北新邦統之承月律再移旋次命元之紀述  
瞻秘館素宅靈區載陳瑤席之芽具繹琅書之緼伏冀



遊格馭斗籍著符終縈覆露之人永保熾昌之祚

延祥觀啓建太皇太后本命道場青詞

尊履皇基孝行綿宇方極祖慈之養薦臨元命之辰按  
靈步於行棊演沖科于祕館庶誠忱之上格錫壽祉之  
丕延

慶寧宮啓建太皇太后本命道場青詞

淑律收華焱煒御氣駘清臺之新厯紀慈殿之元辰風  
敦秘洞之科緬念高辰之馭庶綏神右常協拜休

太乙宮啓建太皇太后本命道場青詞

孝奉慈顏象尊元命載被禁楹之邃仰延真馭之游探  
三洞之沖科披始青之秘籙庶資道妙永介靈休

萬壽觀啓建太皇太后本命道場青詞

茂纘皇圖尊承慈闈屬陽春之季月紀元命之嘉辰爰  
被殊庭仰延法御庶默回于圓造用丕錫于靈釐

萬壽觀滿散太皇太后本命道場青詞

頌幄延真肅揖颺游之駕珠臺按式載披寶籙之文既



齋明之盡誠亦盱矐之來顧終延妙本永薦慈休

坤寧殿啓建太皇太后本命道場青詞

荷天休命嗣國丕基承祖養之慈時及命元之紀企列  
真於上極宗衆妙之高風庶默下於靈觀用蕃膺於沖  
社

奉元殿啓建皇太后本命道場青詞

毋儀正位極致養于孝誠神造主生推發祥于元命屬  
上冬之吉序數<sup>數</sup>三洞之靈科庶集沖釐均休皇祚

太乙宮啓建皇太后本命道場青詞

孝尊長樂序戒元辰禁館敷延仙函發籙伏冀上真垂  
祐寶祚均長敢薦信於靈觀永希風於道甫

慶寧觀啓建太后本命道場青詞

慈闈致養方率孝於羣倫寶歷薦時載辰推于元命即  
列真之邃宇研詣妙之靈文庶歸蔭於道風蓋均祥於  
皇祚

西太乙宮啓建皇太后本命道場青詞



長信奉親必極天下之養元辰本歷載當冬仲之期緬  
欽不宰之私默系有生之命延利<sub>羽</sub>禱<sub>祐</sub>之上侶按瓊科之  
妙儀度閔道於真風益輔祥於永祚

南郊預告道場青詞

宋子京

祇嗣慶基六舉烟燎幸萬物之時人間四方之少虞三  
歲於茲舊章可述已圖嚴配前喻收司外竭警嘉中率  
虔鞏度申照事式啓蕃禧

南郊預告道場青詞

比卜天正躬場帝燎百神來職萬乘戒期惟大事之才  
勤勵精衷而有恪時蠲嚴室敷迪齋科歷諷琅音上祈  
聖祐幸鴻儀之克展浹黎獻之太和敢怠日修仰酬天  
薦

南郊預告道場青詞

薦誠吉上拜貺上天率三載以為常普四方而助職幸  
邦治定加歲順成冀藏上儀仰孚下壽已丁寧於先甲  
俾疏淪於羣生蠲奉有加須求無擾仰惟真鑒垂悉至



虞

南郊禮畢道場青詞

天燎告誠帝暉臨享自六飛之出次逮百職之戒嚴氛  
霧廓除霄晨澄潤算光充塞協氣臻翔荷衆聖之顧存  
集中區之昭泰是用袞蠲秘宇啓設真場名敬服之列  
官紬瓊函之奧蘊庾綠報禮祇荅純休威咫尺不違景游  
垂鑒

明堂預告道場青詞

嗣守丕業於今四年躬祀總章方期再見講魯之舊當  
先事於泮宮稽國之常亦預期於中禁袞除秘殿祇俟  
真遊降福儲祥望旋霄而非遠奉珪奠幣奠釐事之有  
成

明堂禮畢道場青詞

比講嚴禋用昭美報荷三靈之降鑿致百禮之備成敢  
修秘笈之儀用企叢霄之馭庶扶景祚永格殊休

明堂禮畢道場青詞

蘇子由



因聽政之當修饗帝之祀陟配文考大賚四方禮成不  
為神貺昭答念非寡德之致願依妙道之餘祇後禁塗  
遠迎真馭誠心上達微供獲陳

裕饗預告青詞

宗廟之嚴裕宗為重乃卜孟冬之吉躬修合食之儀仰  
企上靈冥享陰佑俾克成於盛禮奠永錫於純禧式展  
孝思用膺神貺

裕饗預告青詞

宋子京

裸玉奠芳徧躋於左廟星旒燭影遂集於陽郊密企清  
都回經馳道式車示謹罷蹕戒喧方祇燎於天柴聿除  
精於幔省仰祈真蔭助畢鴻儀

廟祭預告青詞

今者屬圖筮祝先見高真叩寶宇之靖嚴滌瑤觴而伏  
獻春惟秘宇夙奉慈闈顧奠鬯之難兼委薦紳而攝告  
靈游無隔精意幸昭茲者躬歎殊庭祇見真祖茂瞻玉  
理進袂霞觴眷惟慈寢之嚴夙厚慶源之蔭已詔職事



攝奉舊章願委餘禧以光降祚

四瀆投送金龍玉簡青詞

孫仲益

妙道希夷實司於化育名區邃邈允宅於真靈向因文  
考之諱辰仍屬華年之首序肅延淨侶祇被清塲秘蘊  
交敷沖科並講俾適投於信簡庸庶示於虔誠伏冀擁  
順祥釐均消祲沴於廣宇綏此羣生

茅山金山投送金龍玉簡青詞

王岐公

神畿之真璇館凌虛道祖之靈蘿圖系慶比按三清之

式爰敷九曜之筵薦玉景之高文達龍淵之至信永孚  
妙蔭下錫丕祥

金山水府投送金龍玉簡青詞

祥開誕序會集仙科秘府淳淵式通妙旨行龍傳簡庸  
達信章緬企真風益孚靈鑒

玉京洞金華洞投送金龍玉簡青詞

至妙者道之宗無私者天之總維時暮春之序載被禁  
庭之嚴寶籙披函颺游下席既格衷于靈監旋錫祉于



皇圖瑤簡傳龍以將至信

金山水府投送金龍玉簡青詞

南有靈淵下溥祕府屬上都之敞會按三洞以成科載  
刊瑤簡之文用致金龍之信度孚冲鑒永祚純休

張公洞投送金龍玉簡青詞

太極涵元上真凝化顧纂圖於皇序期歛福於羣生跋  
景層虛按科靈宇逮清壇之已事託寶信以馳誠度格  
齋顯用孚眷佑

河陽濟瀆北海水府投送金龍玉簡青詞

地控靈區淵臨邃府肅陳醮席欽迓颺游蕊笈披文式  
遵冲範

四瀆水府投送金龍玉簡青詞

紫極涵元宰羣生於下土珍臺寓聖演真教於上都遐  
瞻洞府之嚴素宅神靈之粹式將祕簡以傳行龍維誠  
信於所交諒幽通之靡隔

四瀆北海水府投送金龍玉簡青詞



氣明薰序神發誕符解秘館之沖科集紫虛之上果遐  
企列真之御俯臨靈委之淵達編玉之鏤章傳行龍之  
闕信度孚情悃丕錫蕃祺

金山水府投送金龍玉簡青詞

靈淵澈洞本為仙府之居信簡傳龍蓋舉道家之範屬  
上都之演教瞻秘境以投誠度格沖觀俯垂妙蔭

集禧觀啓建年交道場青詞

運薄星回歲陰垂暮年華物始春籥行新顧承大統之

休夙被三靈之蔭念薦更於順序思歸謝於元功前被  
除庭按陳法席遙佇飛飈之駕下歆甘露之羞

萬壽觀啓建年交金籙道場青詞

四氣播時屬年陰之中紀三期啓朔方物始之乘春暎  
眇德之承基思泰和之蒙宇預敬真廷之會大陳寶籙  
之科庶履歲元溥綏邦祉

醴泉觀啓建年交金籙道場青詞

天回星紀物動年華驅積沴於故陰導泰和於首序講



有冲式布於靈場仰至鑿之溥臨錫庶生之丕茂

福寧殿啓建正旦祈福道場青詞 歐陽永叔

四時成歲嘉庶景之咸新百福自天荷衆真之冥貺俾  
開靈囿恭講仙科恢寶祚之延長錫壽康之遐永是惟  
降鑿享乃克誠

太乙宮啓建正旦祈福道場青詞

真游秘殿邃嚴惟首月之正時叶新陽而布慶俾陳  
法供仰薦明誠伏異敷佑眇躬保千齡而永固躋民壽

域均萬國以同休

洞霄宮啓建立春祈福道場青詞

和厯發春蒼神受職肇生萬寶平馭九農瞻惟岳靈分  
奠坤載乘熙春之啓序肆華醮以迎釐披蕙祈真潔薰  
攘癘庶緣順貺有庇羣元

崇禧觀啓建上元祈福道場青詞 宋子京

月御分天適紀寅杓之半仙圖校福並會紫都之嚴祇  
奉靈辰普修清紀分遣有位即禱殊庭佇飈駕於鴻濛



介神祺之盼蠻所異蚩蚩億姓蠢蠢羣生富壽生躋茂  
靈交遂永堅淳濯仰奉高明

萬壽觀啓建上元祈福道場青詞 歐陽永叔

萬物熙春肇新陽於歲首三元紀序標令節於真經爰  
即靈場俾遵秘式薦雖陳於菲薄誠已達於精明伏願  
穹昊垂休紫清降鑒邦家錫慶永叶於泰寧民物遂生  
並臻於和樂

醴泉觀啓建保夏道場青詞

元氣幹旋時惟炎序珍臺巖邃宅於仙游披藥笈之冲  
篇被靈壇之芳薦仰控紫閣之鑿莫調玉燭之和

崇福觀啓建中元道場青詞 宋子京

秋禴云初月靈茲望仙真普會校籙素嚴深詔攸司秩  
修常典分就殊庭之秘肅陳芳獻之華諷譯內音振除  
羣累拂塵為悟濟苦而歡仰高極之喜慈恢有生之護  
貸顧臨蠲潔開佑福祥寡德蒙安齊誠敢替

福寧殿啓建中元祈福道場青詞



肇秋之辰既望之夕候先都之校籍即秘館以敷筵風  
稽三洞之科緬此九清之駕

奉親廣孝二殿啓建中元祈福道場青詞

方秋之初維月既望將登年於素律適校籍於丹臺風  
探靈科仰要冲顧庶恢風於妙有益助福於遐升

萬壽觀啓建下元祈福道場青詞 毛伯穎

良月望舒當大冬之含有育下元校錄屬羣聖之會同仰  
憑陰隲之慈輒備禱祈之禮古蠲壇席稽按科儀延飈

鄰於紫清整悃誠於丹素伏願真靈孚佑慈寶鑒臨崇  
降嘉祥袪除災癘誓竭精純之守仰酬洪覆之恩

景星宮啓建下元祈福道場青詞

時屬初寒月臨既望才先都之校籍俾真館以陳科下  
垂圓鑒之臨丕錫涵生之又仰依妙用終竭至忱

太乙宮啓建下元祈福道場青詞

珍臺寓帟延上極之列真寶律還陰屬下元之佳節集  
羽裾之淨侶繹瓊笈之冲科庶格靈觀用鈞邦祉



後苑祈皇嗣保安道場青詞

歐陽永叔

廟社降祥宮庭叶慶載蠲吉旦交薦明誠期仰格於清  
真俾敷延於祉福永期昌祚遐企靈休

福寧殿祈皇嗣催生保慶道場青詞

高穹降慶方垂佑於邦家彌月告期用薦誠於科籙異  
衆真之昭鑒臻百順以儲休

後苑催生保慶道場青詞

正陽旅月載育開祥式因靈守之嚴交薦精衷之潔虔

望衆真之貺敷昭百順之休永祚皇圖寶希道蔭

禁苑催生保慶道場青詞

宋子京

恭念以眇眇之身奉丕丕之祚祈天錫美嗣厯無疆顧  
此嬪帷就安乳館永言穹昊夙庇宗祧敢通醮於藥藥  
願委慈於祺鞫克生而育俾熾而昌罄露至誠仰須祺  
祉

後苑催生保慶道場青詞

誕彌叶慶蠲潔修誠嚴秘殿於靈宮誦真文於藥簡通



此蕊芬之薦被其災害之虞仰冀昭回玉符鑿祐

後苑催生保慶道場青詞

吉日迎祥靈謀叶慶爰即清<sup>真</sup>之宇虔修科式之儀冀核  
滌於害災俾敷昭于福應載昌儲慶永固基圖

後苑催生保慶道場青詞

祠禱叶應彌月告祥肅依科錄以薦誠仰冀昭臨之降  
鑒錫之祉福佑以休寧惟集慶於邦家永延鴻於基緒  
後苑祈皇嗣道場青詞

聖真所居靈感斯集屬擁休於廟社將儲慶於宮庭生  
聚仰禧幅員翹庇載馳使命恭扣清都誠<sup>疑</sup>聲伸寶<sup>香</sup>  
交馥伏願神威溥護法力扶持朱蒂講儀早繼斯皇之  
詠瑞曦騰耀益隆久照之期言念虔詞不勝企禱

集禧殿禳謝火星道場青詞

汪彥章

統輯羣元懼德莫勝於厥付導迎休應惟真曲赴於所  
祈茲緣駘蕩之辰懼有鬱積之沴敢延冲馭俯降靈場  
異憑敷佑之仁永享平安之慶



福寧殿啓建禳謝彗星道場青詞

上帝聽通每示民以災祥一人保圖必畏天之威命乃妖文著於營室戾氣厯於金方竊循災變之繇實致瑣涼之懼用按科於秘殿方謁款於高穹庶蒙降鑒之私以返在纏之象

福寧殿滿散禳謝彗星道場青詞

太史占文西纏爾變顧天衷之靡測省邦咎之所從內格至精仰孚靈鑒忽妖芒之澄象致順氣之凝休益勵

菲思庶符元祐

紫宸殿醮禳星變道場青詞

猥荷玉圖薦鍾否運每寅恭而事帝懼災沴之及民迺者時屬杪秋星違常度念譴告曾元於虛是必愆咎有瀆於升聞夙夜靡遑與形俱惕即名山之勝景修大洞之名科仰冀真游俯回靈鑒函垂銷去之福永啓繫隆之期

太乙宮為民禳災九星九曜道場青詞



天聽之卑默下災祥之告君應以德敏如影嚮之隨比  
春律之向闕乃星躔之示變爰核華林之會仰延飈駕  
之休至忱格於靈觀順象澄於妖晷益懷修省之懼庶  
答蓋臨之私

太乙宮啓建祈福道場青詞

蘇東坡

臣以冲眇嗣承列聖之休濟於艱難實賴文母之德臨  
蒞四載勤勞百為畏天之威未嘗終日而豫怠視民如  
子惟恐一夫之困窮伏願上帝降祥衆真垂祐消禳災

冷永底壽康恭陳寶籙之科仰扣神游之館敢祈昭鑒  
上察孝心

慶壽宮慶土道場青詞

尊奉慈闈大新寶宇屬象後之甫就宜羣靈之所扶風  
探秘洞之科仰企迴歎之御異通至信永錫順祺

皇太后禳災道場青詞

坤元毓德夏清在辰才色養之殫誠偶時禴之爽裕敢  
祈珍馭俯即禁楹曲垂神鑒之私永集慈闈之慶



五百家播芳大全文粹卷七十一

五百家播芳大全文粹卷七十一



國家圖書館, NATIONAL CENTRAL LIBRARY, TAIWAN, R.O.C.



五百家播芳大全文粹

宋 魏齊賢等 全編

卷七十二

青詞

醴泉觀啟建祈雨道場青詞

汪彥章

時當長夏早至累旬力穡有秋徒極嗟吁之請密雲不  
雨未知霑足之期顧咎徵之匪虛皆菲躬之所召伊民  
何罪惟帝降衷起潛伏之羣龍徧行膏澤蘇焦枯之百



粟坐致豐年長與羣生恭承景貺

醴泉觀啟建謝雨道場青詞

文士穎

常暘肆虐驚萬景之如焚至道無私愍羣生之何罪果  
蒙潤澤普濟焦枯敢誇閔雨雨之誠實荷大生之德三農  
有望百室將盈仰企雲霄莫酬造化

中太乙宮啟建祈雨道場青詞

雲行雨施式資百物之亨火見金藏懼致驕陽之害嘉  
生若禡比塵屋可隆輒殫懇迫之誠上瀆蓋高之聽仰祈

昭鑒俯佑下民和氣致祥五一風而十一雨大田多稼  
千斯倉而萬斯箱凡屬含生均蒙道蔭

中太乙宮啟建謝雨道場青詞

宋子京

清和屆辰愆亢為沴念言動植憂殄夙宵庸罄至誠仰  
祈靈佑果膺顧答遽錫蒸濡物品載融農疇滋洽敢致  
潔精之薦庶仰昭謝之懷

福寧殿啟建祈晴道場青詞

精陰成沴淫雨過常遽貽比屋之咨將失甫田之望念



流災之所自繇非德之致然敢厲精誠庶回休證

福寧殿啟建謝晴道場青詞

災異之作誠告孔昭方仲秋之御辰乃淫雨之為沴場  
奉明威之鑒遽承休應之來敢忘精衷以祇靈造

紫宸殿啟建祈晴道場青詞

歐陽永叔

素節適中積陰為沴眷言淫雨之變罹此下民之災載  
竭精衷庶孚善應祓秘楹之靖密按寶籙之淵微永錫  
順祺丕冒涵宇

紫宸殿啟建謝晴道場青詞

積陰貫辰沴雨傷歲顧天災之暴降懼邦治之大度適  
通至誠俄塞巨變終歸仁於元造永垂福於涵生

洞霄宮啟建祈晴道場青詞

大田多稼均有望于生成三日為霖恐或貽于物害敢  
殫微懇恭叩上真伏望矜閱黔黎掃除陰沴雲翳廓開  
於四野日輪顯照於中天百穀既收三農共慶

雅飾御容道場青詞



珍宇邃嚴奉真虛而有素玉容清穆謹修祓以惟時爰  
按仙科俾伸虔告載瞻道蔭宜永冲誠

雅飾御容道場青詞

威神在天像設有位稍經歲月寢失光儀輒因虛科以  
告增飾真聖所依宜極華煥歲月既久必有增嚴茲因  
吉日之良敢告飾上之始

安御容道場青詞

歐陽永叔

靈峰甚峻仙宇載嚴爰考吉辰奉審聖像式伸祇告昭

鑿乃誠

安御容道場青詞

蘇子由

靈德常新威顏有耀儼若斯民之望恍然真馭之臨肇  
自殊庭即安珍館稽首延佇降福無疆

遷御容道場青詞

於皇神考肇啟秘詞方增築於未寧懼格思之有瀆別  
嚴淨宇祇奉昨容式燕聖靈永綏慈嘏

景靈宮啟建仁宗忌辰黃籙道場青詞



聖業垂鴻覆及眇躬之御仙游趣駕迅驚流景之仙撫  
暹樂之初辰即棲真之列宇茂敷沖式欽繹靈佑庶格  
道於上圓益侈祥於後葉

英德殿啟建英宗忌辰道場青詞 王岐公

法馭賓空未隔顧言之遠流陰易節早臨諱日之初瞻  
遺像於原祠發沖科於秘笈庶嚴道節益輔神游

景靈宮啟建英宗忌辰道場青詞

六駕神螭莫返乘雲之御雙擎仙掌載驚零露之辰追

未命於當年演沖科於別宇庶恢妙用益薦遐升

資薦神宗投送金龍玉簡青詞

嗣膺丕祚追奉先猷帳寶馭之賓空倏芳陰之環歲瓊  
科敷緼既薦福於真庭玉簡載符庸道誠於祕府庶回  
靈馭仰助遐升

資薦仁宗投送金龍玉簡道場青詞

大行不復永慕仙游三洞按科具資道果撤清場於禁  
宇投寶信於靈科願契真風徃賓妙境



資薦哲宗黃籙醮青詞

天上去留本輕於脫屣人間哀樂徒重於遺弓邈焉丹  
水之遊痛矣白雲之遠雖傾河而注海豈勝涕瀉顧隕  
首以喪元莫酬隆遇恭念清真之典具嚴祈醮之文啟  
金籙以陳儀籲丹霄而請命伏望高穹照鑒列聖貺臨  
矜罔極之至情助無疆之廣福綏我先后燕于太清靈  
馭逍遙仰威顏而莫見帝鄉寥廓固妙體以常存永儲  
宗社之休溥錫臣民之慶

資薦哲宗大祥道場青詞

遺弓已遠新穀再升恭啟靈篇式嚴飈馭雲天在望已  
陪帝所之游霜露已濡猶極人民之慕蓋敷餘祉大庇  
含生

集禧館啟建仁宗百日道場青詞

仙興趣駕莫攀上漢之游宮隙流陰遽又踰時之慕建  
妙儀於別境摹法會於諸天庶格精因更資遐陟

資薦隆祐皇后首七道場青詞

汪彥章



彤管載功方紀闕睢之化禕衣告復忽虛長樂之朝顧  
游景之莫留集京悰而如割敢祈珍衛俯降靈場度綠  
陰騰之仁益廣遐升之福

資薦上皇大祥青詞

神聖千齡而厭世已參仙馭之游日星一歲而周天俯  
及期祥之候禮經有制孝感無窮輒殫螻蟻之誠仰答  
乾坤之造申嚴祕典祗袂清場諷琅函寶笈之文塵金  
闕玉闕之聽上祈天鑒敷錫神禧仰資既往之靈齊光

北斗更福中興之運比壽南山臣無仕

資薦上皇大祥青詞

聖王之禮期年而俯及齊祥臣子之心沒萬而不忘孝  
感屬茲哀慕輒罄悃誠上祈皇覺之功式助仙遊之樂  
伏惟太上皇帝陛下道包有截德被無疆倏爾歸真盡  
然永慕鸞儀天仗願遊上帝之庭鳳歷維圖永作後昆之福

朱表

南郊禮畢奏告南嶽表本

汪彥章



茲者舉上高之儀遵皇祐之詔合法天地升配祖宗蒙  
仙聖之護持獲純精之陳薦冀垂景貺永佑石圖

南郊禮畢奏告普賢菩薩表本

伏以少昊方秋上辛惟吉重屋親祠之禮肇講宗祈十  
萬普現之身悉垂冥助既獲熙成之況敢忘昭報之私

明堂預告表本

潔誠至享近在外朝先事告誠祇祓中禁企聖真於璇  
極嚴科式於靈壇恍惚攸通福祥來暨冀奠玉而神享

迄升禋之禮成終始莫違上下蒙慶

明堂禮畢奏告景靈宮諸陵表本 汪彥章

比卜九秋之吉躬陳五室之儀荷帝溥臨及時祇薦惟  
夙承於丕訓周克濟於嚴禋既享休成敢忘昭報

明堂禮畢奏告表本 蘇子由

親祠之重每三歲而後成陟配之隆及中辛而既舉顧  
菲薄而何有賴真聖以為依祇按靈科潔齋秘殿仙遊  
降格神况普存上保邦家之休下祈民物之定眇無微



相過此何求

明堂禮畢奏告表本

汪彥章

伏以比涓剛日祇見合宮天地同禋既盡靈承之禮祖  
宗並有復殫孝享之誠仰護顧歆實由享佑冀永鑒觀  
之命俾承興復之功

明堂禮畢奏告表本

躬薦微誠克終大典致周公嚴父之志達聖人享帝之  
能顧菲薄之何功賴仙真之垂佑歸依靡極荷載不忘

明堂禮畢露香表本

大亨告成舊章不墜邇答昊穹之况升侑大考之靈精  
意潛通多福薦至敢因清夜躬薦薄誠

月朔奏告太祖皇帝表本

伏以時丁良月嘉萬寶之既成節通週年悵三微之將  
復恭惟太祖皇帝陛下功彌宇宙澤浹華夷光垂鴻業  
之餘燕及眇躬之嗣因節寒之始屆致時奠以遐思

星變禳禱表本

宋子京



星行於上厥有躔經政失其宜乃垂咎徵眷惟菲德久  
荷鴻休不能躬厲於至誠乃使變生於常象敢祈所正造  
時鑒微衷赦其召異之愆茂以至和之福

禳謝文星道場表本

汪彥章

推類而言惟至誠之護相降衷於下非洪造以疇依既  
祇被於殊庭蒙曲垂於昭鑒嘉與敷天之俗共承嗣歲  
之休

奏告宣仁聖烈皇后忌辰表本

汪彥章

真游厭代厚祿在民適丁奉諱之辰式謹寧坤之禮恭  
惟宣仁聖烈皇后殿下功高任姒治格唐虞豈特六宮  
永遵儀極之範生令四海咸賴補天之功仙馭益遐孝  
思何極

昭慈獻烈皇后殯宮旦望表本

汪彥章

宮壺興哀屢改階莫之旦寂園在望俄驚松柏之秋恭  
惟昭慈獻烈皇后位正累朝德齊先后仙遊雖邈慈矩  
具存地隔三山莫獻蟠桃之實神歸九廟長遊大練之



宸適過蕭辰何勝永慕

秋社表本

宮壺興哀屢改階莫之旦寢園在望俄驚松栢之秋恭  
惟昭慈獻烈皇后儼天德大救物功深既鍊石以告功  
遽乘雲而不返追攀無及感愴奈何

中秋表本

長樂終天人結慈母之戀<sup>狀</sup>尊收告節月圓秋氣之中觀  
玉瑄之屢移望栢城而增愴恭惟昭慈獻烈皇后體美

任之德希黃老之蹤<sup>赴</sup>帝鄉之期永違天下之養每  
懷遺訓徒極哀悰

九月旦表本

軒星既掞駢駕莫還方興長夜之哀忽屆杪秋之序恭  
惟昭慈獻烈皇后功參十亂道冠六宮問寢承顏一朝  
違長樂之養祔姑合食千載附泰陵之游搖落有懷追  
攀無所

重陽表本



種桂告成常帥九賓之獻菊萸在御莫伸萬壽之期恭  
惟昭慈獻烈皇后厚德倪天徽音垂世自哀纏於厚夜  
忽時及於週年爰致孝思式陳時薦

九月望表本

椒掖武寒栢城無曉永隔神雲之馭倏更霜露之辰恭  
惟昭慈獻烈皇后化首宮闈澤流寰宇念纂承於丕緒  
蒙保佑之隆恩緬想徽音何勝孺慕

十月朔表本

釁結修天時丁良月雖閏宮之在望瞻大練以無階恭  
惟昭慈獻烈皇后夢月鍾靈補天儷德奄隔晨昏之養  
屢驚弦晦之遷茲覩流光何勝永慕

下元節表本

驗灰緹室將觀一氣之回校籍清都莫重三光之畢緬  
思慈範永隔仙遊恭惟昭慈獻烈皇后所憂在賢以儉  
為寶方俟含飴之慶遽興復土之哀爰即嘉辰載陳時  
薦



雅飾御容表本

蘇東坡

於赫皇祖敷佑下民眷真守之靚深儼粹容之肅穆雖  
道存不變而體有從新既祇薦於科儀斯永安於像設

安御容表本

馭風雲闕既參日月之光弭節琳宮尚荅神民之望爰  
開法會度款真庭願推往聖之心永錫函生之福

年節告裕陵表本

葦桃在戶徒講三朝之儀椒栢稱觴無復萬年之壽恭

惟謚號皇帝功施無外德治有生隨鼓漏之寢園莫親  
饋奠望衣冠於原廟空極涕流

冬節告裕陵表本

厯紀天正史書日至感舒長於測景增怵惕於履霜恭  
惟諡號皇帝德邁堯仁功恢禹迹游衣冠於原廟徒仰  
威神望松栢於橋山永懷悲慕

生日祈禱道場青詞

陳丞相

二年居里常懷縻縻之慚累表叩關未遂乞骸之請敢



殫設赤仰漬員清伏念臣許國何功逢辰竊幸已迫桑榆之景尚貪香火之緣止足不知滿盈自懼薰心惕厲慮晚節以難全病骨支離念此生之餘幾屬辰誕毓祇薦董修爾壽爾昌已荷乾坤之覆載將安將樂更期雨露之生辰

生日禳災設醮道場青詞

唐子西

有生之衆所欲不同貧者願乎多財富者期於不死賤者志求於顯達貴者思保其久長人既無厭神難以應

臣雖無似志實不然雖亦有禱於三清惟乞無災之二字但以私門多故歷歲不寧齒髮變於艱危精神耗於憂慮爰於生日虔扣上真庶幾天高而聽卑所謂物窮則反本使身心安穩尚復何求寢食康寧便為至足其他外物一付自然既所請之甚微宜必從於祈禱

生日祈禱設醮道場青詞

天無私覆播萬彙以生成道非常名融一心而感格馨危衰之端慙望虛鑒之昭回敢以誕辰恭修茅醮琅函



藥笈披三洞之秘文絳節冕旌延九霄之飛馭願垂歆  
答俯應<sup>祈</sup>析求所冀先世光靈盡蒙遷拔此生愆咎咸賜  
蕩除保身氣之安強錫壽祺之龐固齋戒以享上帝夙  
罄修誠陰隲而福下民<sup>祈</sup>垂善應

生日<sup>祈</sup>析攘設醮道場青詞

趙莊叔

臨下有赫<sup>孰</sup>窺不測之神應天以誠或動蓋高之聽伏  
念臣質弱多病性昏不靈雖知忠孝以盡心常懼寵光  
之過分敢以始生之旦仰祈真聖之恩妙力所加諸惡

莫作錫以多福蕃以後昆齋心潔誠永求歸於志道竭  
力盡瘁庶無愧於明時

生日賽願設醮道場青詞

妙道淵微非塵凡之可測圓穹杳邈有誠信之能通輒  
陳悃幅之私上瀆蓋高之聽伏念臣叨恩三紀從事六  
官勤勞更歷於歲終修省無忘於夙夜昨於正旦嘗啟  
願心許大醮之祈禳乞靈休之保護今逢誕日恭按科  
文集道侶於壇場頂粹容於香火仰回聖馭曲享清修



伏望上帝垂慈列真降佑延偏親之壽考茂合揆於禧  
祥三考書成祈有更代之慶百神來相俾無災滯之虞  
生日祈禳設醮道場青詞

陳丞相

身惟許國何施汗馬之勞老合歸田尚竊真祠之祿昌  
報乾坤之施備殫螻蟻之誠伏念臣起自書生濫儕朝  
序際聖明之熙運叨內外之要司既霜孤棘之聯復玷  
公珪之峻德涼才薄愧浮食之罔功福過運衰知來日  
之餘餘幾興言及此殊用慨然况疾病之相承知滿盈之

是懼屬逢良月復屆始生平安少假於頽齡止足庶希  
於前哲敢陳菲薦上瀆高真百歲而七十者稀已過平  
生之願一善而千災可却尚垂洪覆之恩

生日祈禳設醮道場青詞

鑒觀四方天蓋垂於顯道齊明盛服人必効於敬心臣  
冒寵清時偷閒暮景滿盈是戒敢忘止足之恩疾疫易  
生每幸康寧之保皆化工之仗庇豈綿力之可酬適屆  
初春虔修羞供伏願上元校籙均庶惠以承休授老年



齡與闔門而無恙

生日祈禳設醮道場青詞

劉中遠

日月照臨何幽弗燭乾坤覆載有感必通輒殫不息之誠仰瀆蓋高之聽伏念某性質殘暗道力單微既舉足以屯危遂觸途而艱阨爰值始生之日聿懷洪造之恩竭忠披衷誓祈鑒照陳詞滉泐願賜護持斯言上陳此心中暢

生日祈禳設醮道場青詞

仰洪造之難名不私所應竭愚衷而昭事式表其勤惟冀免災敢云要福伏念臣叨塵仕版薦領戎行揣已奚堪感知有日惟是桑弧戴生之日輒修蘋藻可薦之誠伏念上帝居歆圓靈錫羨忝造化爐中之物咸與為春戴生成守內之天其密惟永洽於屬類介以平康

生日祈禳設醮道場青詞

陳丞相

老合歸田方遂乞嗣之請功何報國更叨增秩之榮敢瀝丹衷仰干洪造伏念臣撲愚自守悃幅不華偶際會



於昌辰浸叨踰於顯宦熏心惕厲慮深切於滿盈病骨  
支離患每虞於吳日茲逢良月復屆始生輒羞菲薦之  
誠上瀆高真之聽知止知足已休退於丘園將樂將安  
更歸投於穹昊

生日祈禳設醮道場青詞

毛伯穎

九天稱慶五帝監生載惟夙昔之初實本圓清之造歲  
時過復日月載臨蹈世諦之乖逢豈無愆咎圓星躔之  
盈縮或值災危思培植於福基望增延於壽數按清紫

之真教依黃籙之明科祇謁雲衢仰延風馭靈壇芬席  
備三日之蕤章丹篆朱章罄一心之悃歎祥光下矚嘉  
事告成伏願慈寶鑒臨仙真孚佑北都泉曲祚既往之  
超昇南極朱陵錫見存之誕永家門帖泰世路亨通誓  
聖信順之誠仰答顧歆之造

生日祈禳設醮道場青詞

大矣乾坤曲示含弘之德微如螻蟻輒伸懇禱之誠仰  
瀆高真俯祈昭鑒伏念臣奔馳薄宦因躡孤踪合門叨



飽暖之恩晚歲荷蟬螻之賜屬逢良月適屆始生虔修  
醮謝之恭少効涓埃之報披溪毛而薦潔冀風馭之來  
臨惟欲免災誰云要福永無坎險俾壽考以康寧果獲  
泰亨庶提攜於長幼

生日設醮清旦青詞

九霄寥邈垂科教之謹嚴三獻吉蠲備情文之祇肅才  
此羣陰之伏迨茲申旦之初延溯高穹敷陳精意錫之  
多祉瀆以遐齡惟德動天敢自忘以惕厲大鈞播物實

仰賴於函蒙

生日設醮青詞

葛謙白

蓬矢門闈載遇始生之旦慈藥珠宮闕久依至道之宗輒  
輸晃晃之感仰瀆高高之聽伏念臣某早膺擢序寢冒  
寵光雖託覆罔穹默荷吉祥之相然甄形大塊或虞災  
沴之侵將俯誕辰恭修醮會奏諸天之隱韻諷大上之  
真詮絳筆書詞虔拜章於玉闕銀編鑄簡願益箕於金  
房



生日設醮青詞

合僕帝先孰測希夷之妙宣功天載是彰履情之公爰  
仗至誠仰祈至應伏念臣久承道蔭早襲官聯惟仲秋  
敷莢之三遇誕日垂孤之六特嚴法會公按仙科肅羽  
容之淨儀諷琅函函之隱韻所覲九霄孚答三境居歆騰  
飀馭於玉宸享馨羞於瑤席鑿茲蠲潔昇以吉祥被浮  
沴於身宮衍修期於斗籍

生日設醮道場青詞

衆靈森布寶司造化之權一氣吹噓孰匪生成之物榮  
身有自稽首知歸伏念某螻蟻微軀駑駘鈍質猥以一  
言之寤濫先十佛之題豈學術之能然是神明之所界  
爰從叨冒益重憂虞或人非鬼責之可防或陰伏陽愆  
之生疾况平時必有悔尤之積在今日豈無禳拔之因  
式就誕辰肅陳清醮自惟德薄敢言黍稷之非馨苟以  
信孚猶曰蘋蘩之可薦冀垂泉鑒幸察丹衷庶貯靈之  
潛通期妖氛之永殄自頂至踵誠知報塞之難由身及